

禮記子思子言鄭注補正

禮記子思子言鄭注補正卷四

附錄

順德簡朝亮述

禮記

謹案禮記凡四十九篇。傳之者戴氏聖也。

釋曰。禮記大名也。曲禮小目也。古本題曲禮於上。題禮記於下。據孔疏而知也。今大名在上。非古本焉。義通則亦從爾。蓋禮者性所生也。禮教以養其性也。孔疏云。若羊羔跪乳。鴻鴈飛有行列。豈由教之者哉。是矣。而教亦因焉。詩毛傳云。雖鳩摯而有別。此以教敬也。昭十七年左傳云。祝鳩氏司徒也。此以教孝也。以物之性而明人之性也。孝經云。天地之性。人爲貴。敢忘禮教乎。禮運稱孔子云。夫禮必本

於大一。分而爲天地。言天地亦禮爲之也。非惟與天地並也。昭二十六年左傳稱晏子云。禮之可以爲國也久矣。與天地並。其言禮者猶未至歟。易繫辭傳云。聖人有以見天下之動。而觀其會通。以行其典禮。此文王周公觀包犧氏之卦爻而行禮也。畫卦之初。禮文於是乎始矣。故易云。包犧氏沒。神農氏作。神農氏沒。黃帝堯舜氏作。遂云。黃帝堯舜垂衣裳而天下治。明乎禮漸興也。譙周古史攷云。伏犧制嫁娶。以儷皮爲禮。蓋其由來尙矣。伏犧者。包犧也。孔疏溯禮始者。引易緯禮緯焉。引尙書緯中候焉。皆誣也。此緯之亂經也。引帝王世紀焉。亦誣也。孔皆不据之矣。而孔据鄭六藝論也。其論稱遂皇後六紀九十一代者。豈足徵邪。

書堯典云。修五禮。馬氏融云。五禮。吉凶賓軍嘉也。馬据周官大宗伯而知也。蓋夏承唐虞。論語謂夏殷周之禮相因而損益也。今自堯典求之。五禮皆備焉。皋陶作士而統兵。軍禮也。其餘則可案以明也。皋陶謨云。天秩有禮。自我五禮。五庸哉。明皆修之也。堯典云。有能典朕三禮。馬氏云。三禮。天神。地祇。人鬼之禮是也。此於五禮而言三禮者。舉其重也。祭統所謂禮有五經。莫重於祭也。周官鄭注云。唐虞有三禮。至周分爲五禮。非也。孔疏言五禮者。引堯典爲舜典焉。此誤於僞古文尙書本爾。漢書藝文志云。禮古經五十六卷。經十七篇。又云。禮古經者。出於魯淹中。及孔氏與十七篇文相似。多三十九篇。及明堂陰陽王史氏記。蓋此

以禮經別禮記而言之。猶漢書河間獻王傳以禮禮記爲稱也。淹中。蘇林謂里名也。孔氏孔子壁中也。由魯共王壞孔子宅也。禮篇數如卷數焉。十七篇則高堂生所傳。今所稱儀禮也。其多三十九篇。未立於學官。鄭所稱逸禮也。鄭不注焉。迨唐末而亡矣。經十七篇。今本漢志作七十。與作學。蓋文之譌爾。漢志於禮經下云。記百三十一篇。自注云。七十子後學者所記也。漢志又云。明堂陰陽三十三篇。王史氏二十一篇。蓋從記而下。漢志言壁中古文者皆統爲禮記也。皆大小戴所采以傳也。孔疏引六藝論云。戴德傳記八十五篇。則大戴禮是也。戴聖傳禮四十九篇。則此禮記是也。隋志云。小戴記四十六篇。馬氏益月令明堂位樂

記合四十九篇。失之矣。樂記孔疏云。案別錄。禮記四十九篇。蓋劉向旣錄之也。後漢書橋玄傳云。七世祖仁從戴聖學。著禮記章句四十九篇。此豈馬氏益之乎。今本後漢書。聖作德。譌也。大一之太讀若泰。儼讀若離。共讀若恭。其通言三禮者。詳論語集注述疏子適衛章。

曲禮

謹案曲偏端也。曲禮者致偏端而成全體也。吳氏澄謂若中庸言致曲易言曲成也。蓋曲禮偏端對經禮全體而言。釋曰。禮器云。經禮三百。曲禮三千。今之儀禮則經禮三百中之未亡者也。今之禮記則曲禮三千中之未亡者也。故禮記諸篇先以曲禮統焉。釋文云。曲禮者委曲說禮之事。

禮記子思子言集注補正 卷四
今言偏端則委曲在其中矣。

曲禮曰。

謹案此貫一篇而言。

釋曰。禮器稱曲禮三千。其數多矣。曲禮一篇。其名僅存焉。
爾。鄭下文注引易者。言行作言語。又多者字。殆傳錄之譌。
也。下文注引春秋傳者。是謂我非夫。亦失原文。將誤憶歟。
孔疏謂鄭變文足之。非也。竄經可乎。此與鄭或隰栝引之。
或引据古本者不同。

安民哉。

謹案此曲禮之辭。民人也。蓋敬者實內外之德。其發於外。
而人察之者。貌言之敬也。論語言君子者曰。脩己以敬。遂

曰脩己以安人。又曰脩己以安百姓。蓋百姓則人之衆也。釋曰鄭注以此爲說曲禮者之辭。非也。書皋陶謨云天秩有禮。自我五禮。五庸哉。其爲文與此略同。朱子謂此哉與思辭爲韻。若管子弟子職篇用韻之文也。今攷詩殷其雷篇哉與斯子爲韻。此古音也。尙書說民人也。大學言新民者。蓋先家人也。自天子以至於庶人。皆有新民之責焉。孔疏云安民哉。是爲君上所行。於義未悉也。孝經云禮者敬而已矣。孔疏引之以申鄭也。其知要乎。而孔言敬者。惟以拜與式言之。亦於義未悉也。釋詁云悉盡也。脩與修通。敖不可長。欲不可從。志不可滿。樂不可極。樂音落

謹案敖慢也。大學曰之其所敖惰而辟焉。故敖戒其長也。

欲者樂記所謂人欲也。從與縱通。書曰。欲敗度。縱敗禮。故欲戒其從也。滿盈也。蓋得志者易盈也。易曰。人道惡盈而好謙。管子曰。人滿則天概之。故志戒其滿也。詩曰。好樂無荒。故樂戒其極也。

辟音僻惡烏路反好去聲

釋曰。鄭注統言四者。於文未洽也。書皋陶謨云。毋若丹朱敖。惟慢遊是好。蓋敖則慢矣。鄭以爲桀紂與丹朱同。然此經通戒焉。鄭惟自君上言之。於義未悉也。引書者昭十年左傳所稱書文也。今僞大甲襲之爾。漢諱盈曰滿。蓋義通也。引易者謙彖傳文。言人滿者。管子樞言篇也。引詩者蟋蟀文。孔疏讀樂如字。於文未洽也。經曰敖。曰欲。曰志。曰樂。皆在人者也。當一例焉。

賢者狎而敬之。

謹案賢者貫下六者而言。朱子謂此皆衆人不能。惟賢者能之也。狎如論語雖狎必變之狎。習也。衆人狎則不敬矣。釋曰。鄭注以爲敬賢者似矣。然賢者而謂之狎乎。論語云。狎大人。此小人之非禮也。今自畏而愛之而下五者之文。以朱子說參鄭義焉。可也。其所言愛憎不可誣者。賢者則不誣矣。其所言當能散當能遷者。賢者則皆能矣。鄭注刪可字當字。則叶經文也。昭二十六年左傳云。在禮家施不及國。此齊晏子言陳氏之厚施也。若宋樂氏者。貸而不書。國施而家助之。豈違禮乎。襄二十九年左傳可攷也。孔疏引熊氏說而不辯。失之矣。孔於此傳亦剝竄其文之甚也。

鄭下文注引咎犯者。咎古通舅也。經下文云。很毋求勝。分毋求多。鄭注云。爲傷平也。鄭合言之。蓋很則宜平其爭。分則宜平其取也。孔疏略焉。

若夫坐如尸。

夫音乎。

謹案若夫者更端之辭。

更平聲。

釋曰。鄭釋若夫云。言若欲爲丈夫也。失之矣。大戴禮曾子事父母篇云。孝子唯巧變。故父母安之。若夫坐如尸。立如齊。此成人之善者也。未得爲人子之道也。劉氏敞云。記者取此禮。失刪若夫之文。朱子稱焉。由今攷之。此非失刪也。蓋變所屬文爾。孟子云。若夫潤澤之。則在君與子矣。此轉下而言者。孝經云。若夫慈愛恭敬。安親揚名。則聞命矣。此

承上而言者。皆更端之辭。其變文可推也。苟此經無若夫之文。則辭氣蹙矣。其下夫禮者之文。亦無由起也。鄭下文注於祭時言磬且聽者。孔疏以祝闔戶時言之。蓋祭義所謂出戶而聽也。孔疏言磬之折殺者。此算瀟句股求弦也。殺去聲。句音鉤。

禮從宜。

謹案宜者義之宜也。陳氏祥道曰。禮運稱禮可以義起。從宜之謂也。

釋曰。鄭注以軍禮言之。蓋舉隅也。或曰。初學記政治部引作使從宜。禮從俗。非也。雖有禮俗。而概曰禮從俗。可乎。其禮儀部引與今本同。

使從俗。

謹案俗謂禮俗也。經曰。入國而問俗。此非必禮俗矣。經曰。君子行禮不求變俗。言遷於異國者從其禮俗也。而使於異國者可推矣。朱子曰。若魏李彪以吉服弔齊。齊裴昭明以凶服弔魏。蓋得此義焉。

釋曰。鄭注非也。由鄭言之。使禮之物。從土所出也。而謂之從俗所出乎。魏齊者。南北朝也。魏北方俗。齊南方俗。經下文云。夫禮者。所以定親疏。決嫌疑。別同異。明是非也。此十八字而一句焉。一句中則四讀爾。蓋微讀其中而未絕也。讀音逗。

不辭費。

謹案費猶多也。朱子曰。辭達則不貴多。

釋曰。傷信者辭虛也。非辭費也。鄭注於文未洽也。凡用之多者曰費。今恆言猶是也。

禮聞取於人。不聞取人。禮聞來學。不聞往教。

謹案朱子曰。取於人者爲人所取法也。取人者人不來而我引取之也。孟子言治人。治於人。食人。食於人。亦類此焉。禮有取於人。所以彼有來學。禮無取人。所以我無往教。易

曰。童蒙求我。匪我求童蒙。

食音嗣

釋曰。鄭以取人與往教者分言之。非也。中庸云。取人以身。豈謂取人者爲制服乎。

道德仁義。非禮不成。

謹案中庸言五達道三達德而皆行仁義焉故曰仁者人也親親爲大義者宜也尊賢爲大親親之殺尊賢之等禮所生也蓋禮由生而成矣殺去聲

釋曰義古通誼於文從宜此古訓也孔疏於下文言宦學分事者非也大戴禮虞戴德篇云官之敎士豈分事乎詳論語集注述疏子適衛章

是以君子恭敬樽節退讓以明禮

謹案君子者上下尊美之通稱君則言其能統所羣而尊之也子則言其不負所生而美之也恭者敬之發於外也鄭氏曰樽猶趨也禮說曰趨讀若促管子曰節飲食樽衣服今言凡禮皆樽促而節約也退讓者謙退而辭讓也

釋曰。白虎通云。君之爲言羣也。子者丈夫之通稱也。今資之矣。孔疏讀趨如字。非也。擗文從手從尊。凡奉手尊人者。必自促焉。引管子者五輔篇文。書堯典首曰欽。釋詁云。欽敬也。此貫內外者焉。堯典言欽又言恭。自內及外也。今經言恭敬。自外知內也。孔疏云。貌多心少爲恭。心多貌少爲敬。其以多少言之。非也。孔疏引書云。接下思恭。此僞大甲襲孟子爲之也。孟子言恭者。則云禮下。謂君子之居上者焉。孔疏引王肅釋君子云。君上位。子下民。此失通稱之義矣。互詳學記篇。

不離禽獸。

謹案陸氏德明曰。禽獸。盧本作走獸。

釋曰。此經爲對文。盧植本善矣。孔疏云。鳥不可曰獸。非也。禮說云。攷工記曰。天下之大獸五。脂者膏者。羸者羽者。鱗者。蓋羽者鳥也。而統稱獸焉。經下文云。是故聖人作爲禮以教人。以一句讀也。釋言云。作爲也。今經用重文。與樂記言聖人作爲者。句例皆同。

大上貴德。其次務施報。

施如字平聲

謹案大上者。若易言上古也。其次者。若易言後世聖人也。易溯包犧神農黃帝堯舜者。皆自其次而遞及之矣。德若詩無德不報之德。貴德者。施而不期報也。務施報者。雖其施而不期報。而禮不可無以報其施也。易曰。通其變。使民不倦。故禮以施報爲務焉。

釋曰。鄭注言帝皇及三王之世者。非有徵也。孔疏申鄭者。則惑於緯文及老子矣。何其妄乎。夫書始堯典。易繫辭傳。則略溯包犧氏焉。慎哉。堯典修五禮。賓禮章矣。孟子言堯之友舜者。則云迭爲賓主。其施報往來可明也。鄭注云。三王之世。禮始興焉。失之矣。孔疏云。三王之世。貨力爲己。施則望報。以爲恆事。故其禮主尙往來。非也。樂記云。禮也者。理之不可易者也。蓋施報往來。其理當然也。故其情由是而安。聖人制禮。豈以施者望報。而後制斯禮哉。其未制禮之初。則有其理而未行爾。江氏永辯孔疏而節取焉。於義未悉也。施釋文讀去聲。惟古義四聲皆通也。今讀平聲。易明。且聲成文也。引易者。繫辭傳文。

雖負販者必有尊也。

謹案詩曰。載輪爾載。將伯助子。此有尊之類也。將音

釋曰。此以申鄭義也。引詩者。正月文。上載鄭箋訓則。語辭也。下載謂車所載也。鄭箋云。輪墮也。詩疏以墮敗言之。毛傳云。將請伯長也。詩疏云。此以商車爲喻。是也。蓋車敗請助。呼伯者尊之之辭。墮許規反。

五十曰艾。

謹案陸氏德明曰。艾治也。禮說曰。時可治人也。

釋曰。鄭注云。艾老也。與下文七十曰老者。滑矣。朱子云。艾養也。從釋詁義也。今從陸氏者。時可治人。則服官政矣。於文尤洽也。艾治。詩小旻毛傳義也。經上文云。人生十年曰

幼學。此從幼絕句焉。學一字句也。下倣此。蓋朱子從陸氏
佃說也。經云而仕。又云而傳。二字句也。此而之爲文。特轉
言乎人生動靜之大者也。論語孔子敘吾十有五而迄七
十者。豈可以例人人乎。孔疏依之爲年例。非也。

六十曰耆。

謹案耆長也。

長丁丈反

釋曰。耆長。釋詁文。鄭孔遺之爾。經下文云。七十曰老。公羊
傳徐疏引老作耆。後漢書李注同。或曰。此古本也。射義云。
耆耄好禮。又云。旄期稱道不亂其序。與此同。旄古通耄也。
今攷耄之爲文。鄭注可無釋乎。且下文七十稱老夫。則耄
蓋異文爾。

百年曰期。

期音基

謹案期與朞通。一年已周曰期。堯典所謂朞也。今言期者。朱子謂百年已周也。

釋曰。鄭注云。期猶要也。鄭讀期如字。以期頤連讀焉。則經文不一例也。鄭釋頤者是矣。注文要盡之要。刪焉可也。

越國而問焉。必告之以其制。

謹案越踰也。其謂老大夫也。制猶大戴禮曾子制言之制。謂言之法度也。蓋答踰國之問者。宜有正變經權。非老賢不知也。故己國謀於老大夫。所答來問者。必告之以其老大夫制言。明乎重老賢也。晉文公之季年。諸侯朝晉。衛成公不朝。使孔達侵鄭。晉襄公在喪而伐衛。衛使告于陳。陳

共公以更伐晉告之。是報伐盟主而欲以強免也。衛從其謀。孔達伐晉。其後晉以討衛故會諸侯。陳侯爲衛請平。卒不得免。乃執孔達以說。而左傳言衛謀者曰。君子以爲古。古者越國而謀。蓋其時惜陳無老大夫制言以告之。而衛乃失謀也。

更去聲爲衛之爲于僞反

釋曰。此以申鄭義也。孔疏申鄭者。以爲老賢必告之以其國之制也。如其說。則賢者正告皆必然矣。何爲於老賢而獨必然乎。故張子不從鄭焉。由疏說失之也。言衛謀者。据左傳文元年及二年也。鄭下文注言曾子謝不敏者。据孝經首章也。

冬溫而夏清。

謹案禮說曰。溫煖其體也。清涼其居處也。處上聲

釋曰。鄭下文注云。定安其牀衽也。注文從定一讀。釋爲安。或作安定。非也。經下文云。在醜夷不爭。以校孝經多夷字焉。蓋夷儕平等。在醜衆之中。尤易爭也。孔疏引角里先生。角古音祿。詩麟之角。非與族韻乎。

夫爲人子者。三賜不及車馬。

謹案三賜者。君恩之重也。易曰。王三錫命。蓋三賜當及車馬矣。故以不及爲美稱焉。不及者。辭而不受。如不獲辭。則受而不用也。魯叔孫豹聘於王。王賜之路。豹爲介卿。以冢卿無路。雖受賜而不敢用。蓋左傳言之矣。朱子以借推乎孝子也。

釋曰。鄭惟以不受言之。於義未悉也。江氏据鄭而謂記者言未及權。非也。言賜路者。据昭四年左傳也。路與輅通。杜注云。冢卿謂季孫介次也。坊記云。父母在。饋獻不及車馬。其不及者。謂重而不與也。蓋義各不同。萬氏斯大諛則同焉。非也。引易者。師九二象文。釋詁云。錫賜也。恆言不稱老。

謹案禮說曰。爲感動親老也。凡常言之閒。汎稱自稱皆避焉。爲去聲

釋曰。鄭云。廣敬。此於義未析也。黃氏榦云。常言須避。是矣。此汎稱也。而不取孔疏或云自稱之說。非也。夫不有如老萊子。行年七十而養二親者乎。

父母存。不許友以死。

謹案或曰。然則父母沒有可爲友報仇讎者乎。蓋此非戰國游俠之爲也。夫所謂友者。執友也。朋友之篤。非交遊也。人有殺吾友而不義者。此所謂朋友之讎也。經曰。父之讎弗與共戴天。兄弟之讎不反兵。朋友之讎不同國。言其不同國則已。苟其同國。則當殺之。將爲朋友之讎而死焉。父母沒者有然也。朋友所以列人倫而五也。大戴禮曾子制言曰。朋友之讎不與聚鄉。蓋國別爲鄉。此微不同。其大義則同也。

爲友讀爲去聲。俠音狹。

釋曰。此以申鄭義也。史記有游俠傳。詩常棣云。脊令在原。兄弟急難。每有良朋。况也永歎。呂氏大臨以辯此經。豈叶

乎。彼急難也。非讎殺也。讎殺者。友既死而無能爲也。朋友之讎。不作交遊。据鄭所見異本也。蓋與大戴禮言朋友之讎者略同。江氏云。許友以死者。蓋冒險如李篤之匿張儉也。此不從鄭義焉。今以後漢書攷之。張儉疾惡已甚。黨禍起。不自赴獄。乃亡命而望門投止乎。非中庸之道也。若夫後漢書言何容及邳惲爲友報父讎者。亦豈此經所謂許友者乎。斯賢者過之云爾。周官調人云。凡和難。父之讎辟諸海外。兄弟之讎辟諸千里之外。從父兄弟之讎不同國。君之讎眡父。師長之讎眡兄弟。主友之讎眡從父兄弟。此謂過而殺傷人者也。故可和其難而辟焉。蓋與讎殺者不同。難讀去聲。辟與避通。眡與視通。

負劍辟呬詔之。則掩口而對。

謹案禮說曰。長者在童子後。俯與之語。則童子若負劍然。辟偏也。何氏休曰。口耳之間曰呬。是也。此偏就童子俯與之語也。詔告也。長者或俯後。或偏就而告之。則教童子掩口而對。鄭氏曰。習其鄉尊者。屏氣也。鄉去聲。屏音迸。

釋曰。鄭注云。負。謂置之於背。劍。謂挾之於旁。禮說謂若此。則豈童子能對者乎。江氏云。劍長。則背負而俯拔之。若史記荆軻傳言王負劍也。或曰。辟呬者。劍阻其旁矣。故背負焉。然劍豈常佩者邪。鄭釋辟呬者是矣。於文未洽也。

戶外有二屨。言聞則入。言不聞則不入。聞如字。

謹案二屨者。二人之屨也。古者席地而坐。故戶外脫屨焉。

言不聞者。或密謀也。如是則不入焉。慮嫌疑也。戴氏溪曰。嫌疑者。禍之階也。禮所以別嫌疑而免於人道之患。是也。蓋鄭氏於此言不干掩人之私者。如推其變而言之。不可謂非免患矣。

釋曰。戴氏說亦申鄭注焉。或疑爲太過者。未推其變也。易繫辭傳云。不出戶庭。无咎。子曰。亂之所生也。則言語以爲階。君不密則失臣。臣不密則失身。幾事不密則害成。是以君子慎密而不出也。蓋於言語而慎其所階。易自不出者。慎之。禮自不入者。慎之。其理同也。幾讀平聲。經上文云。將適舍。求毋固。鄭注云。固猶常也。鄭意彼以爲常有。則求之者固矣。鄭非直訓固爲常。故曰。固猶常也。鄭引周官詔地。

求者。既以其類言之。孔疏自明也。或議鄭焉。非也。

父子不同席。

謹案表記曰。父子不同位。以厚敬也。夫席之位有上下不同。則異尊卑也。此自男子言之。其不同位者。豈必不同席乎。今日父子不同席。此承上文已嫁而反者之言。女子子也。蓋女子自父言之。則爲女子子。斯父子也。故曰父子不同席。若夫姪之於姑。猶從子之於從父。其不同席明矣。故經不言而可該也。從去聲

釋曰。鄭注云。異尊卑也。則父之於女子子。亦該其中矣。惟以父子統言之。則經上文已嫁而反者之言。女子子也。豈相應乎。孔疏謂姪及父尊卑禮殊。孔以爲其禮固不同席。

矣。惟疏統言之曰不嫌也。豈非辭不達意邪。顧氏炎武以爲經專言兄弟弗與同席。而比況其姑及女子子者。亦遺乎經此文言父子也。陳氏櫟云。父於女子子已嫁而反。亦不同席。今人單舉此句。施之父子同筵者。非矣。經下文云。貧者不以貨財爲禮。鄭注云。禮許儉。不非無也。鄭意謂不非責無財者也。孔疏略焉。經下文載青旌諸載字。釋文音戴。本亦作戴。胡氏銓據詩載旆。讀載如字。皆通也。急繕其怒。鄭注。繕讀曰勁。今攷周官繕人。鄭注云。繕之言勁也。善也。則繕讀如字可矣。日而行事。則必踐之。鄭注。踐讀曰善。釋文踐王如字。今從王肅讀焉。謂踐其日也。

介者不拜。爲其拜而夔拜。

爲去聲。夔子臥反。

謹案介者謂甲士也。左傳孔疏引鄭注云。夔則失容節。夔猶竿也。釋文。夔盧本作蹲。今攷公羊河注言師中揖而不拜者曰。爲其拜如蹲。蓋與盧本同。如古通而蹲古文作踞。斯與夔形近而異文也。然其義通矣。左傳有蹲甲之稱。蓋蹲則聚以相迫而竿焉。故左傳疏申鄭說曰。慮其竿甲折是也。其拜而夔拜如此則失容節。故爲此不拜爾。少儀曰。介者不拜。鄭釋之曰。軍中之拜。肅拜。蓋不拜者謂不稽首拜也。肅拜者周官大祝注所謂但俯下手也。竿側格反蹲音存大與太

通

釋曰。曲禮孔疏本竿作詐。孔云。形儀不足似詐也。此沿誤而爲之說爾。釋文誤同。史記貨殖傳注。蹲古作踞。引左傳

者見成十六年。其傳敘卻至云。閒蒙甲冑。不敢拜命。遂云。敢肅使者。國語敘此者。亦云。敢三肅之。韋注云。肅拜下手至地。其言下手者。與周官大祝鄭司農注同。其言至地者。非介甲所宜也。段氏謂此肅而非拜者。失之矣。說文云。拜從兩手下。此引揚雄說也。則肅而下手揖者。非拜歟。史記敘周亞夫軍中見漢文帝者。則云。將軍亞夫持兵揖曰。介冑之士不拜。請以軍禮見。其義也。鄭釋爲其拜者。釋文讀爲于僞反。郊特牲云。迎貓爲其食田鼠也。其例也。朱子讀爲如字。其說云。夔猶言有所枝拄。不利屈伸也。禮說申之云。夔拜卽肅拜也。然夔而可稱禮之肅乎。經下文云。國中以策彗。卽勿驅塵不出軌。鄭釋卽勿爲搔摩者。其爲文猶

韓詩邶風言密勿也。吳氏澄讀曰勿驅非也。詩邶風云載馳載驅。又云驅馬悠悠。說文云走馬謂之馳。策馬謂之驅。詩齊風云載驅薄薄。毛傳云薄薄疾驅聲也。今經既曰入國不馳。其爲文可。又曰勿驅乎。言卽勿驅者。孔疏謂不欲令疾也。

大夫士去國踰竟。

竟古通境

謹案經下文曰三諫而不聽則逃之。逃者去也。表記曰事君三違而不出竟。則利祿也。今日踰竟者。謂出竟焉。曲禮疏曰。案大戴禮王度記云。大夫俟放於郊。三年得環乃還。得玦乃去。此得玦後也。若士不待放焉。

玦音決

釋曰。孔疏引王度記者。今大戴禮已亡其篇矣。大戴禮逸

文今可見者無多。若此言俟放者。則古禮幸存焉。其義可與公羊傳相參也。詳表記篇。王氏安石云。三年待放。恐無此禮。孔子屢仕屢去。豈常待放乎。蓋未察於孔疏。謂此三諫不從。出在竟上者也。夫待放者。非冀其君庶幾改之歟。孔子去魯。以魯受女樂而三日不朝。無可爲諫。故膳肉不至。則遂行。豈可以待放之禮言邪。其他去齊去衛。皆非由諫者也。且君子去國。不一端矣。孟子云。諫行言聽。膏澤下於民。有故而去。則君使人導之出疆。又先於其所往。去三年不反。然後收其田里。此又異乎待放云也。

大夫祭五祀

謹案鄭釋五祀者。據月令言之也。然月令本出於周書。豈

殷制乎。祭法宋之國語云爾。未可執也。士喪禮言疾病者曰。乃行禱于五祀。此士禮以事而行禱焉。非若大夫之常祭也。

釋曰。周書月令篇第五十三。呂氏春秋十二紀襲周書焉。今周書雖亡。禮記月令實周書之遺也。詳論語答問子路篇子適衛章旁及春秋左傳虞不臘說。

支子不祭。祭必告於宗子。

謹案禮說曰。支子庶子也。曾子問曰。宗子爲士。庶子爲大夫。其祭也如之何。孔子曰。以上牲祭於宗子之家。祝曰。孝子某爲介子某。薦其常事。若宗子有罪。居於他國。庶子爲大夫。其祭也。祝曰。孝子某。使介子某。執其常事。蓋支子祭

必告於宗子者若斯也。

爲介子讀
爲去聲

釋曰。曾子問鄭注云。介。副也。不言庶。使若可以祭然。孔疏云。孝子謂宗子也。某宗子之名。介子。謂庶子爲大夫者。某庶子名也。經下文言羹獻者。猶內則言犬羹也。言薌其者。梁之薌莖亦香也。鄭注失之。

檀弓

不爲伋也妻者。是不爲白也母。

謹案中庸曰。禮儀三百。威儀三千。此子思言聖人之道也。道者禮所生也。故中庸於此言君子崇禮焉。今以子思門人敘坊記表記緇衣者參之。則子思之於禮也深矣。且與門人習之矣。禮喪服杖期章曰。出妻之子爲母。蓋爲出母。

期也。據禮之文。雖出母乎。豈不爲母乎。而乃曰不爲伋也。妻者是不爲白也。母乎。如曰。服出母者。謂其出而亦在父室者也。若出而再適者。則無服。今記稱子思之言。隱以再適言矣。然果其再適也。門人敢不先察之。而遽問不喪出母乎。此記者傳聞之誣也。夫誣則出妻不亦誣哉。子思學於曾子者也。僞家語襲白虎通者。則言曾子以梨烝不熟而出其妻。斯誣矣。漢書王吉傳注引韓詩外傳曰。曾參喪妻。不更娶。人問其故。曾子曰。以華元善人也。何其誣喪妻爲出妻乎。今誣子上之母者。非猶誣華元之母乎。

期音基子爲母

讀爲去聲喪妻讀喪去聲

釋曰。孔疏云。先君子謂孔子。伯魚之母被出死。期而猶哭。

是喪出母也。非也。夫記文雖誣其言先君子者亦汎言之爾。而孔疏乃自誣而斥言之邪。如其說何以孔氏不從聖祖而反從其失者邪。辯詳下文。江氏永据甘氏說云。此殆指夫子之於施氏而言。叔梁紇娶施氏生九女而無子。此所謂無子出者也。蓋孔子喪之亦非也。禮稱出妻之子爲母期。徐氏邈說明非所生則無服也。今謂孔子雖非所生而特隆焉。其敢廢祭邪。孔子孤子當室非爲父後邪。喪服小記云。爲父後者爲出母無服。無服也者。喪者不祭故也。或曰。出妻而亦在父室者。其有反夫家者歟。蓋有之矣。喪服小記云。婦當喪而出則除之。爲父母喪未練而出則三年。旣練而出則已。未練而反則期。旣練而反則遂之。斯出

而得反也。禮說云。練者期而小祥之服也。期周年也。記下文。言曾子寢疾病者云。曾元曾申坐於足。大戴禮申作華。蓋異文也。韓詩外傳與大戴禮同。杭氏世駿本魏氏說。以爲檀弓曾子門人。杭氏乃謂曾子有出妻一事。安知其不附會孔氏出妻以崇其師乎。此欲辯孔氏之誣而竟誣檀弓矣。檀弓名篇。以其在篇首而然。魏氏說亦無徵文也。記下文云。殯於五父之衢。此孔子殯其母於故宅也。猶左傳言晉文公殯于曲沃也。詳論語答問序說。

伯魚之母死。期而猶哭。

期同葬

謹案喪服齊衰三年章曰。父卒則爲母。喪服杖期章曰。父在爲母。傳曰。何以期也。屈也。至尊在。不敢伸其私尊也。今

伯魚父在爲母期。賢者過之。期而猶哭。故孔子抑之。

齊音谷衰

七雷反

釋曰。孔疏云。時伯魚母出。此疏以爲先君子喪出母之事也。是自誣也。記文於此不言其母出。鄭注亦不言。而孔疏乃言而自誣也。禮家則合以記文所言子思之母子上之母者。遂爲孔氏三世出妻之誣。可不辯哉。

子思之哭嫂也爲位。

謹案皇氏侃以爲原憲字子思是也。此承上文皆曾子之言。若子思爲孔子之孫。則學於曾子矣。曾子當呼其名。故記下文稱曾子。謂子思曰。伋吾執親之喪也。水漿不入於口者七日。

釋曰。孔疏於下文引鄭志云。張逸問舊儒世本皆以孔子後數世皆一子。禮適子爲父後。爲嫁母無服。檀弓說子思從於嫁母服何。鄭答云。子思哭嫂。必非適子。或者兄若早死無繼。故云數世皆一子。此鄭之未察也。舊儒若史記亦云然。豈皆失乎。記下文言仲憲言於曾子者。鄭注云。仲憲孔子弟子原憲。孔疏云。案仲尼弟子傳。原憲字子思。蓋申鄭焉。惟憲名也。古無加仲於名者。禮說云。或仲氏而名憲歟。鄭以爲原憲一人。非也。然則鄭言子思哭嫂不以爲原子思。奚可執乎。論語之例。朋友皆以字稱。故曾子曰。堂堂乎張也。記下文言子夏喪明者。乃稱曾子。怒曰。商女何無罪也。斯其誣乎。或疑呼商名與呼偁名無異也。非也。記文

雖誣固別之以怒矣。詳論語集注述疏死生有命章。曾子以執親之喪告子思者。此師弟閒言往事云爾。鄭注云。言已以疾時禮之不如。非也。孔疏乃以誇已申之邪。

子思曰。吾何慎哉。

謹案中庸曰。君子戒慎乎其所不睹。則所睹者之慎可知也。蓋君子無所不慎焉。今於其母之喪。而曰吾何慎哉。是豈子思之言乎。夫君子酌乎禮之行弗行。卽君子之慎也。而乃以吾何慎爲言乎。其誣也。其窒也。孟子稱子思居於衛矣。今日子思之母死於衛。柳若謂子思曰。子聖人之後也。四方於子乎觀禮。子蓋慎諸。如柳若言。必不爲嫁母言也。嫁母之死。何禮之可觀。蓋誣者不思柳若言。而妄爲之。

答爾說詳下文。

釋曰。鄭注云。柳若衛人也。見子思欲爲嫁母服。恐其失禮。戒之。嫁母齊衰期。孔疏云。嫁母之服。喪服無文。案喪服杖期章云。父卒。繼母嫁。從爲之服。則親母可知。故鄭約云齊衰期也。非也。夫繼母嫁。其從者爲之服。不從。則無服。王肅讀曰從。一字句也。斯叶矣。鄭讀從爲之服絕句。孔疏因之。而以推嫁母之服。豈禮之本義乎。記下文言尼父者。字也。非諡也。鄭注失之。詳論語集注述疏仲尼焉學章。

子思哭於廟。

謹案禮稱出妻之子爲母期。而喪服於嫁母無文。蓋母嫁則自絕於其子矣。故聖人不爲制服。其母嫁而子從。則出

母服可推焉。禮曰：出妻之子爲父後者，則爲出母無服。傳曰：與尊者爲一體，不敢服其私親也。若子思者，其爲父後者乎？爲出母無服，而嫁母尤可知也。出母嫁母，皆與廟絕，以深於禮之子思，其別之有素矣。今謂嫁庶氏之母死，子思哭於孔氏之廟，門人且知其非，而子思不別也。此記者傳聞之誣也。夫誣則母嫁不亦誣哉？伯魚受孔子之教學，詩而爲周南召南者也。子思作中庸而能孝事者也。何由而其家人若斯也？伯魚之卒，史記謂年五十矣。其未卒出之而嫁歟？其既卒而嫁歟？何以記者皆不言之也？明其爲傳聞之誣也。孟子時好事者之言曰：孔子於衛主癰疽，於齊主侍人瘠環，彼誣者竟有然矣。爲母讀爲去聲，爲出母同。

釋曰。鄭釋子思之母云。嫁母也。姓庶氏。惟姓庶氏之母。無以見其爲嫁母也。此於記文不相應焉。禮說謂嫁庶氏。記文之意然也。晉書禮志。太康元年。尙書八座引記文曰。庶氏之女。蓋不作庶氏之母。其說以子思哭出母言之。蓋出而不嫁。亦在父室。故可曰姓庶氏之女。然此非鄭所傳之古本也。如鄭本作庶氏之女。則鄭必不釋之爲嫁母矣。記下文言入廢修容者皆宜也。詳孝經集注述疏後答問容止可觀說。

曾子問

壻弗取而后嫁之禮也。

取與要通

謹案壻弗取者。餘哀未忘也。嫁之者。嫁喪畢之壻也。女家

以壻喪弗敢嫁。今喪畢宜嫁也。其曰而后嫁之。不曰而后取之。以其由女家請於壻故也。此所以爲禮也。爾雅釋親女子子之夫爲壻。昏禮由親迎而成壻之稱。此未親迎而成壻之稱者。禮之權也。蓋壻之稱旣成。則無嫁之他人者矣。其不別取亦互明矣。迎去聲

釋曰。鄭注孔疏皆失之。詳論語答問子路篇子適衛章旁及禮說。

夫死亦如之。

謹案禮於此之言夫也。未親迎而成其稱曰夫。則貞女爲夫而守者禮也。

釋曰。辯貞女議者。詳論語答問。

禮運

謹案禮運者言天地古今皆禮之運行也。夏書曰：天子之德廣運乃神。其禮運之意歟。禮運子游所作。故自稱其名曰：言偃在側。曰：言偃復問。此與仲尼燕居篇稱言游者不同。禮運蓋因問而於禮言之長也。以子游請夫子之極言禮也。

釋曰：孔疏引鄭目錄云：名禮運者。以其記五帝三王相變易陰陽轉運之道。蓋鄭自世運氣運而言之也。是矣。然經於帝王言古也。不於孔子言今乎。經言禮者曰：分而爲天地。轉而爲陰陽。變而爲四時。列而爲鬼神。則不惟言陰陽轉運矣。曰陰陽。曰四時。曰鬼神。皆天地統之焉。夏書者呂

氏春秋論大篇所引文也。論語之例。門人記之稱子。朋友記之稱字。自記者稱名。蓋禮記亦然也。今所爲鄭注補正者。始爲之於禮運篇。此篇之藁。合論語說旁及者而觀之。若苟完矣。

喟然而嘆。仲尼之嘆。蓋嘆魯也。

謹案喟然。太息聲也。左傳曰。周禮盡在魯矣。又曰。魯不棄周禮。未可動也。論語曰。魯一變。至於道。今以蜡禮因而感嘆也。

釋曰。鄭注言魯祭禮有不備者。非也。鄭於下文以魯非禮爲失禮焉。故其說云爾。下文孔子言有志者。特言周公。且曰。吾舍魯何適矣。其非思周禮而嘆魯者乎。說文云。喟。太

息也。引左傳者。昭二年及閔元年文。

故謀用是作而兵由此起。

謹案禮說曰。此當在經文貨力爲己之下。大人世及以爲禮之上。經文以功爲己。當連禹湯云云也。

釋曰。此錯簡也。鄭注失之。孔疏亦未察之。其說詳論語集注述疏子適衛章。經自孔子曰大道之行也。至是謂小康。皆彼疏詳焉。今攷經下文曰夏道曰殷道曰周道。皆禮之道也。曰大端曰大順。皆禮之大也。蓋大道自禮而言也。或曰選賢與能。與及也。然豈對文乎。釋詁云界予也。予古通與。則與亦界也。鄭注云睦親也。惟曰脩親。帶矣。孝經云先王有至德要道以順天下。民用和睦。上下無怨。斯要道也。

卽大道也。其睦自全體言也。今言脩睦。猶書君奭言修和也。修與脩通。書多方云。爾室不睦。爾惟和哉。言所脩也。周官大司徒云。六行。孝友睦婣任恤。宣十二年左傳云。卒乘輯睦。其睦皆自一端言也。或曰。二帝時而引孝經先王以言之。何也。蓋經下文稱上古爲先王矣。魯語以先王制明堯制焉。孔疏言不獨子者。則廢朱均而禪舜禹也。夫禪則天下爲公矣。然朱曰。丹朱。均曰。商均。皆封國焉。是子其子也。乃以此爲不獨子乎。堯典云。百姓如喪考妣。明乎堯能子之也。蓋不獨子其子也。孔疏云。案祭法有虞氏祖顓頊而宗堯。不以瞽叟爲祖宗。亦不獨親之義也。夫祭法采之魯語爾。而疏不辯之。乃以此爲不獨親乎。奚不据書稱舜

孝者而言親其親邪。孟子云。瞽瞍底豫而天下之爲父子者定。此之謂大孝。夫大孝者。大道之本也。以孝定天下。蓋不獨親其親也。張子西銘。則由禮運此經而明義焉。瞽亦作叟。鄭注云。隱猶去也。今攷釋詁云。隱微也。蓋道在而隱微也。論語云。天下有道則見。無道則隱。蓋身之見隱。以道之見隱而然也。鄭注云。由用也。然經言用亦言由。則複矣。說文云。以用也。則用亦以也。釋詁。由從義同。起者。若史記言大兵起也。非言作兵之始也。孔疏。溯黃帝與蚩尤戰者。言之非也。孔疏云。父子曰世。兄弟曰及。以此爲禮也。然五帝行德。不以爲禮。三王行爲禮之禮。故五帝不言禮。而三王云以爲禮也。非也。莊三十二年公羊傳云。魯一生一及。

何休云。父死子繼曰生。兄死弟繼曰及。今禮言世及者。以親之傳子而言也。非所謂一生一及也。且兄弟相繼。不亦世及乎。魯僖公者。閔公庶兄也。閔公爲君。僖公臣焉。僖公繼閔公。則如子矣。僖元年公羊傳云。此非子也。其稱子何。臣子一例也。故史記殷本紀於兄弟相及者。皆以世言也。若夫古之五帝。自堯舜以前。天子世及。攷史記有然矣。蓋古禮然也。禹貢云。錫土姓。則諸侯世及之禮可推也。禹貢在堯老舜攝時也。老子云。上德無爲而無以爲。下德爲之而有以爲。又云。上禮爲之而莫應。此疏說所由也。經言城郭溝池者。鄭注云。亂賊繁多。爲此以服之。而於經下文言藏身之固者。遂注云。政之行如此。何用城郭溝池之爲。由

鄭言之易。坎彖傳所謂王公設險以守其國者。何邪。亦誤於大道無爲之說也。詩械模鄭箋云。理之爲紀。則紀者理也。攷工記梓人有以功之文。可旁通矣。詩文王毛傳云。刑法也。釋詁。刑則法義同。鄭注云。刑猶則也。孔疏云。民有仁者。用禮賞之以爲則也。孔疏以賞而言。此於經病添文也。凡五常之道。自五行也。經言五行者曰。還相爲本也。五常亦然也。蓋論語言爲仁。而四德統焉。大學言忠信。而明德統焉。孟子言取義。而本心統焉。孟子言智巧。而聖德統焉。今經言脩禮。而常德統焉。皆還相爲本也。經文錯簡。實由此經上下皆有爲己之文。而誤焉。非誣也。乃好異者妄參錯其文。而顛倒之。競爲異說。不徒亂乎。且鄭注所失。後儒

議之。何又援家語而疑小戴之竄經邪。家語敘此者。自禮義以爲紀。至兵由此起。其文皆無之。自以著其義。至是謂小康。其文亦無之。而有云。禮之所興。與天地並。如有不由禮而在位者。則以爲殃。其文與下文言禮之急者接焉。由今攷之。此王肅僞家語而異鄭爾。經下文接之云。夫禮先王以承天之道。以治人之情。又云。是故夫禮必本於天。殽於地。如家語文。則先後不繁複乎。且經下文云。是故夫禮必本於天。一。分而爲天地。則禮豈惟與天地並乎。昭二十六年左傳云。禮之可以爲國也久矣。與天地並。此晏子之言云爾。然則經文脫誤者明矣。小戴無所竄也。大戴禮五帝德篇言。宰我問黃帝者。則稱孔子曰。禹湯文武成王周

公可勝觀邪。夫黃帝尙矣。汝何以爲。此豈不足見孔子於黃帝與六君子何如哉。

殺於地。

謹案殺之言效也。

釋曰。易繫辭傳云。交也者。效此者也。蓋以諧聲爲訓焉。今釋殺例同。釋文。殺戶敎反。徐戶交反。

我欲觀夏道。是故之杞。而不足徵也。

謹案觀。謂觀於古也。朱子曰。徵證也。

釋曰。大戴禮小辯篇云。爾雅以觀於古。蓋攷之也。若尙書大傳言書之七觀。亦攷古焉。論語言杞宋不足徵者。則云文獻不足。故也。足。則吾能徵之矣。蓋徵者證也。鄭注云。觀

其所成。又云。徵成也。無賢君。不足與成也。由鄭言之。此無以觀其所成矣。經下文安得又言吾以是觀之乎。

坤乾之義。夏時之等。吾以是觀之。

謹案。殷易首坤。斯周易所謂坤以藏之者。殆歸藏通義歟。周易曰。觀其會通。以行其典禮。殷易當近之矣。等者。夏小正四時行政有其等也。若堯典於授時言平秩也。以是觀之者。若韓宣子觀易象。魯春秋而知周禮也。

釋曰。殷易坤乾。今亡矣。夏小正。今大戴禮猶存也。夏小正傳云。南門者星也。歲再見壹正。蓋大正所取法也。或曰。據此。當有夏大正。若周語所稱夏令也。昭二年左傳云。晉侯使韓宣子來聘。觀書於大史氏。見易象與魯春秋。曰。周禮

盡在魯矣。吾乃今知周公之德與周之所以王也。經下文言蕢桴者。或曰。蕢草也。今攷釋草云。蕢赤莧。此不可爲桴也。如以蕢通蒯。亦破字焉。或曰。土鼓者缶也。易稱鼓缶。則缶桴可矣。

昔者先王未有宮室。

謹案此言上古而曰先王者。統稱之辭也。猶易稱古者包

犧氏之王天下也。

王天下讀王去聲

釋曰。引易者。繫辭傳文。包犧者。伏羲也。伏古音逼。蓋聲轉而文異爾。黃氏震云。經原古始。以明聖人制禮之功。蓋易取十三卦之意。是也。經下文云。未有麻絲。衣其羽皮。唐石經同。御覽引作絲麻。或謂古音麻與皮韻也。然此經文豈

皆韻乎。

孔子曰。嗚呼。哀哉。我觀周道。幽厲傷之。吾舍魯何適矣。魯之郊禘。非禮也。周公其衰矣。

謹案此於極言禮闕而有嘆魯之辭。故特加孔子曰以敘其情。蓋與篇首嘆魯者不同而同。呂氏春秋曰。魯惠公使宰讓如周。請郊禘禮。王使史角止之。此以見成王無賜魯之郊禘焉。祭統曰。昔者周公既沒。成王。康王追念周公之所以勳勞者。而欲尊魯。故賜之以重祭。蓋傳聞之辭。將成王邪。將康王邪。實無其賜也。明堂位以爲成王賜者。誣也。春秋書郊自僖公。書禘自閔公。明其非禮也。魯頌言郊祀者曰。周公之孫。莊公之子。謂僖公也。以是爲頌。是不知魯

以諸侯而僭天子也。豈周公謹於禮者所安乎。此孔子所以嘆其衰也。故下文借杞宋以明之。

釋曰。或以此孔子曰。爲他日之言。今引證焉。誤也。其於下文極言禮者。曷爲接乎。魯之非禮。乃直告之。蓋師弟子問答之親。非他比也。鄭注云。非魯失也。魯之郊牛口傷。鰥鼠食其角。又有四卜郊不從。是周公之道衰矣。言子孫不能奉行興之。此鄭執明堂位而爲之說爾。夫失禮者宜有其禮而失之也。非禮者宜無其禮而行之也。奚不辯乎。鄭言郊牛卜郊者。皆春秋所書也。此書之而明其非禮也。豈書之而譏其失禮邪。尚書大傳云。魯郊所以禮周公也。皆誣矣。亦鄭說所由也。引魯頌者。詩闕宮文。孔疏於下文言時。

王命郊禹契者非也。辯詳論語答問禹吾無閒然矣章。

是謂大假。

假音格。

謹案假古通格。至也。蓋感而至之也。易之豐曰。王假之。尚大也。今言大假者。祭之大感至也。左傳言有德之君曰。其祝史薦信。無愧心矣。是以鬼神用饗。國受其福。明大假者。以祝嘏不敢改其常古之法度也。

釋曰。鄭注云。假亦大也。不敢改其常古之法度。是謂大大也。此於文未洽也。假大。釋詁文。鄭讀假上聲。今讀入聲。釋詁云。格至也。假猶格也。詩抑作格。雲漢作假。毛傳皆云至也。引易者。豐彖傳文。易馬注云。假大也。今見易釋文。馬義複矣。易王注。假訓至。今程傳同。引左傳者。昭二十年文。

祝嘏辭說藏於宗祝巫史非禮也。

謹案藏者有所納也。書言周公祭三王者曰。史乃冊祝。又曰。乃納冊于金縢之匱中。其言成王遭風雷之變也。遂曰。王與大夫盡弁。以啟金縢之書。明其非私藏之也。左傳言淫君者曰。其祝史薦信。是言罪也。其蓋失數美。是矯誣也。進退無辭。則虛以求媚。若是者。辭說之虛。乃私藏之矣。數上聲

釋曰。鄭注云。藏於宗祝巫史。言君不知有也。此於義未析也。引左傳者。昭二十年文。

醢。及尸君。非禮也。

謹案醢與殘通。明堂位曰。爵夏后氏以殘。殷以斮。蓋先王

之爵也。二王後用之。而魯僭焉。

釋曰。鄭注執明堂位而言魯禮者。非也。

冕弁兵革。藏於私家。非禮也。

謹案。冕弁者。章服也。彤弓之詩曰。受言藏之。蓋藏於君所而待有功也。冕弁亦然。左傳曰。晉侯請於王。以黻冕命士會將中軍。兵革者。戎器也。公羊傳曰。家不藏甲。若是者。而私藏之。鴻範所謂臣之有作福作威者也。將去聲

釋曰。鄭注云。冕弁君之尊服。此於義未析也。引左傳者。宣十六年文。引公羊傳者。定十二年文。

以衰裳入朝。與家僕雜居。齊齒。非禮也。是謂君與臣同國。

謹案。服問稱傳曰。君子不奪人之喪。亦不可奪喪也。今妄

奪焉。則臣以衰裳入朝矣。是家之喪。同國之喪也。齒列也。
論語曰。陪臣執國命。今大夫陵君而漸致焉。則臣與家僕
雜居齊齒矣。是家之臣。同國之臣也。經文上言昏而下略
者。昏異於喪也。尙書說禹娶辛壬癸甲。新昏而使之。其可
也。

釋曰。鄭注云。有喪昏不歸。唯君耳。注衍昏字。禮無君昏而
臣不歸者。鄭奚有不知此乎。鄭注當接云。臣有喪者。今本
者。譌作昏。孔疏不察之爾。臣喪且不歸。臣昏必不歸。故鄭
注先通之曰。臣有喪昏之事而不歸。讀者辯焉。禮說卿大
夫皆統曰士。鄭注言士者。卽仕於公之臣也。齒列。左傳說
義也。經上文云。三年之喪與新有昏者。期不使。以一句讀

也。其曰喪。曰期者。可微讀之。爾荀子大略篇云。父母之喪。三年不事。新有昏。暮不事。暮與期通。

備鬼神

謹案備者。陳物而敬接之也。經下文曰。山川所以備鬼神也。言山川之物可陳也。

釋曰。詩伐木云。備爾邊豆。毛傳云。備陳也。孔疏惟以接賓之敬而言。於義未悉也。經下文云。禮行於社。而百貨可極焉。其不言禮行於山川。何也。蓋社地道也。山川皆地道也。經上文云。降於山川之謂興作。明興作乎山川之物也。則百貨可極於山川矣。其禮行於山川。可知也。陳氏祥道云。不及山川者。以社言百貨可極兼之也。是也。斯孔疏不如

矣。中庸言地而及山水焉。其義也。

故政者君之所以藏身也。

謹案此承上文禮所以治政安君者言之。政可藏身。則君位不危而安矣。

釋曰。藏之爲言。無訓而明也。鄭注云。藏謂輝光於外而形體不見。若日月星辰之神。則迂矣。且日月星皆見其形。惟辰不見爾。

此聖人所以藏身之固也。

謹案經上文曰。城郭溝池以爲固。禮義以爲紀。蓋君有設險之固。苟無禮本於義者。以爲政紀。則雖有設險之固。而無政紀能守之。亦無以爲藏身之固矣。故聖人必謹於禮。

而治政焉。

釋曰。鄭注失之矣。說詳上文。

處其所存。禮之序也。玩其所樂。民之治也。

謹案存在也。聖人參於天地。並於鬼神。凡處其身心所在者。皆禮之秩序也。聖人禮以治政。凡玩其禮政所樂者。皆民之願治也。禮說稱易曰。君子所居而安者。易之序也。所樂而玩者。爻之辭也。其意與此同。

釋曰。鄭注云。存察也。從釋詁義也。然於此經則汎矣。釋詁又云。存存也。今轉注焉。鄭注云。治所以樂其事居也。今攷王制言樂事者。則云。民咸安其居。詩鴻鴈箋引書曰。民之有政有居。政者民之事也。此鄭義所由也。孔疏略焉。詩疏

禮記子思子言鄭注補正

卷四

解

畫

謂箋引書者今大誓文。

故天生時而地生財。人其父生而師教之。四者君以正用之。故君者立於無過之地也。

謹案天生時用其正者。若夏時所謂夏小正也。地生財用其正者。若易繫辭傳所謂理財正辭也。父生用其正者。若詩關雎序所謂正夫婦也。師教用其正者。若孟子所謂經正則庶民興也。論語曰。政者正也。君之治政於四者用其正。此其所以無過也。

釋曰。鄭注是矣。宜有申焉。釋文出鄭注曰。仁本亦作人。今據鄭引易以明此經言人者。當云何以守位曰人。其原文也。易義蓋本然。孔疏云。父不生子。又云。直欲令人君教之。

斯言窒矣。既生子。欲教之者。教誰邪。

故君者所明也。非明人者也。君者所養也。非養人者也。君者所事也。非事人者也。故君明人則有過。養人則不足。事人則失位。故百姓則君以自治也。養君以自安也。事君以自顯也。故禮達而分定。明皆讀爲則。養及分皆去聲。

謹案三明字當作則。以形近而譌也。据下文言則君者知一例焉。陳氏灝曰。明皆讀爲則。是也。鴻範曰。皇建其有極。此詩所以稱四方爲則也。言所則也。孟子曰。勞心者食於人。此檀弓所以稱左右就養有方也。言所養也。詩曰。以事一人。此經下文所以稱中國一人也。言所事也。此自尊君言之。蓋禮以下敬上之分宜然也。君而則人。則受諫而自

明有過矣。中庸言其則不遠者曰。君子以人治人。改而止。君而養人。則好賢而自知不足矣。易鼎象言聖人之養者曰。大亨以養聖賢。君而事人。則尊師而自謙失位矣。孟子言古之見賢者曰。事之云乎。易泰象言在上位而交下者曰。翩翩不富。皆失實也。此自君求無過言之。蓋禮以貴下賤之分宜然也。君爲百姓所則而則之。斯象則而其身以自治。君爲百姓所養而養之。斯供養而其心以自安。君爲百姓所事而事之。斯忠事而其名以自顯。此自君正言之。蓋禮以民奉君之分宜然也。經總承而結之曰。故禮達而分定。此以結上文。卽以起下文也。

講音微食音隔
亨音烹翩音篇

釋曰。鄭注云。明猶尊也。鄭自堯典言明明者推之也。鄭於

經下文言則君者。注云則當爲明。由鄭言之。君尊人則有過。如其尊賢也。柰何。或曰。三明明字。則君之則。皆如字。書說命云。明哲實作則。所明者。以其昭昭。使人昭昭也。斯可則焉。明人者。以其昏昏。使人昭昭也。斯有過焉。今攷引書者。僞說命爾。然孝經不曰則天之明乎。僞者襲之矣。大學云。古之欲明明德於天下者。此明人也。豈有過乎。如昏昏者。若書言桀之淫昏。是大惡也。非惟有過也。引爲則者。詩卷阿文。詩鹿鳴云。君子是則是效。言君之則人也。釋文云。養羊尙反。又如字。然此不當讀如字焉。孟子不有言國君養君子者邪。而天子可推矣。孔疏云。君養百姓。力不能贍。此讀如字焉。非也。書梓材云。引養引恬。言養人者。相引不

窮也。易頤彖傳云：聖人養賢以及萬民。故晉語云：君食之，明養之也。食讀若嗣，引以事者。詩烝民文：孔疏云：君屈事於人，則失位也。由今攷之，此所謂君者，蓋天子君天下也。諸侯君其國，皆臣事天子焉。諸侯則不得言非事人者也。後世有天子失位而事人者矣。若晉之懷愍二帝是也。孔子以前，奚有是乎？彼桀紂者，放之誅之而已。古無天子失位而事人者也。今言事人，又言失位，明其爲自謙也。孟子所謂學焉而後臣之也。易謙象云：六五，不富以其鄰，蓋謙之虛也。程傳云：五以君位之尊，而執謙順以接於下，衆所歸也。鄰近也。不富而得人之親也。易泰象云：六四，翩翩不富以其鄰，蓋富則實焉，不富者，易象陽實陰虛也。能左右

之曰以鄰若書言臣鄰也。六四陰虛。與五上二陰羣飛而交下。故傳曰。翩翩不富。皆失實也。此本命氏瑛之說而推之也。今以言此經。君交下之謙。師以事之。則失其尊位之實矣。易屯象云。以貴下賤。大得民也。豈不自失而反有得乎。孝經云。其民則而象之。此異乎民無則焉。書無逸云。惟正之供。蓋供養也。論語云。百姓足。君孰與不足。此以見非養君無以自安也。忠事名顯。孝經說義也。故人皆愛其死而患其生。

謹案此下三節。皆由分定而言。愛其死者。論語所謂守死善道也。患其生者。論語所謂無求生以害仁也。此其身之分定也。皆禮之正也。

釋曰。鄭注承上文釋之。是矣。而不於此分節焉。猶未叶乎經之文法也。鄭於上文以自安爲居安。則居與養非相洽也。

故用人之知去其詐。用人之勇去其怒。用人之仁去其貪。

謹案人之有知者其失詐。禮說謂若臧武仲之要君也。人之有勇者其失怒。若狼臆之被黜也。人之有仁者其失貪。張子謂若陳氏之厚施也。三德之失。皆爭奪之變所由生也。用人者用三德而去其失。此其性之分定也。皆禮之正也。

也。

要平聲。臆。琛。上聲。被去聲。

釋曰。經言去其者。自其人言之也。非別言之也。鄭注以爲用此等人。去彼等人。孔疏以爲用此等人。斯彼等人自去。

二者不同。皆未叶乎其之爲文也。引臧武仲者在論語及襄二十三年左傳也。引狼曠者在文二年左傳也。引陳氏者在昭三年左傳也。張子云。怒君子胥郤克之敢戰也。今以左傳攷之。子胥見昭二十年。郤克見成二年。子胥怨也。非怒也。郤克怒而忿也。非勇而怒也。孟子云。分定故也。蓋言君子所性焉。今知勇仁皆性分中之用也。中庸所謂三達德也。

故國有患。君死社稷。謂之義。大夫死宗廟。謂之變。

謹案國有患難。君死其國之社稷焉。是以衆守邦而死節也。執禮之正也。則謂之義也。此其職之分定也。國有患難。大夫死其家之宗廟焉。是以私背公而死黨也。斯悖禮矣。

所言二見二言變法利工
則不謂之義而謂之變也。禮說曰：春秋時，宋魚石之入彭城，晉欒盈之入曲沃，皆變也。非義也。非其職之分定也。曲禮曰：國君去其國，止之曰柰何去社稷也。大夫曰柰何去宗廟也。國君死社稷，大夫死衆，蓋不言大夫死宗廟也。死衆者，死以君之衆而衛社稷也。

釋曰：鄭注云：變當爲辯。此破字釋之。非也。鄭注云：君守社稷。臣衛君宗廟者，蓋與賈誼所稱父兄之臣，誠死宗廟者，似同而不同。蓋父兄之臣，非統言臣也。經曰：大夫死宗廟，不言父兄之臣也。則宗廟不自君言而自大夫言矣。且如鄭說，是君臣皆死義也。奚爲而異稱乎？孝經有悖禮之文，引魚石者在成十八年及襄元年前傳也。彭城，宋邑。楚取

之以爲魚石邑也。引樂盈者在襄二十三年左傳也。曲沃樂盈本邑也。而春秋皆書其罪焉。

故人者其天地之德陰陽之交鬼神之會五行之秀氣也。

謹案易繫辭傳曰。一陰一陽之謂道。繼之者善也。成之者性也。此人所由生也。蓋天地之常健順之德。曰元亨利貞。其德皆藏諸陰陽者也。故二氣交焉。而鬼神五行變化乎其間矣。人生則鬼神體之。蓋氣麗於形以會也。木行爲仁。火行爲禮。土行爲信。金行爲義。水行爲知。蓋理麗於氣以行也。孝經曰。天地之性。人爲貴。其秀之可貴乎。此言人之性以明禮也。知同智

釋曰。鄭注云。言人兼此氣性純也。善矣。宜有申焉。孔疏云。

天以覆爲德。地以載爲德。此於義未析也。易說卦云。乾健也。坤順也。又云。乾爲天。坤爲地。蓋健順者其德也。其德則繫辭傳所謂藏諸用也。斯陰陽之用也。中庸云。體物而不可遺。言鬼神也。易說五行爲五常焉。

播五行於四時。

謹案播布也。漢志。天以一生水。地以二生火。天以三生木。地以四生金。天以五生土。五位皆以五而合。故曰。妃以五成。此天地所以生成五行者也。月令。春木。夏火。中央土。秋金。冬水。蓋分布焉。易象八卦之位皆然矣。故曰。坎者水也。又曰。兌正秋也。此以見震者木也。離者火也。兌者金也。坤者土也。而坤位乎離兌之間。則中央土也。震正春也。離正

夏也。坎正冬也。皆其播也。

配。配同。

釋曰。鄭注言播五行者。偏承上文地陰而言。非也。播布說文義也。引易者說卦文。蓋互文也。

五聲六律十二管。還相爲宮也。

謹案此据漢志而知其要矣。

釋曰。京房六十律。孔疏錄焉。亦徒繁爾。

故聖人作則。必以天地爲本。以陰陽爲端。以四時爲柄。以日星爲紀。月以爲量。鬼神以爲徒。五行以爲質。禮義以爲器。人情以爲田。四靈以爲畜。

謹案此承上文言人者而明之。作則者。於禮作人之則也。自天地而下七者。皆禮本於義之器所由成也。禮器旣成。

於是乎定人情而感物靈矣。其以之爲文。有在上在下不同者。辭氣之宜也。如曰。必天地以爲本。則辭氣盛矣。文近者。必連變而後成文。故自天地而下四者。皆以字在上焉。如曰。以月爲量。則辭氣亦盛矣。文近者。亦必連變而後成文。故自月而下六者。皆以字在下焉。蓋義同而文不同爾。詩序曰。聲成文。謂之音。禮文之辭氣亦然也。虞子六反

釋曰。經上文云。故聖人耐以天下爲一家。以中國爲一人者。此以字苟在下歟。亦非辭氣之宜也。經上文云。大人世及以爲禮。城郭溝池以爲固。禮義以爲紀。此以字苟在上歟。亦非辭氣之宜也。自天地而下四者。孔疏謂上明天道。事遠。故以字在上。連於天也。自月而下六者。孔疏謂後明

地道事近。故以字在下。連於人也。此疏以實義求之。非也。
經曰。聖人作則。此十者孰非白人而言者乎。經下文云。山
川所以饋鬼神也。則言鬼神者可言地道矣。而言月者。豈
言地道乎。經上文言月生者。鄭注偏承地陰而言爾。詩小
明毛傳云。蹙促也。

故功有藝也。

謹案藝極也。才能之極也。左傳曰。布常無藝。又曰。陳之藝
極。蓋試功者。月計而量之。則得有才能之極矣。經下文所
以言分藝也。分去聲

釋曰。鄭注釋藝者。於義未融也。引左傳者。昭二十年及文
六年文。昭十三年左傳云。貢之無藝。遂云。貢獻無極。則藝

者極也。

故人以爲奧也。

謹案此言天下人皆以爲田主也。

釋曰。此當自其效言。與上下文一例也。孔疏云。今是聖人。用聖人以爲田主。則自其用言。非也。經上文云。人情以爲田。旣自其用言矣。經下文云。故人情者。聖王之田也。蓋特申之也。

故飲食有由也。

謹案由自也。言有自來也。畜麟鳳及龍。則飲食之物類有自矣。畜龜則飲食之人情有自矣。禮之若祭若昏者。皆龜卜也。而皆飲食焉。此飲食之由也。故經下文言行禮者曰。

其行之以飲食。

釋曰。鄭注云。由用也。四靈與羞物爲羣。由今攷之。此言麟鳳及龍則可矣。言龜不可也。經下言龜者。以人情不失言之也。不言其來物類焉。釋詁云。由從自也。則由者從也。亦自也。

麟鳳龜龍謂之四靈。

謹案四者皆物得秀氣而爲靈者也。

釋曰。公羊家獲麟瑞應之說。孔疏錄焉。其失也誣。

故先王秉蓍龜。列祭祀。瘞繒。宣祝嘏辭說。設制度。故國有禮。官有御。事有職。禮有序。

謹案此近承上文言龜者而明之。實遠承上文言禮以治

政者而申之也。蓍筮與龜卜相因也。禮有先後而秉執者焉。卜筮則列明祭祀矣。以瘞以綰。而宣祝嘏之辭說。皆祭祀禮然也。自祭祀而推之。凡禮之制度。皆以設焉。御治也。百官治事。於是乎禮以序行矣。

釋曰。鄭注云。皆卜筮所造置也。鄭統言之。於義未析也。御治。詩思齊。鄭箋義也。

卜筮瞽侑皆在左右。

謹案。侑。勸食之樂人也。周官曰。以樂侑食。又曰。王大食。三侑。

釋曰。鄭注云。侑。四輔也。非也。夫四輔豈宜在瞽下乎。且尙書大傳言四輔者。蓋前疑後承。左輔右弼也。今經曰。皆在

左右豈四輔之稱乎。引周官者。膳夫及大司樂文。周官注云。侑猶勸也。蓋樂人之職。統言之則曰瞽。分言之則曰侑。猶論語稱亞飯三飯四飯者之專官也。

王中心無爲也。以守至正。

謹案前後左右而王中焉。陳氏濬以王中絕句。是也。王心無爲。而以守禮之至正。此異乎黃老清靜無爲而所守非正者矣。

釋曰。孔疏讀云。王中心無爲也。失之矣。黃老者託於黃帝而言老子也。漢初之治尙焉。漢書詳矣。

是故夫禮必本於大一。

謹案大一者。易所謂大極也。大衍之數。其用虛一者。象大

極也。大極之道。禮所由本也。大一大極之大音泰

釋曰。易繫辭傳云。大衍之數五十。其用四十有九。蓋虛一也。易說謂大極存焉。故曰。易有大極。是生兩儀。言分而爲天地也。

其降曰命。其官於天也。

謹案左傳言禮之定命者曰。民受天地之中以生。所謂命也。蓋天降命焉。皋陶謨曰。天秩有禮。故曰。天工人其代之。工。官也。蓋其官於天也。

釋曰。鄭注釋降釋官者。皆自聖人言之。則於經上文爲不屬矣。此言天之降命。未言聖人之殷以降命也。經下文云。夫禮必本於天。非遽言聖人之制邪。引左傳者。成十三年

文詩臣工毛傳云。工官也。

其居人也曰養。其行之以貨力辭讓飲食。冠昏喪祭射御朝聘。謹案居人猶在人。承上文禮本於天者而言也。左傳言禮之定命者曰。能者養以之福。言人能養於禮也。此以明禮能養人矣。荀子曰。禮者養也。方氏慤曰。禮非貨力辭讓飲食不行。故孟子曰。無財不可以爲悅。聘義曰。非强有力者弗能行也。經上文曰。達於喪祭射御冠昏朝聘。特先喪祭之重焉。此曰冠昏喪祭。人之始終順其序也。或曰射御爲射鄉之誤。非也。射卽統鄉。御通軍禮。春秋傳言兵者。固言御戎矣。且如曰射鄉朝聘。豈其序朝野然乎。此不得以仲尼燕居及樂記言射鄉者而改射御之文也。

釋曰。鄭注云。養當作義。此破字釋之。非也。引左傳者。成十三年文。此從古本也。今本或云。能者養之以福。蓋以之作之以。則譌矣。之。猶適也。故其下文云。不能者敗以取禍。此對文也。引荀子者。禮論篇文。喪祭之重。論語述古義也。所以講信脩睦。而固人肌膚之會。筋骸之束也。

謹案。講信。則得禮之實。脩睦。則得禮之和。其禮之由中養外。以爲固者。若易所謂正位居體。美在其中。而暢於四支也。蓋君子有幹事之固焉。其禮之由外養中。以爲固者。若左傳所謂有動作威儀之則。以定命也。蓋君子有威重之固焉。

釋曰。經於此有而之爲文。蓋遞言之也。引易者。坤文言文。

引左傳者成十三年文其傳又云禮身之幹也。乾文言亦云貞固足以幹事。今酌焉。論語云君子不重則不威。學則不固。可反觀矣。三國時管輅知鄧騭之凶者。議曰鄧之行步則筋不束骨。脈不制肉。起立傾倚。若無手足。此輅所以覘而知之之術也。豈不猶通於禮乎。今魏志可攷也。

故事大積焉而不苑。

苑音鬱

謹案苑如詩我心苑結之苑。猶屈也。

釋曰。引詩者都人士文。鄭箋云苑猶屈也。積也。蓋積則屈矣。

所以持情而合危也。

謹案此所以持正其情而合乎守危也。

釋曰。守危承上文而言。鄭注言拱持其情者。於文未洽也。言合安其危者。於經病添文也。

則是無故。先王能脩禮以達義。體信以達順。故

謹案禮說曰。此皆從故絕句焉。其曰達義。曰達順者。微讀而不絕也。讀音逗

釋曰。下故字。孔疏屬下句讀者。非也。大戴禮曾子制言篇云。今之所謂行者。犯其上。危其下。衡道而彊立之。天下無道故。若天下有道。則有司之所求也。蓋從故絕句焉。其例也。行讀去聲。衡古橫字。求。謂求其罪也。

郊特牲

爲人臣者。無外交。不敢貳君也。

謹案孔疏曰。不敢貳心於他君也。

釋曰。書顧命云。不二心之臣。蓋貳者二也。或曰。大夫外交。則以鄰國之君竝吾國之君。而有二君矣。所謂貳者。自指鄰國之君言。非指人臣之心言。是奚不思有二心。乃有二君乎。莊十四年左傳云。社稷有主。而外其心。其何貳如之。遂云。臣無二心。天之制也。

縮酌用茅。明酌也。

謹案爾雅曰。茅明也。

釋曰。引爾雅者。釋言文。茅蓋明潔者。

學記

謹案學記爲天下萬世法者。其通經之大用乎。記曰。一年

視離經辨志。蓋學之始也。其後三年言敬業者。經業也。所謂正業也。五年言博習者。習經在其中也。七年言論學者。經學在其中也。九年言知類通達者。自通經而通於萬物也。蓋學之終也。後世言學者。因其時而酌之。則宜矣。如其違之。學云乎哉。

釋曰。學記引兌命曰。念終始典于學。故此以學之終始說焉。記引兌命者三。皆詳尙書集注述疏逸文。今此記鄭注補正之藁。合尙書說而觀之。若苟完矣。

就賢體遠。足以動衆。

謹案。遠蓋賢之在遠者。若燕昭王就見郭隗。而樂毅自遠至焉。則親之也。於是乎動復讎之衆矣。

燕平聲隗五
賄反樂音岳

釋曰。孔疏云。遠謂才藝廣遠。此於經病添文也。遠者蒙上賢之文也。朱子云。遠謂疏遠之士。是矣。朱子以動衆爲致衆譽焉。然此當言實事也。實能用衆。則大譽而非小聞可知也。經上文言發慮者。內則有其文。

君子如欲化民成俗。

謹案君子者。君人之子也。蓋自乾父坤母而推以稱之也。釋曰。天子君天下。諸侯君其國。經皆稱之曰君。其在喪。亦皆稱之曰子。大夫有采地者。儀禮喪服傳稱之曰君。其常稱者。左傳論語稱之曰子。以其德爲君人之子也。則經皆稱之曰君子。斯如禮運稱六君子哉。通而稱之。無其位而有其德者。亦名君子焉。經下文言立學。則此君子固在位。

中人矣。隱三年左傳云。君人者。卽君民者也。今通言之爾。孔疏於君子之子。以子民言之。非也。

兌命曰。念終始。典于學。

謹案典常也。今不曰始終而曰終始者。易所謂終則有始也。故曰常于學。鄭氏說典經也。其釋典于學。倒文也。猶曰學于典。若左傳言室於怒。市於色也。于於也。

釋曰。今尙書說命篇。東晉僞古文也。鄭本無之。孔疏不知其僞焉。釋詁云。典常也。引易者。蠱彖傳文。釋言云。典經也。引左傳者。昭十九年文。于於。釋詁義也。孔疏云。習經典於學。則失其爲倒文矣。禮文王世子引兌命此文。鄭注以典常言之。而以于學言其地焉。非兌命本義也。

術有序。

謹案術古通遂。春秋秦伯使術來聘。公羊傳術作遂。是也。釋曰。陳氏澹云。術當爲州。周官州長云。春秋以禮會民而射于州序。此陳說所由也。然黨亦言序矣。周官黨正云。國索鬼神而祭祀。則以禮屬民。而飲酒于序。由是言之。安見遂必不言序乎。管子云。里十爲術。術十爲州。雖與經不同。亦術卽遂也。孔疏分言鄉遂者詳矣。故云。此經六鄉舉黨六遂舉遂。蓋孔知黨非屬遂焉。而疏云。於遂中立序。教黨學所升者。則淆矣。術文從行。遂亦以行道名。故古通也。經下文蛾術。蛾續行也。

三年視敬業樂羣。

樂音落古音五敬反

謹案敬業謂謹治經之業也。若論語稱曾子之省傳習也。樂羣謂和同業之羣也。若論語稱詩可以羣。又稱弟子之汎愛衆也。省悉井反

釋曰。孔疏言敬業者。惟以敬同學藝業長者言之。於義未悉也。經上文云。比年入學。禮家讀比毗志反。釋文無音。而於聘義云。比必履反。蓋上去二聲皆可讀焉。釋文於學記鄭注事義之比亦兼二聲也。

夏楚二物。收其威也。

謹案收取也。威猶畏也。鴻範曰。威用六極。史記作畏。堯典曰。扑作教刑。皋陶謨舜亦言威之矣。今夏楚皆扑焉。取其有所畏也。雖堯舜時不能廢也。扑普木反

釋曰。襄二十七年左傳杜注云。收取也。鄭釋威爲威儀。未洽也。

學不躐等也。學如字

謹案此言學問不越等焉。

釋曰。鄭注云。學教也。釋文。學胡孝反。今讀如字。以此下自有教之爲文也。與上文引書兌命文不同。夫學不躐等。則教不躐等可知矣。

記曰。凡學。官先事。士先志。其此之謂乎。

謹案凡大學之學。今爲士而將爲官者也。將爲官。故官先事焉。經業則未爲官而先明官事也。此上文所以言官其始也。若宵雅肄三。皆嘉賓使臣之事也。今爲士。故士先志。

焉。經業則未有事而先明士志也。此上文所以言游其志也。若離經辨志。皆九年大成之志也。使去聲

釋曰。此以申鄭義也。鄭注云。官居官者也。士學士也。孔疏云。凡學謂學爲官。學爲士者。若學爲官。則先教以居官之事。若學爲士。則先教以學士之志。此孔疏於學分而二之。非古人之學也。蓋於記上文不貫焉。曲禮云。宦學事師。孔疏以爲二師。其失原乎此也。詩序云。鹿鳴燕羣臣嘉賓也。四牡勞使臣之來也。皇皇者華。君遣使臣也。此其事爲小雅之三也。孔疏於上文云。辨志謂辨其志。鄉習何經矣。然辨志豈惟若斯已乎。且離經之先。豈不定何經乎。記何以不曰辨志離經乎。記上文言禘者。詳論語集注述疏禘灌。

章及論語答問禮說。

大學之教也。時教必有正業。退息必有居學。

謹案時教者。朱子謂如春秋禮樂冬夏詩書之類也。居學者。朱子謂如易言居業是也。蓋退息所居。而其學存焉。故曰居學。經下文所以於息焉亦稱學也。書曰君子所其無逸。其居學之謂歟。

釋曰。朱子之讀從也。從學絕句焉。較鄭讀長矣。

遊焉。

謹案雖遊而不忘學者。若論語稱樊遲從遊於舞雩之下而問也。

釋曰。息焉之義。於上文居學言之矣。鄭注云。息謂作勞休。

止之爲息。遊謂閒暇無事之爲遊。此据阮氏本也。經下文引兌命敬孫云者。互詳論語集注述疏食無求飽章。言及于數。進而不顧其安。使人不由其誠。教人不盡其材。

謹案。安如孟子稱願安承教之安。由如論語稱可使由之。之由。誠如孟子稱反身而誠之誠。材如中庸稱必因其材之材。皆自學者言也。天地法象之數。矜高以教者。妄言及之。是進而不顧其承教之安也。是使人不由其反身之誠也。是教人不盡其可因之材也。

釋曰。吳氏澄讀此經云。及于數。進而不顧其安。蓋讀言字上屬焉。數讀若朔。釋詁云。速數疾也。則數亦速也。惟此不及進而數進矣。經何以言及乎。於文未適也。法象者。諸數

出焉。今易說可攷也。朱子以度數言之。豈異鄭乎。鄭注云。材。道也。易曰。兼三材而兩之。謂天地人之道。而鄭釋不盡其材者。則云。謂師有所隱也。今攷中庸云。莫見乎隱。莫顯乎微。釋詁云。隱微也。論語云。子曰。二三子以我爲隱乎。蓋謂之隱者。親師而深求之。非疾其師之言也。孔疏申鄭者。以爲恐人勝之。故不盡其道也。如其說。是師有所吝也。不可謂之隱也。經下文言隱其學者。則隱沒師說云爾。朱子以師隱言之。亦非也。經上文云。多其訊。釋文。訊。又作諄。釋詁云。諄。告也。詩陳風說同。以釋學記此經。其義亦貫焉。三材。今易作三才。莫見之見。賢遍反。

禁於未發之謂豫。當其可之謂時。

謹案朱子曰。禁於未發。謂豫爲之防也。當其可謂當其可告之時也。

釋曰。鄭注皆以年言之。於義未悉也。益以朱子之義。則悉矣。

相觀而善之謂摩。

謹案朱子曰。相觀而善。謂觀人之能。而於己有益。如物相摩也。

釋曰。鄭注惟以不竝問言之。於義未悉也。易繫辭傳言相摩者。馬注云。摩切也。易釋文稱焉。

燕朋逆其師。燕辟廢其學。

辟音僻。

謹案燕朋。燕樂之朋也。自人言之。燕辟。燕樂之辟也。自己

言之論語曰。樂宴樂。燕與宴通。樂記曰。宋音燕女溺志。又曰。齊音敖辟喬志。此燕辟之類也。燕樂之樂音落樂宴之樂五教反敖音傲喬音

駁

釋曰。朱子云。燕朋謂私褻之友。燕辟謂私褻之談。此雖改鄭矣。而辟亦讀譬焉。此談譬也。今攷經下文。罕譬不作辟。則其讀當不同。陳氏澣云。辟音僻。是也。

道而弗牽。強而弗抑。開而弗達。

道去聲
強平聲

謹案道。古通導。牽。謂牽制也。易曰。柔道牽也。強如儒行稱夙夜強學之強。抑。謂抑退也。道之而弗牽制。強之而弗抑退。此其能和易也。開之而弗先達。此其能自思也。

釋曰。孔疏釋牽者。本牽進之義而求之。則與經下文言達

者消矣。引易者。姤象傳文。易疏云。陰柔之道。必須有所牽繫也。此牽制之義也。強義互詳表記篇。鄭注云。抑猶推也。鄭意其謂推卻歟。孔疏申之而不明也。說文云。抑。按也。蓋抑退而按止之也。

或失則易。或失則止。

謹案失於易。謂不知爲之難者。若論語稱司馬牛之問仁也。失於止。謂自畫不求進者。若論語稱冉有之言力不足也。

釋曰。鄭注釋易者是矣。宜有申焉。鄭以止爲不問於義未悉也。

君子知至學之難易而知其美惡。

謹案君子知至學者之有難至有易至也。而又知其難至易至者各有美惡焉。若論語稱孔子告樊遲以崇德而攻其惡也。其美者德也。

釋曰。經文其之爲義。當自本文言之。鄭注云。美惡說之是非也。然經豈云其說乎。故孔疏申之而不得明也。疏言難易者亦失之矣。張子云。知學者至於學之難易。而知其才性之美惡。此言才性者。於經病添文也。性惡之說。則雜荀子焉。經下文相說之說。釋文音悅。蓋問答相說也。朱子讀說如字。以爲義理相說。其釋相者。不如舊釋在本文中矣。或曰。說古脫字。禮文多然。今言解脫也。然釋相云何。經下文從容之從。朱子讀七容反。與中庸緇衣讀同。謂此餘韻。

從容也。此勝鄭讀焉。

雖詔於天子無北面。

謹案詔告也。

釋曰。周官大宰詔王注云。詔告也。鄭注引大戴禮云。昔黃帝顓頊之道存乎。意亦忽不可得見與。此從乎絕句也。其例猶石經論語意與之與。孔疏釋爲在於意。失其讀矣。列子湯問篇引古詩云。良弓之子。必先爲箕。良冶之子。必先爲裘。張湛注云。學者必先攻其所易。然後乃能成其所難。蓋與經下文及注說不悉同。今可參焉。裘古音渠之反。學無當於五官。五官弗得不治。

謹案五官。木正。火正。金正。水正。土正之官也。左傳曰。五行。

之官。是謂五官。荀子曰。農精於田。而不可以爲田師。賈精於市。而不可以爲賈師。工精於器。而不可以爲工師。有人也不能此三技。而可使治三官。曰。精於道者也。蓋通於治五官者矣。

釋曰。陳氏澹云。五官。鴻範之五事也。非也。五事者。貌言視聽思也。豈可謂學無當於五事乎。荀子天論篇云。心居中虛以治五官。此言耳。曰。鼻口形爲五官矣。或以釋此經。亦非也。學以治心。非卽以治五官歟。此其當也。引左傳者。昭二十九年文。引精道者。荀子解蔽篇文。孔疏於下文云。師情有在三年之義。或曰。年衍文也。蓋据國語言君父師者。以爲民生在三也。然檀弓不曰心喪三年乎。此師情也。

大信不約。

謹案此若五帝三王之大信。穀梁傳曰。詰誓不及五帝。盟

詛不及三王。

詛側助反

釋曰。荀子云。春秋善胥命。然豈大信乎。鄭注以言此經非也。引穀梁傳者。隱八年文。

大時不齊。

謹案禮說曰。此若孟子稱孔子聖之時而仕止久速之不同也。

釋曰。今據經上文曰大德曰大道曰大信。皆自人言之也。此曰大時。當一例焉。孔疏云。大時謂天時也。此於義未融也。

孔子閒居

天無私覆。地無私載。日月無私照。奉斯三者以勞天下。此之謂

三無私。

勞去聲

謹案尸子治天下篇曰。無私百智之宗也。其取資於此者歟。

釋曰。引尸子者。見御覽皇王部。尸子書亡。今存輯本。

儒行

謹案儒行凡十七條。皆足法也。皆孔子所稱也。彼疑而議之者。何爲乎。何彼釋之失其義乎。左傳哀公二十一年。齊人譏魯人而歌之曰。唯其儒書。以爲二國憂。其以儒相詬病。可知也。此孔子卒後纔五年爾。

釋曰。引儒書者。詳論語集注述疏。仕而優則學。章。儒行凡十七條。今鄭注補正之藁。合論語說旁及者而觀之。若苟完矣。

丘聞之也。

謹案問之者。明乎其非自爲之也。

釋曰。孔疏言鄉服者云。以立爲制法之主。故孔子不與尋常同也。此疏惑於緯云爾。如其說。孔子何以言聞之也乎。大戴禮哀公問五儀篇。固以章甫爲國之士服矣。蓋章甫殷冠。周通用之。故論語言相禮者及焉。

悉數之乃留。

謹案悉盡也。

釋曰。悉盡釋詁文。

儒有席上之珍以待聘。

謹案禮說曰。此論語所稱美玉待賈者也。賈音價

釋曰。孟子云。我非堯舜之道。不敢以陳於王前。蓋孟子既聘者也。今鄭注以陳善爲待聘者。不失之乎。是求聘也。

力行以待取。

謹案取。如孟子稱取士必得之取。

釋曰。經上文曰待聘。曰待問。曰待舉。皆待於人者也。今日待取。當一例焉。鄭注云。取進取位也。由鄭言之。則嫌乎干進矣。

其自立有如此者。

謹案此以致用而自立也。

釋曰。經下文又有自立焉。宜別之矣。

儒有衣冠中。動作慎。其大讓如慢。小讓如僞。大則如威。小則如愧。其難進而易退也。粥粥若無能也。其容貌有如此者。

謹案衣冠。法服也。爲容貌飾焉。中者得中而無太過不及也。動作。容貌之儀也。太如左傳言大歸之大。大讓者固辭而不受也。故其容貌如慢然。小讓者禮辭而終受也。故其容貌如僞然。則法也。康誥曰。丕則敏德。言大則也。威畏也。大則者大法之而敬服也。故其容貌如威然。小則者小法之而勉勵也。故其容貌如愧然。進以禮。故難進。退以義。故易退。漢書注曰。粥粥敬懼貌。

釋曰。鄭注釋此者。於文未洽也。孔疏言大小者。以事之大
小言之。而經言則者爲語辭。是其文與大讓小讓者不一
例也。陸氏佃蓋辯之矣。詩抑云。敬慎威儀。維民之則。釋言
云。威則也。今自儒者則人而言。蓋如威也。引左傳者。文十
八年文。大歸者。終歸而不反也。張子云。大讓如讓國。讓天
下。蓋以國天下爲大也。今攷堯典云。岳曰。否德忝帝位。而
終不受天下焉。此大讓如慢也。堯典云。舜讓于德。而終受
天下焉。此小讓如僞也。如曰。讓天下者。皆大讓矣。若舜讓
者。將不曰大讓如僞乎。則法。釋詁文。史記錄鴻範。威作畏。
蓋義通也。引漢書注者。禮樂志。晉灼注義也。

儒有居處齊難。其坐起恭敬。言必先信。行必中正。

齊難皆如字

謹案齊同也。言居處同苦難。而其坐起獨恭敬也。若茅容與等輩避雨樹下。而獨危坐也。明其素恭敬而備豫焉。信者。中正之實也。言必先乎信。故行必以中正爲備豫也。釋曰。鄭注云。齊難。齊莊可畏難也。此於文未洽也。且於下文言恭敬者複矣。其之爲文。若綴旒然。孟子以不齊言不同。則齊者同也。引茅容者。見後漢書郭太傳。

其近人有如此者。

謹案近人者。近道也。中庸曰。道不遠人。人之爲道而遠人。不可以爲道。孟子曰。其好惡與人相近也者幾希。今其忠信立義。時義先勞。皆人道也。文爲人文。亦人道也。故曰近人。幾平聲。

釋曰。孔疏云。其親近於人如此。由疏言之。豈足以統承上文乎。易賁彖傳云。文明以止。人文也。

勢。雖攫搏。不程勇者。引重鼎。不程其力。

謹案此言特立之勇。雖服猛之勇。不足程量勇者。特立之力。雖舉重之力。不足程量其力。量平去二聲

釋曰。鄭注非也。詩大叔于田云。將叔無狃。戒其傷女。言暴虎也。安可以不量力往乎。

過言不再。流言不極。

謹案人初過責我之言。知我能特立。則不更言矣。特立者。不畏流言。故不窮極。曾子曰。孝子流言止焉。

釋曰。禮說謂過言亦人言也。蓋與流言一例也。孔疏云。儒

者愆過之言。非也。孔疏申鄭釋不極者。於義未融也。引曾子者。大戴禮曾子本孝篇文。

不習其謀。

謹案禮說曰。習重也。易曰。不習。无不利。則不疑其所行也。

特立者。成謀不疑。遂不再重其謀。

重平聲

釋曰。鄭注云。不習其謀。口及則言。不豫其說而順也。此於義未析也。夫不豫之先。安有所謂其謀乎。易彖傳云。習坎。重險也。則習者重也。引不習者。坤文言文。經下文云。其飲食不溲。鄭注云。恣滋味爲溲。孔疏以濃厚申之。是也。月令季夏云。土潤溽暑。亦濃厚意也。經下文云。其過失可微辨。而不可面數也。鄭注孔疏。於此闕焉。呂氏大臨云。此尙氣。

好勝之言。疑其非孔子所稱也。蓋呂氏未察而數者爲大過異於微過也。詳論語集注述疏子適衛章。

其自立有如此者。

謹案此以防身而自立也。

釋曰。經兩言自立。孔疏別之。於義未析也。

易衣而出。易以智反

謹案易如檀弓稱易墓之易。脩治也。衣敝故脩治之而乃可出。詩曰。羔羊之革。素絲五緇。又曰。羔羊之縫。素絲五總。言大夫裘敝。則落毛成革而見縫也。况貧而卑仕者乎。釋曰。孔疏引王說非也。仕者之衣。雖貧也。而有章矣。豈可更相易乎。引詩者羔羊文。經下文云。并日而食。若詩北門

之仕者則有之矣。

上答之。不敢以疑。

謹案疑貳也。不敢以疑。無貳心也。

釋曰。釋詁云。貳。疑也。今轉注焉。

適弗逢世。

謹案適如康誥適爾之適。謂適然也。

釋曰。孔疏云。適之也。從釋詁義也。此於文未洽也。

雖危起居。

謹案此言危其身之起居也。

釋曰。孔疏讀起居下屬焉。蓋失之矣。

猶將不忘百姓之病也。

謹案猶尙也。

釋曰。釋詁云。圖猷謀也。猷與猶通。則猶者圖也。鄭以言此經於文未洽也。且憂思云爾。何所圖乎。文六年公羊傳云。猶者何。通可以已也。今言猶尙不已也。

毀方而瓦合。

謹案瓦。謂屋瓦也。此瓦必相合者也。凡瓦之覆者。必稍圓而瀉焉。瓦之載者。必稍圖而注焉。稍圓則毀方而方猶存。

此瓦合之能正也。

覆浮去聲
屬同圖

釋曰。史記廉頗傳云。屋瓦盡震。此瓦以屋言也。孔疏云。瓦合。謂瓦器破而相合也。由疏言之。豈不爲漢書徐樂傳言瓦解者乎。漢書陳湯傳云。烏孫瓦合。不能久攻。言將解也。

非瓦解而合之也。經上文云。忠信之美。優游之法。鄭注自待人而言。此以經言其寬裕者也。中庸謂寬裕爲有容。蓋容人也。

儒有聞善以相告也。見善以相示也。爵位相先也。患難相死也。謹案聞見之善。將任舉焉。我既耳而目之。彼又耳而目之。其相告相示者。相引終無已也。任舉者。自謂才德不如若人。故讓爵位而相先。如其正直犯難。罪及舉主。則相死焉。釋曰。孔疏云。前經舉賢援能。謂疏遠者。此經任舉。謂親近者。此於義未析也。前經內稱不辟親。非親近乎。此經聞善見善。非疏遠乎。蓋前經謂儒爲大臣而舉賢援能者。故以程功積事言之。若檀弓云。趙文子所舉於晉國管庫之士。

七十有餘家。生不交利。死不屬其子焉。明大臣以人事君。不望其報也。此經謂儒方仕進而任舉者。故以爵位相先言之。若韓非子云。王登爲晉中牟令。薦中牟士而襄王用之。曰。我取登。旣耳而目之矣。登之所取。又耳而目之。是耳目人終無已也。明任舉者耳目聞見有然也。釋經家於聞見之善及死難者。不自任舉而明其義。則汎矣。屬讀若燭。陳言而伏。靜而正之。上弗知也。羸而翹之。又不急爲也。

謹案伏者巽言隱伏也。易曰。兌見而巽伏也。靜者言伏則靜也。正者正上之失也。翹舉也。周語言齊國子曰。立於淫亂之國。而好盡言以招人過。怨之本也。招與翹通。今言上有弗知其伏言者。則羸略而翹舉以發之。又不急以翹舉。

爲也。此特立而善於獨行者也。與上文特立而猛於勇力者不同。見亦燕反

釋曰。論語云。巽與之言。卽易象巽順義也。引巽伏者。易雜卦文。鄭注於經所謂伏者。遺之矣。且緣事而求知己。猶得爲特立獨行者乎。周語韋注云。招舉也。招讀若翹。不臨深而爲高。不加少而爲多。

謹案。不以高臨乎深者而爲高。謂不矜高於人也。不以多加乎少者而爲多。謂不誇多於人也。皆特立而善於獨行者也。

釋曰。鄭注言高者。惟以位高言之。於義未悉也。加少者。謂加人。猶臨深者。謂臨人也。當一例焉。鄭注言己小勝者。非

也。論語云。以多問於寡。蓋已則多而人則少也。論語有加諸人之文。

世治不輕。

謹案輕。謂躁進也。蓋世雖治。而時君有好尚之偏者。躁進則輕矣。中庸曰。國有道不變塞焉。此世治不輕也。若董子於漢武帝之世也。

釋曰。鄭注以賢者並衆言之。則經何以言特立獨行邪。同弗與。異弗非也。

謹案同弗與。則不黨同矣。異弗非。則不伐異矣。

釋曰。凡黨同伐異。非特立獨行之爲也。鄭注於下文云。博學以知服。不用己之知。勝於先世賢知之所言也。鄭意言

人不博學。每自用己之知。自謂勝於先世賢知之所言。是不博學無以知服從也。博學則不然。其明先世賢知之所言。乃以知服從矣。猶學記言學然後知不足也。蓋鄭注用己之知。非釋經以知之文。亦非謂己博學之知也。而孔疏乃曰。博學猶知服先賢。不以己之博學凌前。豈其申鄭意乎。是博學而知服也。豈博學以知服乎。或曰。釋詁云。服事也。然既曰博學。則其以知事也。不言而明矣。鄭注無可易也。蓋知服從。則從事在其中矣。經下文云。近文章。砥厲廉隅。又云。不臣不仕。蓋管寧其人也。詳論語集注述疏子適衛章。

並立則樂。相下不厭。

謹案立如學記稱獨立之立。今言友並立也。下如論語稱慮以下人之下。今言友相下也。不厭則亦樂矣。

釋曰。孔疏以立位及位下者言之。此於義未悉也。無以該友之無位者也。

其行本方立義。同而進。不同而退。

行如字

謹案易曰。方其義也。又曰。義以方外。其言義立者。遂曰。則不疑其所行也。蓋其行本方而立義焉。其行同友而進。勸善也。其行不同友而退。戒息也。

釋曰。韓文讀其行上屬者。讀曰。聞流言不信其行。蓋失之矣。鄭上文注云。聞流言不信。不信其友所行如毀謗也。鄭讀從不信絕句焉。鄭言其友所行。非連讀經文其行矣。引

易者。坤文言文。孔疏言進退者。於義未析也。經豈曰同則進不同則退乎。孔疏於上文云。方猶法也。今攷詩皇矣。鄭箋云。方猶鄉也。今以志鄉申鄭注焉。尤洽也。鄉與嚮通。溫良者。仁之本也。敬慎者。仁之地也。寬裕者。仁之作也。孫接者。仁之能也。

謹案鄉飲酒義曰。天地溫厚之氣。仁氣也。產萬物者也。易文言曰。元者善之長也。爾雅曰。元良首也。此溫良所以爲仁之本也。論語稱孔子者由溫良先矣。地以所居言。猶召誥言王敬作所也。論語稱居敬。孟子稱居仁。蓋敬慎之地。無不爲仁之地焉。作爲也。論語曰。寬則得衆。康誥曰。裕乃以民寧。其作爲大矣。孫猶遜也。論語曰。孫以出之。斯其能

接洽者歟。

長丁丈反

釋曰。易繫辭傳云。井德之地也。地亦以所居言。非謂井居其所歟。引召誥者。周書文作爲。釋言義也。

言談者仁之文也。

謹案易文言曰。君子體仁足以長人。由是推之。儒者之言。

非仁之文乎。

長丁丈反

釋曰。易乾文言之言仁也。統乎斯文者矣。經下文云。儒皆兼此而有之。皆或作者。譌也。

今衆人之命儒也妄。

謹案命名也。禮說從妄絕句焉。蓋妄名曰儒。

釋曰。桓六年左傳云。以德命爲義。言名子也。則命者名也。

鄭讀曰。今衆人之命儒也。妄常失其讀矣。於文未適也。或曰。儒行篇諸節。以儒有起。以有如此者結。惟末二節不同。其閒殆上下錯簡歟。非也。此變文以見義也。鄭注得其義矣。論語云。若聖與仁。又云。何事於仁。必也聖乎。故鄭釋上文云。仁。聖之次也。

儀禮

士昏禮

昏禮。下達。納。采用鴈。

謹案朱子曰。大夫執鴈。士執雉。而士昏下達。納。采用鴈。亦攝盛之意也。雖庶人不用匹。昏禮。摯不用死。故越雉而用鴈。鄭氏曰。用鴈爲摯者。取其順陰陽往來。程子曰。用鴈取

其不再偶也。匹讀爲驚音木

釋曰。鄭釋下達者失之。禮家議程子說者亦失之。詳論語答問。經上篇。士冠禮言母拜者。論語答問亦詳焉。

大射儀

賓諸公卿大夫。受解于席以降。適西階上。北面立飲。解音置

鄭氏曰。雖尊亦西階上立飲。不可以己尊枉正罰也。

謹案射禮。今雖不行。而射禮之意。則今宜行者哉。蓋射禮勝者飲。不勝者。謂之射爵。猶罰爵也。以解爲之。經上文曰。若賓諸公卿大夫。不勝。則不降。鄭氏謂重恥尊也。而尊者自降而立飲。此公理行於一射間矣。今不必其射也。惟以射禮公理之意行之。卑不恥尊。而尊不枉正。由斯意也。雖

平天下不亦可乎。

釋曰。記云。禮也者。理也。故事不必同。而其理之意則同。

周官

地官司徒

四曰聯師儒。

謹案大宰以九兩繫邦國之民。三曰師以賢得民。四曰儒以道得民。賢謂德行也。道謂道藝也。此非分而繫焉。大司徒以本俗六安萬民。四曰聯師儒。明其合而繫焉。蓋師儒各以所長。聯教邦國之民。而民以一人合受師儒之教。則不蔽於偏矣。故民受聯教而學成者。亦各成賢能而爲風俗立本也。鄉大夫之職曰。攷其德行道藝。而興賢者能者。

此其所以能安萬民也。由其受聯教而無蔽於偏者之害事也。後世議分教者察焉。大率之大音泰

釋曰。周官言聯者數矣。大宰以八灋治官府。三曰官聯。以會官治。族師云。五家爲比。十家爲聯。五人爲伍。十人爲聯。四閭爲族。八閭爲聯。皆欲其聯合而不分也。大司徒以本俗六安萬民。三曰聯兄弟。四曰聯師儒。五曰聯朋友。鄭注云。聯猶合也。是矣。而云師儒鄉里教以道藝者。鄭於此不言德行。何以明聯合之義邪。

春官宗伯

以禋祀祀昊天上帝。

禋音因。昊何老反。

謹案禋祀者祭名。以禋祀而祀之。周語所謂精意以享也。

古尚書說元氣廣大則稱昊天其稱尚矣上帝者上天之神也其神分主於五行四時者皆統而稱之曰帝若易所謂帝出乎震是也故司服之職曰祀昊天上帝則服大裘而冕祀五帝亦如之蓋五帝者月令五人帝也冬裘而合祀也大司寇之職亦言禋祀五帝矣故此惟稱昊天上帝而別焉此不言后土地祚者以天尊統地卑也詩序曰昊天有成命郊祀天地也其詩未嘗言地也猶孝經以天經統地義也而大司樂之職天神與地祚皆言則互見以相備也

元古祇字音其

釋曰尚書說牧誓肆祀蓋祭名也洛誥殷禋亦祭名也此禋祀說同鄭注云禋之言煙蓋汎矣下文實柴橧燎皆煙

也。張子辯焉。鄭注云。昊天上帝。冬至於圜丘所祀天皇上帝。然禋祀豈惟冬至乎。鄭釋禮諸注。以昊天上帝及五帝依緯文而爲六帝名。則惑也。王肅難之。而以五帝爲五人。帝是也。月令則以五人帝分配五行四時。周官司服則冬合祀焉。詳尙書集注述疏君奭篇。

冬日至於地上之圜丘奏之。若樂六變。則天神皆降。可得而禮矣。

謹案此大司樂言冬至祭天者也。爾雅曰。非人爲之丘。地上。因天高故也。圜丘象天道之圓。泰壇也。祭法曰。燔柴於泰壇。祭天也。郊特牲云。兆於南郊。就陽位也。蓋冬至一陽生。斯祭天之禮著焉。

釋曰。引爾雅者。釋丘文。孫炎云。地性自然也。爾雅釋天附祭名云。禘。大祭也。謂宗廟焉。鄭釋圜丘者。以爲禘大祭也。天神則主北辰。祭法曰。周人禘饗。謂此祭天。圜丘以饗配之。非也。詳論語集注。述疏。禘。灌章。禮記曲禮疏云。冬至祭昊天上帝者。春秋緯云。紫微爲天帝。北極耀魄寶。是也。此孔疏依鄭用緯文。而申北辰說爾。周官賈疏說亦然也。王肅難鄭於先矣。今酌焉。

夏日至於澤中之方丘。奏之。若樂八變。則地元皆出。可得而禮矣。

謹案此大司樂言夏至祭地者也。澤中。因地下故也。方丘。象地道之方。泰折也。祭法曰。瘞埋於泰折。祭地也。漢志引

禮記曰。兆於南郊。所以定天位也。祭地於大折。在北郊。就陰位也。蓋夏至一陰生。斯祭地之禮著焉。太猶泰也。瘞於滯反釋曰。鄭釋方丘者。亦以爲禘大祭也。地元則主崐崙。此鄭惑於緯文。禮家辯焉。史記云。周官曰。冬日至。祀天於南郊。夏日至。祭地元。蓋約周官此文也。

秋官司寇

七曰爲邦朋。

謹案士師掌士之八成。七曰爲邦朋。此察朋黨也。管子曰。朋黨蔽美揚惡。國之情僞。不見於上。如是則朋黨者處前。寡黨者處後。夫朋黨者處前。賢不肖不分。則爭奪之亂起而危矣。故曰。以朋黨爲友者。聖王之禁也。

井樹。

釋曰。鄭注宜有申焉。引管子者。立政九敗篇及法禁篇文。

謹案此野廬氏所掌而比焉。易曰。井養而不窮也。改邑不改井。故曰。井渫不食。爲我心恻。後世有發機致水。乃改而不食其井也。將目於智井焉。苟奪其機也。其養而不窮者安在乎。君子則心恻也。詩曰。樹之榛栗。椅桐梓漆。衛文公中興之政歌之矣。呂氏春秋曰。子產相鄭。桃李垂於街而莫之敢援也。今在中邦。何不思野廬氏之井樹邪。深私列反智烏

九反援
音爰

釋曰。引易者井彖傳及九三文。易說云。渫治井也。智井見宣十二年左傳。廢井也。引詩者定之方中文。

大戴禮記

謹案大戴者德也。德從兄之子聖稱小戴焉。大戴
八十五篇。今未亡者惟三十九篇爾。

釋曰。今所存大戴禮記。其爲小戴禮記所有者。互有異同。
蓋各采古記以傳也。故各於禮名家。今攷大戴禮。有禮察
篇。保傅篇。其及秦事者。蓋昭示乎禮家以經術通時務也。
本孔子言周禮今用之也。而禮察篇言禮防者。與小戴記
經解篇同。保傅篇約三代之禮以爲文。其言太子入學者。
引學禮。言胎教者。引青史氏之記。言成王中立四聖於前
後左右維之者。引明堂之位。非小戴記明堂位篇也。此古
禮多存乎其間。若夫公冠篇錄成王冠辭。其冠禮采古記

者於斯止矣。其後別附孝昭冠辭。則原不連禮古記焉。彼以爲雜而疵之也。奚不辨乎。周書列傳云。盧辯字景宣。以大戴禮未有解詁。乃注之。其兄景裕謂曰。昔侍中注小戴。今爾注大戴。庶纂前修矣。侍中者盧植也。與鄭康成同事。馬融爲師。見後漢書列傳。盧辯注今在記文下。亦有未亡者。

王言

雖有博地衆民。不以其道治之。不可以霸王。

謹案霸者率諸侯以尊王也。故孔子述王言者亦及霸焉。大戴禮少閒篇孔子言殷紂者曰。乃有周昌霸諸侯以佐之。故論語曰。管仲相桓公。霸諸侯。一匡天下。民到于今受

其賜

開音

釋曰。或疑此及霸者非孔子述王言之言。非也。成二年左傳云。四王之王也。樹德而濟同欲焉。五伯之霸也。勤而撫之。以役王命。杜注云。四王。禹湯文武。五伯。夏伯昆吾。商伯大彭豷韋。周伯齊桓晉文。是也。蓋霸之尊王若斯矣。荀子引中蘇之言云。諸侯自爲得師者王。得友者霸。中蘇之言者。尙書仲虺之誥也。其於王及霸之言也。孟子言春秋者曰。其事則齊桓晉文。謂史事也。而又云。仲尼之徒。無道桓文之事者。謂兵事也。以齊宣王問其事者。將興兵求大欲矣。故曰。五霸者。二王之罪人也。罪其樓諸侯以伐諸侯也。然豈概沒其功乎。孟子云。湯之於伊尹。學焉而後臣之。故

不勞而王。桓公之於管仲。學焉而後臣之。故不勞而霸。此皆稱其功也。是可以霸王也。其道非王言篇所謂知天下良士者歟。周昌者。周追王之文王也。方爲西伯時。率諸侯以事紂。其霸也。其尊王爲獨至也。荀子云。粹而王。駁而霸。蓋五霸則然。而豈周昌霸諸侯者然乎。稱周昌者。禮所謂詩書不諱。臨文不諱也。自紂言之。禮所謂君前臣名也。所謂天下之至明者。能選天下之至良者也。

謹案虞書曰。元首明哉。股肱良哉。此可以知後世以衆爲選者之不能選也。

釋曰。引虞書者。舉陶謨廣歌之辭。大戴禮誥志篇云。舉良良。舉善善。蓋良者善也。舉良則良。謂舉善則善也。此惟明

者能之。

哀公問五儀

所謂聖人者。知通乎大道。應變而不窮。能測萬物之情性者也。大道者。所以變化而凝成萬物者也。情性也者。所以理然不然。取舍者也。知與智通

謹案易文言曰。利貞者。性情也。蓋性發爲情之正矣。詩序曰。吟詠情性。遂曰。發乎情。民之性也。此情本於性之正焉。正則然而取之。斯不正則不然而舍之。皆所以條理之。而萬物皆由大道矣。易繫辭傳曰。化而裁之。謂之變。明乎應變者。宜變化也。凝定也。凝魚反

釋曰。易師彖傳云。貞正也。詩序云。由庚萬物得由其道也。

詩桑柔毛傳云疑定也。釋文疑魚陟反。孔疏疑音凝。此疑讀入聲也。然古義四聲通矣。易鼎象云君子以正位凝命。凝定也。讀平聲。記文然不然。荀子無下然字。不古通否。其義一也。以其文言之。大戴則聲成文矣。

夏小正

二月。昆小蟲。

傳曰。昆者衆也。由𧈧𧈧也。𧈧𧈧也者動也。小蟲動也。𧈧與紅通

謹案說文。昆同也。𧈧。物數紛𧈧亂也。今所謂紛紅也。蓋昆

乃相比而同。則衆矣。其衆者。由𧈧𧈧然而見之。其非動乎。

小戴記郊特牲篇祭蜡之祝辭曰。昆蟲毋作。謂衆蟲毋作

災也。與此應時而衆動者不同。比毗志反

釋曰。昆與蝻通。此蟲之相比而同也。或曰。由古通猶。其以
釋此文。非也。豈可謂衆猶動也。而申說邪。特明其衆之由
爾。傳下文云。抵猶推也。猶不作由。可明也。記文。貶別本作
魂。又無複句。魂魂也三字。今從舊本。孔氏廣森說從別本。
失之。郊特牲鄭注云。昆蟲暑生寒死。而釋昆闕焉。王制鄭
注云。昆明也。明蟲者陽而生陰而藏。此其釋也。何其遺此
傳歟。傳文古矣。今無以知何人作也。大戴傳焉。記上文云。
二月初俊羔。助厥母粥。傳曰。俊也者大也。粥也者養也。言
大羔能食草木而不食於其母也。羊羔非其子而後養之。
善養而記之也。或曰。夏有煮祭。祭也者用羔。是時也。不足
喜樂。喜羔之爲生也。而記之。謂羔羊腹時也。今攷小戴記。

祭義云。古者天子諸侯必有養獸之官。今言助其母養者。牧人助母養羔也。母羊於羔斷其乳。是羔非其子也。其爲文有似於皋陶謨予弗子之文。而後養之者以草木助養羔也。煮祭猶烹享。是時也。謂二月時。未及夏祭。故不足喜。樂詩小雅有腹我之文。今亦似焉。粥與鬻通。傳文羔非其子。當從宋本。或作蓋非其子。妄改也。孔氏說以爲羊有乳鹿者。蓋非其子而養之矣。然記文豈當曰羊蓋非其子而後養之。其曰而後者。於文未適也。今攷唐張說爲東都留守。奏羊乳麀表云。理有可嘉。事無前例。此豈可以釋夏小正乎。此豈羊乳常例而垂爲正則乎。韓文公詩董生行云。家有狗乳出求食。雞來哺其兒。此可登之唐月令乎。夫記

文所謂助者。以人事言也。其例猶四月執陟攻駒也。駒。馬子也。周官云。羊人掌羊牲。凡祭祀飾羔。其周監於夏者歟。傳文。羊羔非其子而後養之。其曰羊者。微讀焉。謂羔羊腹時也。其曰羔者。微讀焉。

十月。雉入于淮爲蜃。

傳曰。蜃者蒲盧也。

謹案禮說曰。古謂物變化之速者曰蒲盧。故蜃亦稱焉。其義然矣。蒲之爲言薄也。盧之爲言疏也。言薄近而疏通之。蓋變化之速也。詩曰。螟蛉有子。蜾蠃負之。爾雅曰。蜾蠃蒲盧。言蜾蠃取螟蛉子而變化爲己子也。其義可推也。中庸曰。人道敏政。地道敏樹。夫政也者蒲盧也。謂樹之變化尤

敏速者焉。

螺音果。贏力果反。

釋曰。左傳書序蒲姑。史記作蒲姑。其義通也。易說卦云。雷風相薄。謂相薄近也。書禹貢鄭注云。壩疏也。於文土從盧。言土性之疏也。釋名釋之曰。盧然。說文云。疏通也。引詩者。小宛文。引爾雅者。釋蟲文。中庸鄭注釋蒲盧者。以螺贏言之。此蟲之變化也。豈樹乎。朱子從沈括說。以爲蒲葦。則樹也。然爾雅及夏小正此文。又何說以互明乎。夏小正七月傳云。葦未秀爲蘆。其文與盧別也。吳語云。其民必移就蒲。贏於東海之濱。韋注云。蒲深蒲也。贏。蚌蛤之屬。是也。贏讀若螺。深蒲入水深者。孔氏廣森以言此蜃者失之。昭十三年左傳云。以蒲伏焉。卽匍匐也。禮檀弓作扶服。其聲類也。

蓋蒲伏取其聲云爾。則蒲盧亦例同。

保傅

於是比選天下端士。孝悌閑博有道術者。以輔翼之。比如字

謹案荀子稱多見曰閑。多聞曰博。故記下文曰。不博古之

典傳。不閑於威儀之數。亦分以責焉。傳去聲

釋曰。引荀子者。脩身篇文。此閑博對文則異也。若散文則通矣。注家略焉。漢書賈誼傳。賈子新書。惟曰孝悌博聞。欲易明爾。輔翼漢書作衛翼。而於下文輔翼太子。又不作衛翼。不如記文相應也。

及太子既冠成人。免於保傅之嚴。則有司過之史。有虧膳之宰。太子有過。史必書之。史之義。不得不書過。不書過則死。過書而

宰徹其膳。宰之義不得不徹膳。不徹膳則死。冠去聲

謹案太子之官。此當死義焉。孟子言瞽瞍殺人。皋陶執之而已矣。此天子父也。况太子乎。此殺人罪也。况過乎。詩曰。彼其之子。舍命不渝。故曰。彼其之子。邦之司直。死義也。彼其之音記舍去聲。渝以朱反。

釋曰。引詩者。鄭風文。毛傳云。渝變也。鄭箋云。舍猶處也。是子處命不變。謂守死善道是也。

夫開於道術。知義理之指。則教之功也。夫音扶

謹案記下文曰。夫教得而左右正。左右正則天子正矣。天子正而天下定矣。書曰。一人有慶。兆民賴之。此時務也。由是推之。凡言時務者。可不由道術開之而從義理乎。夫音夫

釋曰。漢書云。開於道術。智誼之指。則教之力也。儀禮經傳通解於引書下云。此之謂也。其文皆不如記文矣。此時務也。漢書新書文同。此通結上文。非惟結書辭。注家乃云。時是也。此是務也。豈本意乎。漢書無注。顏氏以爲當時之務。無注而明矣。且卽於書辭接焉。以經術爲時務。此賈生所以爲人才也。奚所疑邪。

安陵任周瞻而國人獨立。

謹案周瞻當作唐睢。此字之形近而譌也。以戰國策攷之。安陵魏所封也。秦王政欲以五百里之地易安陵。安陵君不聽。因使唐睢使於秦。秦王詰之。唐睢曰。安陵君受地於先王而守之。雖千里不敢易也。秦王怒。唐睢乃稱布衣之

士若專諸若聶政。若要離皆怒而能爲刺者以懼之。挺劍而起。秦王色撓。長跪而謝之曰。韓魏滅亡。而安陵以五十里之地存者。徒以有先生也。由是言之。唐雎亦刺客爾。豈如篇中稱比干箕子周公。遠伯玉管仲。樂毅之倫乎。而猶足以存亡獨立。況其不爲唐雎者哉。故此記及焉。唐七胥反要平

聲樂音岳

釋曰。言唐雎者。本魏策而約言之也。新書作周瞻。今新書非必賈子原書也。荀子云。夫道善用之。則百里之地可以獨立。不善用之。則楚六千里而爲隸人役。謂楚襄王也。非以不得賢而致斯哉。保傅篇言粥承者。詳孝經集注述疏。諫諍章。言遠伯玉。世治者。詳論語集注述疏。君子哉章。危

行言孫章言胎教者詳論語答問禮說或曰史記魏世家云齊楚攻魏而秦救不至魏人有唐睢者年九十餘矣謂魏王曰老臣請西說秦王令兵先臣出魏王再拜遣之唐睢入見秦王曰今齊楚之兵已合於魏郊矣而秦救不發亦將賴其未急也使之大急彼且割地而約從王尙何救焉於是秦昭王遽爲發兵救魏魏氏復定此魏安釐王十一年也距安陵事四十餘年矣唐睢猶在乎此不足疑也史遷於此亦采之魏策也古之人若召公在周子夏在魏者皆大年而幹事焉惟唐睢猶在而再使秦大老先生事所由濟也從讀若蹤

曾子立事

復宜其類。類宜其年。

謹案上文謂復行其言矣。今謂其復之得事宜者皆宜其類。其類之得時宜者皆宜其年。學記曰。九年知類通達。強立而不反。蓋君子立事之類。隨其年而見者。可推也。若內則年二十至七十。皆有事類所宜也。

釋曰。阮氏元說。以孝子錫類。年久遠可行者。釋之。謂類卽上文信言行之人。然則年亦白人而說焉。曾子何以於君子稱其年乎。且此異於詩稱君子萬年。亦異於成王冠辭稱遠於年。而惟曰宜其年。何以見年之久遠乎。記下文言外內合者。謂言行表裏如一也。阮說行內言外。未洽也。記下文云。疾其過而不補也。又云。補則不改矣。王氏引之說。

補讀爲遂。蓋遂古文補。形近而譌也。當從之。

朝有過。夕改。則與之。夕有過。朝改。則與之。

謹案記稱羊舌肸者曰。恥而不使其過宿也。如其所恥者。斯朝有過。夕改焉。國語曰。夜而計過。無憾而後卽安。如其不安者。斯夕有過。朝改焉。易曰。无咎者。善補過也。蓋善之。則與之矣。肸許密反

釋曰。稱羊舌肸者。此記衛將軍文子篇也。引國語者。魯語文。引易者。繫辭傳文。記上文云。惡人之爲不善而弗疾也。詳論語集注述疏疾之已甚章。

故曰者。心之浮也。言者。行之指也。

行去聲

謹案此孟子觀眸子而聽言之說所由也。左傳云。與駢曰。

使者目動而言肆。懼我也。魚府曰。右師視速而言疾。有異

志焉。此所謂以其見者占其隱者。

史音俞駢步邊反。使去聲。見賢遍反。

釋曰。引左傳者。文十二年及成十五年文。記上文稱君子言不尤者。則曰。君子亂言而弗殖。神言弗致也。道遠日益云。謂君子所言者。若行道遠日加益云然。故又接之曰。衆信弗主。亦於言相接焉。人言爲信也。馬氏釋史引道遠日益。刪云字。失之。阮氏據荀子。改云作矣。亦失之。蓋此不用云字。則上下文皆不貫也。荀子稱君子疑則不言。未問則不立。遂日益矣。此乃參錯曾子之言。而自爲文爾。豈引原文乎。樂記稱一動一靜者。天地之間也。故聖人曰。禮樂云。其爲文與此同。荀子不立。或曰。不自立言也。或曰。不立。

乃不言之譌也。

觀其所愛親。可以知其人矣。

謹案史記稱李克論相者曰。居視其所親。

釋曰。引史記者。魏世家文。

是故君子爲小由爲大也。居猶仕也。備則未爲備也。而勿慮存焉。

謹案由古通猶。惟下文用猶者四。則此當一例焉。傳錄者致異爾。是故君子者。承上文行身戰戰者而言。論語云。無小大。無敢慢。斯其所爲必不驕也。蓋爲小猶爲大也。孝經曰。居家理。故治可移於官。其言治則曰。治家者。不敢失於臣妾。而況於妻子乎。惟不敢失。然後居家理。而官仕之治。

可移也。蓋居猶仕也。皆行身戰戰者有然。此行身雖備則未敢以爲備也。惟慮亡而勿慮存焉。易曰。亡者保其存者也是故君子存而不忘亡。慮存者保其存而自念以爲備也。上文所以言殞身覆家。大者傾社稷也。戰戰者於慮存則勿然。下文皆承此意而申言之。

釋曰。盧注云。恆謙虛不忘危也。此以易通之。其義是矣。其文則宜脩之爾。孔氏說以爲居家於仕國未備也。阮氏從王氏說以爲勿慮如漢書之亡慮。釋爲大凡皆失之。亡讀若無。引易者繫辭傳文。記下文言承嗣者。孔讀爲承司。當從之。

是故爲善必自內始也。

謹案此孝經所謂行成於內也。大學所以言不出家而成教於國也。而偽古文孝經者乃以此上友而竄之。則稱子曰。閨門之內。具禮矣乎。嚴父嚴兄。妻子臣妾。猶百姓徒役也。夫烏知禮無於閨門之內。言臣妾之臣哉。今禮內則及本命篇可攷也。此曾子言內者。非惟自閨門而言也。

釋曰。偽古文孝經閨門章。司馬氏朱子采之矣。其未察於此歟。詳孝經答問。

君子之於子也。愛之而勿面也。使之而勿貌也。導之以道而勿強也。強上聲

謹案論語曰。愛之能勿勞乎。蓋不可以姑息也。其愛之而勿面可明矣。論語曰。有事弟子服其勞。蓋卑之事尊。職分

當然也。其使之而勿貌可明矣。論語伯魚言孔子之庭訓曰。學詩乎。又曰。學禮乎。孟子曰。中也養不中。才也養不才。又曰。父子之閒不責善。蓋教之以義方也。其導之以道而勿強可明矣。

釋曰。盧注釋勿面云。不形於面。釋勿貌云。不以貌勞徠之。是也。宜有申焉。姑息之愛。本禮檀弓曾子說也。教之以義方。隱三年左傳文。荀子大略篇有曾子此文者。無四也字。今大戴本則有。以有爲不蹙矣。今本或愛及使下。無二之字。與下文不一例。蓋其脫焉。記下篇曾子本孝云。出門而使。不以或爲父母憂也。盧注釋或如字。是也。阮氏以或通惑。非也。曾子制言篇。惑聞之。惑不作。或。今可推也。魯人有

與曾參同姓名者殺人。曾子之母以三告乃投杼而走。戰國秦策史記甘茂傳劉向新序皆傳之。其事有無。今難辯矣。殆設言未可知也。然阮氏謂其言背道乎人之同姓名。非曾子可奪也。其惑非曾子致之也。無傷於孝也。記下篇曾子立孝云。飲食移味。盧注云。隨所欲也。其說明矣。小戴記文王世子篇云。命膳宰曰。末有原。鄭注云。原再也。勿有所再進。蓋此必隨所欲而移易其味焉。阮氏云。移之言羨也。以郊特牲鄭注言之也。其說不晦歟。

曾子事父母

夫禮大之由也。不與小之自也。

謹案小戴記經解曰。由禮。書皋陶謨曰。自我五禮。爾雅釋

詰。由自義同。故此文則互明焉。與如論語禮與其奢也寧儉之與。曾子立事篇亦有論語此文。蓋偏與也。論語言禮之美者曰。小大由之。蓋不偏與其小之由也。

釋曰。夏小正傳釋獺獸祭魚者。則云。其必與之獸。何也。孔氏說云。與之者。許而謂之之詞。是矣。此猶公羊家說春秋與之也。而孔乃於此遂云。與謂也。非洽也。阮氏從之。其未審歟。記下文夫弟者三字。孔謂當在飲食以齒之上。是也。

曾子制言

今之所謂行者。犯其上。危其下。衡道而彊立之。天下無道故。若天下有道。則有司之所求也。

行去聲

謹案衡古橫字。讀曰天下無道故。其句例小戴記禮運有

焉。求謂求其罪也。

釋曰。盧讀曰故若。注云。且自如也。失其讀矣。記豈云故自若乎。記下文言興道者。謂起人稱道之士也。士要譽則不貴焉。其曰未。篤故也。胡爲其莫之間也。此記用倒文法也。君子之爲弟也。行則爲人負。無席則寢其趾。使之爲夫人則否。近市無賈。在田無野。行無據依。苟若此。則夫杖可因篤焉。爲人負爲野與墅通上與反依讀爲族杖讀爲村

夫人讀爲去聲夫音扶下則夫同賈音古
謹案行則爲人負者。弟宜代勞也。盧氏謂分重合輕。班白不任。弟達於道路也。曲禮曰。請衽何趾。衽臥席也。今無席則寢於兄事者之趾下。弟宜卑屈也。盧氏謂裁自容也。夫人謂非兄事者。否不可也。言君子於宜盡弟道者。雖則代

禮記子思子言鄭注補正

卷四

全

勞卑屈。皆爲弟之禮。宜然。若使之爲夫人。非兄事者。君子則不可。盧氏謂夫人行無禮也。君子近市而無賈售。蓋不貨殖也。野與墅通。詩小雅所謂中田有廬也。今田有廬。而君子在田。無廬寄別墅於其中。故曰無墅。盧氏謂田無廬也。蓋不學稼也。依當爲旅。孔氏廣森以古音而求之。負趾。否韻也。賈野旅韻也。易曰。旅于處。得其資斧。我心不快。此君子之行。無據旅也。蓋不貪留也。杖當爲材。中庸曰。必因其材而篤焉。今言君子苟爲弟行禮。無取惟市。惟田。惟旅之利。若此。則夫其材可因以濟達矣。上文所謂行之未篤者。無憂也。售音受處上聲

釋曰。盧爲負說。本王制及祭義也。詩小宛云。螺贏負之。又

云。式穀似之。負與似相韻。今之婦女負子者。其柔聲連言曰負負。猶古音之遺也。凡言古音者。多於詩得之。裁與纔通。論語云。非夫人之爲慟而誰爲。其文法可參焉。否爲不可。昭二十年左傳說義也。賈售詩谷風說義也。詩瞻卬云。如賈三倍。君子是識。易說卦所謂爲近利市三倍也。閔二年左傳稱衛戴公廬于曹。詩公劉毛傳云。廬寄也。今言無廬者。謂君子無廬寄焉。蓋廬寄別墅亦動辭也。與曰賈曰旅例同。貨殖學稼。論語說義也。言行禮及濟達者。皆承記上文而言。孟子說有達材之稱。阮氏說以君子之爲弟也。貫此節而言。以夫人爲老人。以夫杖爲老杖。謂皆篆文形近之譌。如其說。是所使爲老人則止。其於記曰使之曰則

否。豈叶乎。老者雖近市不買賣。雖在田不野宿。雖行路不羈旅。其言安老似矣。其言則凡老杖者。病添文也。如記文曰。則老杖可因篤焉。是何言歟。諸經之文。多言老者杖者。今乃老杖云乎。荀子有監門御旅之文。或疑爲據旅。非也。御古通迓。所謂逆旅也。監讀平聲。

富以苟不如貧以譽。生以辱不如死以榮。辱可避避之而已矣。及其不可避也。君子視死若歸。

謹案周官祿以馭富。古者富則必貴。貧則必賤。蓋言貧富而貴賤該焉。苟謂無恥苟且也。能無失譽乎。上文所以言有恥者重其不苟也。曲禮曰。臨財毋苟得。臨難毋苟免。蓋不苟富者尤當不苟生也。苟生則辱矣。是辱其身以辱其

親也。辱可避則避之。中庸引詩所謂旣明且哲以保其身也。孝經所以言身體髮膚受之父母不敢毀傷孝之始也。其不可避。論語所謂造次必於是顛沛必於是也。雖死而榮矣。孝經所以言立身行道揚名於後世以顯父母孝之終也。君子視死如歸。論語曾子所謂仁以爲己任死而後已也。故曰臨大節而不可奪也。君子人與。君子人也。達七到反

與平聲

釋曰。曲禮疏釋苟者以苟且言之。列女傳楚平伯嬴曰妾聞生而辱不如死而榮。此古語也。楚平王時且傳聞之矣。曾子酌焉。若如也。視死如歸。呂氏春秋士節篇有其文。吾不仁其人。雖獨也。吾弗親也。

謹案易之大過曰。君子以獨立不懼。蓋雖獨也。而君子不懼焉。所謂大者過也。

釋曰。盧注云。人而不仁。不足友也。故周公曰。不如我者。吾不與處。損我者也。與我等者。吾不與處。無益我者也。吾所與處者。必賢於我。此所引周公之言。實非周公之言也。此大失也。論語稱孔子告弟子者曰。汎愛衆而親仁。今謂人而不仁。不足友也。是也。曾子本諸孔子者也。論語云。無友不如己者。此孔子爲自脩之君子言也。夫友卽親之謂矣。惟不如己者。非不仁之謂也。論語云。回也其心三月不違仁。其餘則日月至焉而已矣。此孔子以顏淵勵二三子也。此自仁言之。而有不如己者。奚得曰吾不仁其人乎。且君子

自脩。其於不如己者。戒之以無友。爲其未成德也。若夫君
子成德。於是乎盛敎矣。此師道也。與友道不同。其受敎者。
不如己者也。於是乎盛敎而不自盛矣。此謙德也。故曾子
制言曰。良賈深藏如虛。君子有盛敎如無。謂成德焉。周公
若成德而至聖人者也。可不稽乎。呂氏春秋觀世篇云。周
公旦曰。不如吾者。吾不與處。累我者也。與我齊者。吾不與
處。無益我者也。惟賢者必與賢於己者處。此其言如告乎。
未成德者。歟。人皆有我。汎言之。猶可也。惟與處。則非必親。
孟子稱伯夷與鄉人處。非親也。今不曰不與親。而遽曰不
與處。將拒之乎。其汎愛衆之謂何。論語稱子夏云。可者與
之。其不可者拒之。夫可不可。非如不如之謂也。不可者不

仁也。不如者非不仁也。乃盧注所引者。其異文且曰。吾所與處者必賢於我。是周公自我也。此非周公之言也。史記魯世家稱周公起以待士者。一沐三握髮。一飯三吐哺。其待士也。亦惟其賢而已矣。豈謂必賢於我乎。韓詩外傳之言周公也。曰。布衣之士。所贊而師者十人。所友見者十二人。窮巷白屋所先見者四十九人。由是言之。亦惟其賢而已矣。豈謂必賢於我乎。如曰必賢於我。當是時。孰有賢於周公者哉。則周公孰與處哉。阮氏不察。乃用汪氏中說。謂此曾子引周公言。誤入盧注中。遂於記文吾弗親也下。登故周公曰三十七字之文。何其惑乎。阮氏於此引論語諸文。皆宜辯也。今詳論語集注述疏及論語答問。記上文云。

有知之則願也。莫之知。苟吾自知也。此曾子言君子進退皆可也。阮說亦失之。記下文云。舜唯仁得之也。孔氏從永樂大典本。不作唯以是也。昭二十六年左傳云。唯禮可以己之。其爲文略同。

國有道則駟若入焉。國無道則駟若出焉。如此之謂義。夫有世義者哉。曰。仁者殆。恭者不入。慎者不見使。正直者則邇於刑。弗違則殆於罪。駟音

謹案駟疾飛貌。盧氏說以詩云。駟彼晨風。鬱彼北林。若如也。形容之辭。行仁而宜之則爲義。去就出入之宜。義也用。舍刑賞之宜亦義也。此與上文仁義並言者不同而同。世義猶詩大雅稱世德也。言世世德義也。夫有世義者哉。問

辭也。曰。仁者殆云云。答辭也。此文法自爲問答也。盧氏曰。殆危也。仁者危之。恭者又不受也。邇近。遠去也。是也不見使不見用也。言君子如鳥疾飛然。其於國由宜入宜出之義。若問夫有世義者哉。斯告曰。世不義多端。弗守義而去。則危於罪也。論語曰。色斯舉矣。翔而後集。

釋曰。詩秦風序云。晨風。刺康公也。釋文云。鴼說文作鳩。毛傳云。鴼疾飛貌。晨風。鷦也。鬱積也。先君招賢人。賢人往之。駛疾如晨風之飛入北林。是也。反是以思。則去之疾出可知矣。詩沔水云。鴼彼飛隼。載飛載揚。毛傳云。言無所定止也。爾雅釋鳥云。鷹隼醜。蓋醜類也。記文。鴼或譌作突。阮氏從之。非也。易離象云。突如其來如。焚如。死如。棄如。苟言突。

若猶突如也。何取乎。王氏引之讀哉爲裁。謂義者裁。與仁者殆對文也。裁與災通。宋本有曰字。永樂大典刪之。戴氏震校本從之。孔氏本同。阮氏謂曰字衍。是皆不然矣。如諸本。夫有世三字豈不碎乎。仁與義可合可分。小戴記之表記詳焉。孟子云。爲是其智弗若與。曰。非也。此文法自爲問答之例也。與讀平聲。說文云。入內也。內與納通。猶受也。不入猶不受也。此與就若人焉之入義不同。記上文云。不通患而出危邑。通不作避。當從宋本。阮說以曾子避越寇言之。是也。記上文云。奉相仁義則吾與之聚羣。嚮邇寇盜則吾不與慮。相讀去聲。大典與慮上有不字。當從之。保傳篇云。此前有與計而後有與慮也。魯宣公以邑與莒僕。失司

冠之法。是嚮邇寇盜矣。見左傳文十八年。

曾子疾病

鷹隼以山爲巢而增巢其上。魚鼈黿鼉以淵爲淺而蹶穴其中。

卒所以得之者餌也。

蹶音關。餌忍止反。

謹案蹶猶闕也。誘而利之曰餌。若鳥若魚貪餌而亡。天下之餌人者巧矣。君子慎何如也。曾子瀕死而以此告其二子元與申者。欲其不惑於餌也。

釋曰。蹶荀子法行篇作掘。蓋掘而闕焉。荀子云。及其得也。必以餌故。史記蔡澤傳云。翠鵠犀象其處勢非不遠死也。而所以死者惑於餌也。淮南子云。釣魚者務在芳其餌。芳其餌者所以誘而利之也。說文。增或作曾。猶禮運增巢也。

卒下或有其字者。非原文。漢書王符傳云。夫鳥以山爲卑。而增巢其上。魚以淵爲淺。而穿穴其中。卒所以得之者。餌也。蓋用曾子此文。

與君子游。苾乎如入蘭芷之室。久而不聞。則與之化矣。與小人游。貸乎如入鮑魚之肆。久而不聞。則與之化矣。苾必反。貸讀爲臙。質力反。鮑

薄巧反。

謹案苾猶芬也。詩小雅曰。苾苾芬芬。蘭芷皆香草。屈子楚辭。每以爲君子美人比也。王氏引之曰。貸乃臙字之譌。臙膏液敗臭也。周官說。鮑者。於樞室中糗乾之。賈子曰。禮。鮑魚不登於俎。蓋以其蓄之不潔也。故以比小人焉。曾子瀕死。而以此告其二子者。欲其不忽於化也。樞音逼。乾音干。

釋曰。詩周頌云。有飫其香。釋文。飫。又作苾。則其芬香然也。攷工記。釋文引呂忱云。臚膏敗也。臚。與臚通。福室者。木逼土爲室也。俎。所以祭也。周官籩人。言朝事之籩者。其實有鮑。先鄭注云。朝事。謂清朝未食。先進寒具。口實之籩。此異乎後鄭以祭事言也。今攷司尊彝職言祭事者。曰朝踐。曰朝獻。而皆不曰朝事。故先鄭與賈誼說同。卽與曾子說同。朝讀若招。

曾子天員

龍非風不舉。龜非火不兆。鳳非梧不棲。麟非數不止。此皆陰陽之際也。茲四者。所以聖人役之也。

謹案禮說。蒼龍位東。玄武位北。龜象玄武也。易說。巽爲風。

位東南。離爲火。位南。離爲龜。周官說。龜卜。揚火灼之。作其兆。皆陰陽之際會也。詩大雅云。鳳皇鳴矣。于彼高岡。梧桐生矣。于彼朝陽。爾雅釋山云。山東曰朝陽。詩國風云。麟之趾。蓋趾者。止也。詩說。麟游必擇地。不履生蟲。不踐生草。故止于藪而宜。爾雅說。藪厚也。蓋得地陰之厚而能養也。故釋地列十藪焉。亦皆陰陽之際會也。禮運曰。四靈以爲畜。麟鳳龜龍。謂之四靈。畜則役之矣。朝如字

釋曰。大典本有鳳麟二句。蓋與下文茲四者相應也。此他本脫之無疑矣。阮氏不從。謂於陰陽之義無涉。豈其然乎。盧注以龍爲陰。與易乾爲龍者違矣。阮氏從之。非也。書禹貢云。嶧陽孤桐。謂嶧山東嚮早日者也。此梧桐特生焉。周

官大宰云。藪牧養蕃鳥獸。言藪之能養也。禮運云。鳳皇麒麟皆在郊藪。此統言之爾。郊外多高岡也。記上文言天員者。詳尙書集注述疏堯典篇。

武王踐阼

席前左端之銘曰。安樂必敬。前右端之銘曰。無行可悔。後左端之銘曰。一反一側。亦不可以忘。後右端之銘曰。所監不遠。視爾所代。忘讀爲息。監去聲。

謹案此王位南面之席也。安坐而樂。惟必敬焉。此爲諸銘之首而先言敬者。猶堯典先言欽也。敬則坐而起行者無行可悔矣。忘當作怠。猶古毛詩四聲通韻也。坐必正席。如一反一側而不正。是怠也。鴻範曰。無反無側。王道正直。今

雖反側閒亦不可以自怠。求至乎丹書所謂敬勝怠者也。蓋所監戒者今不遠。卽視爾所代席位焉。詩大雅曰。天位殷適。使不挾四方。周書多方曰。有邦閒之。閒代也。適與嫡通。挾子

變反閒去聲

釋曰。席銘六句成章。銘言所代者。代席位也。明此席爲王位南面焉。禮稱坐席曰席。臥席曰衽。此豈謂寢席而輾轉反側乎。眞氏德秀說宜辯焉。忘或作志。蓋以忘爲失韻。故於韻求之。惟反側雖志之。何濟乎。詩大明毛傳云。紂居天位而殷之正適也。挾達也。鄭箋云。天使政令不行於四方。是也。閒代。釋詁文。盧注以世代汎言之。則失席銘之文矣。記上文言爲子孫常者。常與行古音相韻。作恆者非也。上

文云。敬勝怠者強。怠勝敬者亡。強或作吉。亡或作滅。蓋異文也。學記疏詳之矣。荀子議兵篇與異文略同。惟強之爲文尤貫焉。故曰。凡事不強則枉。相承而言也。上文云。以不仁得之。以仁守之。其量十世。此讀史而其大略可知也。此或作異文者。譌也。

几之銘曰。皇皇惟敬。口生敬。口生听。口戕口。听許後反。戕在良反。

謹案几在坐席上。盧氏曰。几者人君出令所依。故以言爲戒也。其說明矣。皇大也。書無逸曰。則皇自敬德。蓋莫大於敬。故重言皇皇而大之。敬口者。謹言也。書甫刑曰。敬忌而罔有擇言在躬。孝經所謂口無擇言也。口生敬者。言出而人起敬也。孝經所謂言滿天下無口過也。听恥也。口生

听者書說命所謂惟口起羞也。盧氏曰。言爲君子榮辱之主。可不慎乎。口戕口者。盧氏謂口能害口。是也。大學曰。言悖而出者。亦悖而入。是自戕害也。此几銘辭用韻疏而反如密者。以敬口之文。倒之而連。故雖無韻之句。亦如毛詩句中有韻而成聲也。

釋曰。上二句從王氏應麟集解本。孔氏本云。皇皇惟敬。口生听。此脫文云爾。盧注釋几者。据周官司几筵職而知也。稱榮辱之主者。本易繫辭傳也。生敬者榮。生听者辱。以盧注推之。知集解本猶盧本之舊也。其義備其文美。孔氏謂恐後人所加。非也。書甫刑。今呂刑也。此從禮表記所引文。說文云。詬恥也。听與詬通。尙書說。戕害也。詩正月云。好言

自口。莠言自口。蓋民之訛言所生不同矣。況君之出令乎。書梓材。武王敎告之言也。其言曰。無胥戕。胥相也。彼謂白人毋相戕矣。此謂自口毋相戕也。

楹之銘曰。毋曰胡殘。其禍將然。毋曰胡害。其禍將大。毋曰胡傷。其禍將長。

謹案楹柱也。左傳言叔孫惡季孫者云。叔孫指楹曰。雖惡是其可去乎。明此諸侯之相。古且喻以室之柱也。況天子之相乎。盧氏曰。夫爲室者慎其楹。君天下者難其相也。善矣。胡何也。殘壞也。毋不察將來。而曰此楹何殘。其禍將有殘然者。毋不知大謀。而曰此楹何害。其禍將有害大者。毋不憂長日。而曰此楹何傷。其禍將有傷長者。從古王室之

傾其相皆非如詩所謂有覺其楹者也。

惡鳥路反相去聲

釋曰。楹柱。說文義也。論語八佾篇皇疏云。其柱盈盈而立也。引左傳者。昭元年文。或疑盧氏指楹爲相者。不稽此傳爾。戰國策亦稱官爲柱國焉。詩鄘風有胡然之文。詩說胡何也。凡木之殘破者。謂之壞木。真氏云。殘害也。則記文不複乎。詩斯干毛傳云。有覺言高大也。鄭箋云。覺直也。

觴豆之銘曰。食自杖。食自杖。戒之僑。僑則逃。

僑與驕通

謹案。觴酒豆肉。此以養老而言也。自由也。王制曰。六十杖於鄉。七十杖於國。八十杖於朝。九十者。天子欲有問焉。則就其室。以珍從。此其杖不言而可知也。鄉飲酒義曰。六十者三豆。七十者四豆。八十者五豆。九十者六豆。此以杖之

等爲豆之等。蓋食由杖也。僑古通驕。養老必敬。不可驕也。今以孟子推之。伯夷太公避紂。居海之濱。聞文王作。皆興曰。盍歸乎來。吾聞西伯善養老者。夫有所歸。則有所逃矣。武王敢不戒歟。

釋曰。盧注云。無求醉飽。自杖而已。其釋杖豈叶乎。故無以釋逃矣。注家皆因之。非也。坊記云。觴酒豆肉。讓而受惡。民猶犯齒。今酌焉。樂記喬志。釋文。喬音驕。本或作驕。今銘言僑者驕志也。其義皆通也。

戶之銘曰。夫名難得而易失。無勸弗志。而曰我知之乎。無勸弗及。而曰我杖之乎。擾阻以泥之。若風將至。必先搖搖。雖有聖人弗能爲謀也。

勸音勸。杖讀爲材。擾古音撓。女巧反。爲去聲。謀古音媒。

謹案此武王因所居戶而念天下扁表有名之戶。又以堦戶寓先事戒也。說文。扁。从戶冊。說云。署也。蓋署其戶也。續漢書志曰。凡有孝子順孫。貞女義婦。讓財救患。及學士爲民法式者。皆扁表其門。此本乎武王表商容之間也。天下貴有名之戶焉。其名不可多得。是難得也。其名本非求知。是易失也。勲與勤通。詩之賚曰。文王既勤止。斯武王稱焉。及。謂恩及。如復及其戶。勿事徭役也。漢書曰。復其身及戶。杖當爲材。古以材通裁。今言裁制其恩及之宜也。蓋勲則能署志有名之戶。無勲則弗志。而乃曰我得其名知之乎。勲則能復及有名之戶。無勲則弗及。而乃曰我量其及裁之乎。擾撓也。論語公山弗擾。左傳作不狃。是擾與撓諧聲。

而義生矣。說文云。撓擾也。今轉注焉。今時人亦有撓阻之言。此銘則撓阻簞戶。使不搖搖也。泥謂瑾戶也。幽風毛傳曰。瑾塗也。庶人簞戶。蓋以荆竹爲門。因其通風。故泥之也。簞戶雖在庶人。惟以此戶銘推之。則武王所居戶。蓋猶有存幽風瑾戶之舊者。故其銘如斯也。謀古讀若媒。武王未風而先謀其戶。周公未雨而綢繆其戶。斯寓戒意同。蓋王居之戶。通於天下之戶。而爲首戶焉。武王戶銘。其義大哉。

扁補典反徭音遙
瑾音甄簞音畢

釋曰。盧注說以名爲中庸言武王不失名之名。其釋杖如字。以爲杖立。皆汎言之。此何以爲戶銘乎。朱子云。杖別本作枝。孔氏謂以韻讀之。當從枝。蓋枝支也。亦汎言之。或曰。

如世所稱支撐門戶者歟。然於上文言志者。又不貫也。且銘如毛詩文。經緯之以雙聲疊韻。其用韻者。不以同音淆之。詩序所謂聲成文。謂之音也。如枝之與知。之則同音矣。豈得如詩芣苢篇。采之有之。諸文例乎。或曰。杖讀如字。檀弓稱孔子蚤作。負手曳杖。消遙於門。旣歌而入。當戶而坐。由是言之。其常日豈不於戶杖之乎。武王踐阼。年六十餘矣。然於戶杖之。奚取乎。言商容者。據史記周本紀也。引漢書者。高帝紀文。喪大記。鄭注云。裁猶制也。字或爲材。古通用焉。大戴禮少閒篇云。君如財之。財猶材也。書呂刑云。何度非及。彼刑及而度之。此恩及而裁之。其事不同而理同。度徒洛反。盧氏文弼云。擾乃擾字之譌。服虔注揚雄賦云。

變古之善塗墍者。王校此篇云。一本無阻字。則當作獲以泥之。然武王爲銘。乃如漢賦之言宮室也邪。獲乃高反。未雨綢繆。詩鴟鴞說義也。戶銘辭得失韻也。志知材泥至謀皆古韻通也。銘辭或有不用韻者。此猶詩周頌亦或不用韻也。其聲必成文。雖無韻如有韻然。記上文杖銘言嗜慾者。孔氏欲倒其文以與上下文爲韻。非也。詩大雅云。匪棘其欲。釋文本欲作慾。禮器引文欲作猶。此古音也。記下文弓銘言自過者。屈申之過也。故雜記云。一張一弛。文武之道也。眞氏大學衍義云。銘凡十有四。今摘其辭義易知者。蓋眞氏摘席鑑。盤。楹。杖。牖。劒。矛之銘也。由今攷之。如得其釋。可無摘焉。集解本引太公陰謀及金匱諸銘。託於武王。

爲之也。其不及此記文遠矣。此記文可補書亡者也。

衛將軍文子

夫子之門人蓋三就焉。

謹案就如就有道而正焉之就。三就者猶孟子於舜言天下之士多就之者也。易曰革言三就。蓋三者數之參天而取數多也。

釋曰。盧注云。三就謂大成。次成。小成也。此於下文不相承矣。盧於下文注云。先就夫子。其言就是也。僞家語云。蓋三千就焉。夫三千云者。史家言之可矣。子貢對問時。就者曰至。可遽定爲三千乎。故七十有餘人者。亦文子以所聞爲辭。而子貢對問。則不以七十之數言也。周官巾車注以三

就爲三匝。或以言此文強矣。記上文云。道者孝悌者。如字。孔注以者通諸。非也。其下不自有諸之爲文邪。記下文辯知猶徧知。曲禮文可推矣。衛將軍文子篇。諸賢之行狀也。論語集注述疏多引之而酌其注焉。其言顏淵者詳問爲邦章。其言冉雍者詳仲弓問仁章。其言仲由冉求公西赤者詳孟武伯問子路章。其言曾參者詳召門弟子章。其言顓孫師者詳子張問仁章。其言卜商者詳門人問交章。其言澹臺滅明者詳武城得人章。其言南宮縚者詳三復白圭章。其言高柴者詳柴也愚章。其言隨武子者詳陳力就列章。其言桐提伯華者詳子張問達章。其言蘧伯玉者詳樊遲從遊章。其言晏平仲者詳善與人交章。其言老萊子

者詳子張學干祿章其言介山子推者詳謀道不謀食章若此節言施教者詳興於詩章合而觀之若苟完矣是顏淵之行也。

謹案顏淵稱氏稱字而稱同名者出之孔子言中則備矣特於顏淵稱字者以見子貢對問時於孔門諸賢皆名字備稱也今省文爾。

釋曰。記下文云。此顓孫師之行也。今本或但作顓孫失之。盧注云。顓孫師陳人也。据此注文則記文豈獨稱氏乎。記下文羊舌大夫稱氏稱官。如惟曰羊舌可乎。孔子於羊舌肸諸賢皆稱其著稱者。如論語例然。柳下惠以諡著稱。故稱展禽。稱柳下季不如斯著也。介山子推左傳稱介之推。

子者以美稱配字之者以語助配稱猶孟子反亦稱孟之反也。

孝思維則。

謹案孝思維則當作昭哉嗣服爾雅曰嗣繼也服事也又釋顯昭義同孔子所以申其義爲世顯也服古音逼此因詩前章通韻而致誤焉。

釋曰。盧注云。孝思維則此文在前章兼以說之故連言之也。非也。安有說經而淆者乎。故盧於世顯無以爲說矣。注家皆因之。或且以爲斷章取義也。何其失邪。夫斷章者豈顛之倒之邪。僞家語襲此記文其誤亦同。蓋王肅所見本已然矣。詳論語說維或作惟引爾雅者釋詁文。

孔子曰。有土君子。有衆使也。有刑用也。然後怒匹夫之怒。惟以亡其身。詩云。靡不有初。鮮克有終。以告之。

謹案此承上文而言孔子之教也。其曰然後者。明其恃衆力刑威然後乃輕匹夫而妄怒也。詩大雅蕩篇。有土君子。怒以自亡。是有初無終也。言以告之者。謂孔子以此教冉雍而告之也。論語曰。雍也可使南面。夫南面者。非有土君子歟。賈誼過秦論云。一夫作難而七廟墮。身死人手。爲天下笑。此於孔子所告者何如也。墮許規反

釋曰。論語云。出門如見大賓。使民如承大祭。此告冉雍仲弓之言也。豈敢謂有衆使也乎。又豈敢謂有刑用也乎。此必無輕匹夫而妄怒也。或曰。有土君子。若怒匹夫之所怒。

則足以亡身。非也。湯爲讎餉匹夫而復讎。豈不怒匹夫之所怒乎。賈誼論見史記陳涉世家。或曰。冉雍仲弓爲季氏宰者。無臣也。記上文云。使其臣如藉。何也。此言臣者服役通稱也。周官云。大宰以九職任萬民。八曰。臣妾聚斂疏材。鄭注云。臣妾男女貧賤之稱。此臣以民職言也。揚雄方言云。荆淮海岱雜齊之間。罵奴曰臧。罵婢曰獲。蓋臧文從臣。亦可明也。

夫子知未以文也。曰。詩云。受小共大共。爲下國恂蒙。何天之寵。傳奏其勇。夫強乎武哉。文不勝其質。

共同恭恂讀爲駿何上聲傳讀爲敷夫音扶

謹案論語記孔子告仲由子路者。則稱文之以禮樂。蓋知子路未以文也。曰者。孔子教子路之辭。詩商頌長發篇。詩

上文曰。受小國是達。受大國是達。此所受小大。則承國而
言。共。古通恭。左傳曰。翼戴天子而加之以共。故詩下文曰。
允也天子。蓋小大國敬共之辭。恂蒙荀子作駿蒙。恂與駿
通。大也。蒙覆也。言湯受小國大國之敬共。而能爲下國大
覆也。此文德也。何在也。傳毛詩作敷。徧也。秦進也。言湯能
任天之寵命。徧進其勇。此武功也。蓋文德在武功中。夫強
乎武哉。明不徒勇也。今則文不勝其勇質。明未以文也。聲去

釋曰。此記文從孔氏校本。詩說共猶恭也。引左傳者。昭九
年文。或曰。此記上下文言恭者數矣。皆不作共。何也。此引
古從詩原文故也。非自歧也。恂蒙毛詩作駿。蓋毛詩受

之荀子焉。厯莫邦反。與蒙通。猶詩狐裘蒙戎。左傳作彤茸也。毛訓大厚。非蒙本義矣。今訓大覆。周書所謂不冒也。蓋與詩上文爲下國綴旒者例同。駿大。釋詁文。蒙覆。詩鄘風毛傳義也。盧注云。恂信也。言下國信蒙其福。由今攷之。恂信。釋詁文。此盧所見爾雅本也。惟不添其福之文。則爲信蒙者何邪。盧引詩駿龐。與僞家語同。詩長發疏釋何者。以荷任釋之。敷徧。詩賁鄭箋義也。說文云。奏進也。記下文云。禮儀三百。威儀三千。則難也。僞家語襲此文。於禮儀三百下。則竄之云。可勉能也。校禮者不察。遂以所竄者添記文。盧氏因而注之。誤矣。禮器云。經禮三百。曲禮三千。其致一也。經禮自全體言。統之爲禮儀也。曲禮自偏端言。分之爲

威儀也。故中庸云。禮儀三百。威儀三千。待其人而後行。則皆難也。奚有謂勉能三百者反不難乎。

先成其慮。及事而用之。是故不忘。是言偃之行也。孔子曰。欲能則學。欲知則問。欲善則肄。欲給則豫。當如是。偃也得之矣。肄以智反

謹案大學曰。知止而后有定。定而后能靜。靜而后能安。安而后能慮。此所以爲先成其慮也。大學遂曰。慮而后能得。蓋得乎大學所謂事有終始者矣。此所以爲及事而用之也。以是之故。則不忘其事矣。孟子所謂必有事焉而勿忘者。在子游則不忘矣。肄從尸子引文。据古本焉。肄習也。左傳曰。肄業及之。給相足也。史記曰。禹爲人敏給克勤。蓋知能在于學問。學問知能之善在于肄習。其善之給足在于

豫備。所謂先成其慮及事而用之也。中庸曰。凡事豫則立。今以論語推之。言偃子游論子夏之門人小子。以爲其本無先傳也。雖未別其爲小子。然子游先事而豫之心亦可見矣。若夫學道之教。昔聞而不忘。其先爲武城中君子小人慮者。皆豫期其善。以給公事牛刀之用。故曰。當如是。偃也得之矣。

釋曰。不忘。別本作不妄。今從舊本。倪氏思云。孟子必有事焉而勿正心。當作必有事焉而勿忘。勿忘。勿助長也。疊二勿忘。作文法也。顧氏炎武云。書無逸曰。自時厥後。立王。生則逸。生則逸。不知稼穡之艱難。亦疊文也。禮祭義云。見閒以俠。鄭氏曰。見閒當爲覯。亦一字而分誤也。今引孟子

者。非必從倪說焉。從朱子本亦可也。唐魏徵羣書治要。宋太平御覽。引尸子處道篇云。孔子曰。欲知則問。欲能則學。欲給則豫。欲善則肄。其序與記文不同。而皆通也。彼以知能序焉。記以學問序焉。彼序以豫而肄焉。記序以肄而豫焉。肄。今記文作訊。或作詳。皆形近而譌也。訊與問複。詳於知善得之。於能善未悉也。又今記文善大典作行。於能得之。於知遺矣。當如是。從別本不倒三字句也。引左傳者。文四年文。杜注云。肄習也。說文云。給相足也。引史記者。夏本紀文。大戴禮五帝德篇稱禹者云。敏給克濟。此史遷所本也。尙書大傳云。多聞而齊給。釋詁云。齊速疾也。猶敏也。記上文言卜商者云。學以深。厲以斷。送迎必敬。上友下交。銀

乎如斷。其言斷者相應也。斷于亂反。皆讀去聲。或曰。如斷者。易所謂二人同心其利斷金也。讀斷上聲。多管反。與以斷讀不同。今自本文言之。謂惟金乃如子夏之斷。非謂子夏如金之斷。前讀長矣。記下文盧注云。一皆也。開蟄不殺。則天道也。方長不折。則恕也。恕則仁也。

謹案天道生生不窮者也。皆仁也。此上下互文也。論語曰。能近取譬。可謂仁之方也已。蓋近而取其譬比者。以恕行焉。今隨時而譬比及物矣。明乎彼此皆欲生生也。曾子大孝篇稱夫子曰。伐一木。殺一獸。不以其時。非孝也。孟子曰。親親而仁民。仁民而愛物。

釋曰。開蟄猶啟蟄也。其與文非以漢避諱而然也。夏小正

云。正月。啟蟄。小戴記月令云。仲春之月。蟄蟲咸動。啟戶始出。其文皆不諱也。易繫辭傳云。生生之謂易。言天道也。程子云。周茂叔窗前草不除去。問之。云與自家意思一般。蓋仁者性情若斯也。言非孝者。小戴記祭義篇略同。曾子制言篇云。殺六畜不當。及親。吾信之矣。夫殺物不當時。其勢將殘而殺人。故禍及其親。彼不信者。豈不謂言之過歟。君子觀於亂世之賊民若斯也。有不同。曾子信之矣乎。故體仁者。異乎釋氏戒殺之爲。而其人則藹藹然也。思及當皆讀去聲。

羊舌大夫。晉國之良大夫也。

謹案此羊舌肸叔向也。其先人有以氏著稱者。人皆不名。

之。而惟稱曰羊舌大夫。生羊舌職。職生肸。亦爲大夫。今晉平公以肸問於祁奚者。則以其先人羊舌大夫之稱而稱之。貴其世爲賢良也。肸欣入聲

釋曰。閔二年左傳云。羊舌大夫爲尉。杜注云。羊舌大夫。叔向祖父也。左傳遂紀其言。太子申生者。則云。羊舌大夫曰。不可。違命不孝。弃事不忠。蓋其以氏著稱。人皆不名之也。故晉語云。太子曰。吾聞之。羊舌大夫曰。事君以敬。事父以孝。亦惟稱氏焉。奚與奚通。晉語云。公知祁奚之果而不淫也。使爲元尉。知羊舌職之聰敏肅給也。使佐之。此在悼公時矣。成十八年左傳所謂祁奚爲中軍尉。羊舌職佐之也。韋注云。羊舌職。晉羊舌大夫之子。蓋韋亦如杜。無以注職。

父之名也。禮說云。羊舌子好正。不容於晉。去而之三室之邑。邑人相與攘羊而饋之。羊舌子不受。其妻懼又不容於三室之邑。受而埋之。及事發。都吏至。發而視之。明已不食。則羊舌尚存。都吏曰。君子哉。羊舌子不與攘羊之事矣。此蓋据列女傳及左傳疏引譜說而約言之。列女傳謂羊舌子之妻叔向之母也。乃傳聞之失爾。襄三年左傳云。祁奚請老。晉侯問嗣焉。稱解狐。其讎也。將立之而卒。又問焉。對曰。午也可。於是羊舌職死矣。晉侯曰。孰可以代之。對曰。赤也可。於是使祁午爲中軍尉。羊舌赤佐之。君子謂祁奚於是能舉善矣。稱其讎不爲諂。立其子不爲比。舉其偏不爲黨。杜注云。午。祁奚子。赤。職之子。伯華。偏廌也。釋文。比。毗志。

反。襄十六年左傳云。春葬晉悼公。平公卽位。羊舌肸爲傅。祁奚爲公族大夫。杜注云。肸叔向也。祁奚去中軍尉爲公族大夫。去劇職就閒官。孔疏云。傅太傅也。由是言之。晉平公以肸問於祁奚者。必在肸未爲太傅之先。奚猶退老時也。故每言肸位而無及傅焉。此平公以奚能舉善而問之也。奚之言肸曰。每位改變。未知所止。言位進德亦進也。則明此羊舌大夫爲稱肸矣。稱之以其先人之著稱也。如問其先人羊舌大夫。豈不知所止乎。盧注傳本於此多誤。注家存疑。今酌焉。記下文言其闕知之者。孔說云。闕猶奄也。言盡知之。或曰。言汝久居其所。雖閉門時事亦知之也。其言侯大夫者。孔說云。侯字誤。蓋侯大夫也。當從之。晉官有

元候候奄。据左傳國語而知矣。以記文攷之。曰其端也者。言其在位之見端也。其功未著矣。曰其功也者。言其在位之有功也。其志未盡矣。曰其志也者。言其在位之懷志也。故曰未知所止。此平公所由以胙爲太傅也。舊說失之。昭二年左傳云。叔向曰。吾聞之曰。忠信禮之器也。卑讓禮之宗也。則其悉善而謙從可知也。襄二十九年左傳云。吳公子札適晉。說叔向。謂曰。吾子好直。必思自免於難。昭十四年左傳云。仲尼曰。叔向古之遺直也。則其信而好直從可知也。襄二十七年左傳云。宋人享趙文子。叔向爲介。司馬置折俎。禮也。仲尼使舉是禮也。以爲多文辭。昭十五年年左傳云。叔向曰。三年之喪。雖貴遂服。禮也。則其溫良而好禮。

從可知也。昭十三年左傳云。叔向曰。取國有五難。有寵而無人。一也。有人而無主。二也。有主而無謀。三也。有謀而無民。四也。有民而無德。五也。昭五年左傳云。楚王欲敖叔向。以其所不知而不能。襄二十七年左傳云。宋公兼享晉楚之大夫。趙孟爲客。子木與之言。弗能對。使叔向侍言焉。子木亦不能對也。則其博聞而時出從可知也。或曰。晉語云。羊舌肸習於春秋。乃召叔向使傳太子彪。謂悼公召之也。今祁奚言每位所爲者。何以不及其傳太子乎。蓋太子彪者。平公也。此公固知之矣。故不及焉。記上文云。不克不忌。不念舊惡。蓋伯夷叔齊之行也。論語稱之曰。不念舊惡。怨是用希。君子知清者之量焉。僖九年左傳紀晉惠公者。以

其將爭國也。公孫枝對秦伯之問曰。今其言多忌克。難哉。公曰。忌則多怨。又焉能克。若晉惠公者。烏知讓國者其心豁然乎。

蓋趙文子之行也。

謹案趙文子者名武。其諡曰文子。美稱也。趙氏小戴記檀弓曰。文子其中退然如不勝衣。其言呐呐然如不出諸其口。所舉於晉國管庫之士七十有餘家。生不交利。死不屬其子焉。蓋可以參此記所稱者矣。古者冠禮。父命之。兄禮之。遂以摯見於鄉大夫。鄉先生。國語曰。趙文子冠。見范文子。文子曰。而今可以戒矣。夫賢者寵至而益戒。不足者爲寵驕。見韓獻子。獻子曰。戒之。此謂成人。成人在始與善。始

與善。善進善。不善蔑由至矣。始與不善。不善進不善。善亦

蔑由至矣。君子於以知趙文子之行所由成也。

勝平聲。訥音。

燭冠去聲。墊與贊通。蔑亡結反。

釋曰。檀弓鄭注云。中身也。尙書說。蔑無也。記上文言敦往者。敦猶效也。往如易象多識前言往行之往。孔說云。文子觀乎九原。亦敦往也。

蓋隨武子之行也。

謹案隨食邑也。武諡也。子以配稱。蓋土會也。其曰隨季。配字稱焉。又稱范武子。范亦食邑也。檀弓言趙文子與叔譽觀乎九原。遂論死者誰與歸也。曰。我則隨武子乎。利其君不忘其身。謀其身不遺其友。晉人謂文子知人。國語敘文。

子所言者。則曰。納諫不忘其師。言身不失其友。事君不援而進。不阿而退。左傳敘文子對楚子木問武子者。則曰。夫子之家事治。言於晉國無隱情。其敘楚王聞文子所言者。則曰。宜其光輔五君以爲盟主也。今讀記文者。參焉。援兩元反釋曰。記上文云。其事君也。不敢愛其死。然亦不忘其身。此從舊本。其事君下有也之爲文。斯起勢分焉。不忘或作不亡。誤矣。忘如論語言惑者忘其身之忘。蓋不忘其身者。守死善道之義也。其義通乎孝經矣。禮運有愛其死之文。與此記文同而義不同。彼言愛其死之善道也。故曰。皆愛其死。而患其生。此言愛其死之苟免也。故曰。不敢愛其死。然亦不忘其身。各以其上下文求之。斯各當矣。檀弓鄭注云。

叔譽叔向也。晉羊舌大夫之孫名肸是也。禮說云。說文肸。嚮布也。嚮知聲蟲也。省文作肸。故又作向。其實嚮譌譽爾。國語敘此者作叔向。禮疏引韓詩外傳同。國語韋注釋納諫不忘其師云。言聞之於師。釋言身不失其友云。身有善行。稱友之道。釋事君不援而進。不阿而退云。阿隨也。言不隨君。必欲進賢退不肖。而釋援闕焉。友之道與導同。其釋上二句得之。下二句失之。乃不與此記言進退者符矣。儒行云。舉賢援能。蓋舉必援之。互文也。說文云。援引也。如以進賢釋之。何以謂不援而進乎。今據魯語韋注云。援所攀援以爲助也。當以釋晉語此文。蓋與此記言介山子推不援者同。中庸言君子者曰。在下位。不援上。此不援而進也。

故記曰。君陳則進。虞書言舜戒禹曰。汝無面從。退有後言。此不阿而退也。故記曰。不陳則行而退。其退必曰行而退者。明非退朝已也。論語曰。三日不朝。孔子行。禮說云。文七年左傳云。士會在秦。三年不見士伯。及歸。遂不見士伯者。先蔑也。晉使先蔑。士會如秦。逆公子雍。將立爲君也。旣而背之。立靈公。先蔑奔秦。士會從之。此其在秦之由也。其始終不見士伯者。避黨謀之嫌也。所謂謀其身不遺其友者。此亦一端也。記下文言淵泉者。若中庸所謂淵泉也。朱子云。淵泉靜深而有本也。言難誕者。難猶堯典而難任人之難。蓋阻也。今謂詰難而阻不行也。誕大也。今謂誕妄者大言欺人也。多聞大智。故能詰難其誕妄焉。釋詰阻難義同。

誕大釋詁文難讀去聲任讀平聲孔說云難誕不可欺也。讀難如字。然難豈不可乎。如曰難欺。非猶有可欺乎。言內辭者。猶堯典所稱納言也。內古通納。不內辭則默矣。足以沒世終身自樂也。下文云其言足以興。當從史記集解引文。中庸云國有道其言足以興。國無道其默足以容。視此記文少家字爾。其義皆同。國可該家也。說苑云孔子曰銅鞮伯華無死。天下其有定矣。蓋謂其知國家有道無道而定之也。羣書治要引尸子勸學篇云孔子曰自娛於隳枯之中。直己而不直人。以善廢而不悒悒。蓋蘧伯玉之行也。韓詩外傳與尸子同。惟善上無以字。史記索隱引大戴禮者。自不直人而上與尸子同。其下則云汲汲于仁以善存。

亡。盧注本作以善存亡汲汲。今當從盧注本。蓋記原文也。悒悒者汲汲之譌。以聲近故也。尸子引文或作邑邑。古人口相傳授者多。故雖譌而仍在句末。夫伯玉自史魚尸諫後。進爲大夫。而非終以善廢也。奚爲統稱其以善廢而不悒悒乎。以論語求之。孔子曰。君子哉蘧伯玉。邦有道則仕。邦無道則可卷而懷之。固稱其仕矣。伯玉之使對孔子之問曰。夫子欲寡其過而未能也。非所謂以善存亡汲汲乎。僞家語於此則云。汲汲於仁。以善自終。校禮者不得此記原文之義。又不知家語之僞也。故以家語竄之。而又不盡從之。故仍留記原文曰。以善存亡。奚不思以善非存則亡。故汲汲爾。今旣汲汲於仁。則以善存。非以善亡也。可弗辯。

歟。隱括者。正邪曲之器也。讀若隱括。

約貨亡怨。

亡與無通。

謹案約。窮也。呂刑言治獄者之疵者曰。惟貨。故曰。獄貨非寶。惟府辜功。蓋辜功者。罪事也。罪事之府。怨府也。柳下惠爲士師。不獄貨。則窮於貨焉。而民亡有怨矣。或曰。以孟子言之。阨窮而不憫。約貨也。遺佚而不怨。亡怨也。辜音孤。

釋曰。記上文云。孝恭慈仁。允德圖義。當從史記索隱引文。此亡怨亦從之。釋詁云。允。信也。圖。謀也。記下文。言易行者。平易行事而不行險也。中庸曰。君子居易以俟命。小人行險以徼幸。記文觀於四方句。當無也字。孔說云。觀於四方。謂從亡時也是也。僖二十四年左傳。紀介之推言身將隱。

者則稱其母曰。能如是乎。與女偕隱。遂隱而死。其不盡其樂。從可知也。而誣者辯焉。莊子云。介子推至忠也。自割其股以食文公。文公後背之。子推怒而去。抱木而燔死。蓋莊周寓盜跖言而誣之爾。此記若亡。將何以辯誣哉。其懸書宮門。以文公爲龍。以五臣爲蛇。而子推乃一蛇獨怨者。則史記晉世家言之矣。

五帝德

謹案太史公曰。學者多稱五帝。尙矣。然尙書獨載堯以來。而百家言黃帝。其文不雅馴。薦紳先生難言之。孔子所傳宰予問五帝德及帝繫姓。儒者或不傳。予觀春秋國語。其發明五帝德帝繫姓章矣。顧弟弗深考。其所表見皆不虛。

書缺有間矣。其軼乃時時見於他說。非好學深思心知其意。固難爲淺見寡聞道也。

弟與第通間去聲軼音逸

釋曰。太史公官名。司馬遷自稱其官。所以明其爲史職也。史記張注云。馴訓也。蓋以雅訓釋之。今攷古義。訓與順通。此言不正順也。詩序云。雅者正也。薦紳內則所謂搢紳也。禮說章明也。弟古第字。但也。顧儒者不傳。但失考爾。張注以爲史遷且不須考。非也。書缺謂尙書多亡者。軼謂散軼也。

夫黃帝尙矣。女何以爲。先生難言之。宰我曰。上世之傳。隱微之說。卒業之辨。闇昏忽之。意非君子之道也。則予之問也。固矣。

音女

汝辨與徧通意古抑字又意如字

謹案辨古通徧與下文辨聞同。漢石經論語意與抑通。今記文亦然。或曰意如字。謂已意。固猶魯仲連曰固也之固。孔子詰宰予何以爲問。善誘多術也。子對言上世傳說隱微。學者須畢業之徧。如闇昏而忽略之。意非君子學問之道也。則以爲問固有斯矣。故孔子遂告之。

釋曰。記文昏字。戴氏校本刪之。蓋誤從意字絕句焉。五帝德篇盧注闕。孔說云。固陋也。夫旣云陋矣。孔子當有言此爲陋與不陋者以明之。然後乃如所問者以告之。今豈若斯乎。引固也者。見戰國趙策。孟子云。教亦多術矣。此論語所以稱善誘也。

極畋土石金玉。

畋音田

謹案畋治田也。黃帝畫塋治田地上。其地之上下皆土者。畋之。其地之下有石金王者。亦畋之。故曰極畋。明黃帝時民農而不貪。未有礦禁焉。廿古礦字。周官。廿人掌金玉錫石之地。而爲之厲禁以守之。若以時取之。則物其地圖而授之。塋同野礦。古猛反。

釋曰。說文云。畋平田也。蓋平者治也。書多方云。畋爾田。漢書地理志云。黃帝畫塋分州。塋古野字。周官鄭注云。物地占其形。知鹹淡也。鄭司農云。厲遮列守之。是也。蓋所謂藩界也。極畋。史記作水波。徐廣曰。波一作沃。此史記自有譌文。未可反据以疑此禮文也。或曰。史文以永代極。遂譌爲水爾。禮上文云。麻離日月星辰。此續漢志所以言黃帝。

造麻元也。今据易彖傳云。離麗也。日月麗乎天。詩小雅云。月離于畢。夫畢者星也。辰爲星之次。是日月星辰皆麻離也。史記以麻離爲有羅。乃以訓詁代之。如帝紀中以訓詁代尙書文也。其所代非尙書原文矣。夫禮文麻離。惟言日月星辰而止。豈可及水波土石金玉乎。史文有羅。則下及之似矣。其實又史文之譌也。禮下文云。節用水火材物。史文亦同。是至此乃言水也。史文豈先及水波而自滑乎。索隱乃以海不揚波言之乎。如曰有羅水沃。則於文未適也。以是知史文之譌也。或曰。禮文畋疑作攻。蓋攻者治也。非也。曲禮言土工。金工。石工矣。而不言玉工。攷工記言攻金之工矣。詩小雅言他山之石。可以攻玉矣。則攻石可知也。

而皆不言攻土。如曰。詩靈臺。土工也。亦木工也。石工也。其
詩曰。庶民攻之。然黃帝時。安見於此。極攻乎。禮上文云。乘
龍展雲。孔說云。周官曰。馬八尺以上爲龍。黃帝以雲紀官。
故亦展雲也。周制。天子斧展。上文云。死生之說。存亡之難。
孔說云。若黃帝內經。素問也。難讀去聲。上文云。時播百穀。
草木。化淳鳥獸昆蟲。孔氏本。草作艸。從古文也。史遷言五
帝德。及帝繫姓者。則云。總之不離古文者。近是。孔意所由
也。然今禮文。可盡從古文乎。此猶尙書。今文以隸古爲宜
也。化淳。猶易言萬物化醇也。別本。化淳上衍故教二字。非
文法也。禮下文云。勞勤心力耳目。或無勤字。斯脫之爾。今
從史記。

孔子曰。五帝用記。三王用度。女欲一日辨聞古昔之說。躁哉予也。宰我曰。昔者予也。聞諸夫子曰。小子無有宿問。辨音

謹案。尚書大傳曰。乃命五史以書五帝之蠱事。易傳曰。蠱者事也。蠱則飭也。蓋五帝之史。其記事有待飭而未遽爲制度者。故曰五帝用記。論語曰。殷因於夏禮。所損益可知也。周因於殷禮。所損益可知也。其或繼周者。雖百世可知也。小戴記仲尼燕居曰。制度在禮。蓋三王之禮。禹承堯舜而開湯武。其制度有當行而非徒爲記事者。故曰三王用度。孔子謂宰予爲躁者。善誘多術也。宰予知不宿問。故孔子終告之。

釋曰。別本記。或作說。非也。此與本文古昔之說。統五帝三

王者不叶焉。引易傳者序卦及雜卦文。

日月所照莫不砥厲。

砥音旨

謹案儒行云。砥厲廉隅。項時人皆自治也。

釋曰。厲或作礪。如史記索隱所据大戴禮本者。後人加石旁爾。史記作砥厲。蓋厲乃厲之異文也。

其動也時。其服也土。

謹案爾雅曰。服事也。士謂民之秀者。此言帝嚳之事。其動事也。必以天道之時。故上文曰順天之義。以時順之也。其從事也。必以民秀之士。故上文曰知民之隱。以士知之也。釋曰。引爾雅者。釋詰文。士爲民秀。本國語之齊語也。於士言服事者。猶詩大雅以服事稱膚敏之士也。史記索隱云。

服士服言其廉也。孔說脩之云。尙質儉也。非也。此記言帝
譽黃黼黻衣。豈士服乎。禮上文云。其德疑疑。當從史記。別
本作俟俟。非也。此文殘而妄爲形近之文也。詩吉日有俟
俟之稱。言獸也。今儼於不倫矣。禮下文云。日月所照。風雨
所至。莫不從順。又云。四海之內。舟輿所至。莫不說夷。此與
諸帝互文也。所以省文也。說讀若悅。禮下文云。依于倪皇。
依者親之也。詩頌曰。有依其士。倪皇。二女名也。禮下文云。
使禹傅土。此索隱所見本也。史記同。尙書作敷土。古字通
也。禮下文云。西。鮮支渠搜氏羌。或脫西字。非也。尙書大傳
云。西方者鮮方也。然禮文豈當省西之爲文乎。禮下文云。
聲爲律。身爲度。稱以出。當從史記。或作稱以上士。譌也。稱

讀去聲。禮下文云。四海之內。舟輿所至。莫不賓服。互文相備也。輿不作車。經文當一例焉。

孔子曰。予大者如說。民說至矣。予也非其人也。宰我曰。予也不足。誠也。敬承命矣。上說如字。下說音悅。

謹案此孔子以宰我有言語才。戒其以所聞而說以取喜說於人民也。今聞此五帝德之大者。如惟稱說。則人民必喜說而來至矣。是其人道聽而塗說。德之棄也。予也非其人也。宰予對言予雖不足。誠非其人也。謹奉敎命矣。

釋曰。孔氏以非其人爲不足以說五帝德也。是自予也而言。則孔子何以說之若是乎。且與下文孔子言因是改之者。豈相應乎。言聽說者。據論語義也。

帝繫

昆吾者衛氏也。

謹案衛國也。今通稱之曰衛氏也。以古之用國爲氏者而通稱焉。史記夏本紀曰。禹爲姒姓。其後分封。有夏后氏。有杞氏。繪氏。今攷春秋書之。杞。繪皆國也。此記帝繫上文曰。西陵氏。曰。蜀山氏。皆國也。故此文自衛氏而下稱氏者六。皆自其國通稱焉。

釋曰。帝繫此文。自衛氏而下。韓氏。彭氏。鄭氏。邾氏。楚氏。稱氏者六。皆國也。史記索隱引世本。氏皆作是。不知此爲通稱。蓋通乎古有用國爲氏之例也。今言禮者不察。乃執世本而釋氏爲語辭。非也。帝繫曰。黃帝居軒轅之丘。娶於西。

陵氏。西陵氏之子謂之嫫祖氏。產青陽及昌意。此當以嫫祖氏絕句焉。今而曰氏是也。讀曰氏。產青陽及昌意。何以安乎。帝繫曰。是爲黃帝。曰。是爲昆吾。若此諸文。言氏者數矣。何其皆不以氏通也。帝繫曰。帝堯娶於散宜氏。散宜氏之子謂之女皇氏。帝舜娶於帝堯。帝堯之子謂之女匭氏。豈不從氏絕句而讀之乎。夫氏者所以號也。不一例也。易傳曰。黃帝堯舜氏。左傳曰。陶唐氏。禮曰。有虞氏。左傳稱少西之名曰少西氏。孟子稱景丑之名曰景丑氏。甚而物號亦氏也。此記勸學篇曰。蘭氏之根。懷氏之苞。今於世本何執焉。繪春秋公穀同。左氏作鄆。嫫力追反。匭於憲反。或曰。釋鳥云。鸛鳳其雌皇。堯二女曰倪皇。其有取於斯歟。御覽

引尸子云。妻之以媼。媼之以娥。列女傳云。長曰娥皇。次曰女英。世本作女瑩。漢書表作女嫫。由是推之。呂氏春秋勿躬篇。以尙儀爲常娥。蓋儀古音娥也。娥皇猶儀皇。儀皇猶倪皇。皆聲近而異文爾。如五帝德篇稱倪皇者。尸子爲近之。其先媼後娥。則互倒失之也。虞書云。鳳皇來儀。在釐降二女後矣。倪皇者儀皇也。同稱曰女匭氏。皆鳳德也。或以女匭氏及二女釋檀弓說之三妃失之矣。孟子稱二女與堯典同。此足徵也。

勸學

君子曰。學不可以已矣。

謹案此君子一言。斯貫乎篇終者也。蓋其篇終之義。學如

珠玉之光。天子貴之。而澤及窮民也。學如源泉之水。君子觀之。而德兼諸美也。其篇首則曰。學不可以已矣。先總挈焉。

釋曰。勸學篇古君子其皆資之者乎。其在諸子異文。皆古本徵也。宜采之爲善本焉。曰。青取之藍而青於藍。荀子作出之藍。或取之下有於字者。非也。以句中相礙也。曰。雖有槁暴不復挺者。當從荀子。其辭乃不蹙矣。暴步卜反。于越與春秋於越同。曰。君子博學如日參己焉。如古通而猶曰而已日參焉。倒文也。不察者妄改之爾。蒙鳩從荀子。以其言尤雅也。曰。蘭氏之根。懷氏之苞。周官注云。槐之言懷也。故稱槐曰懷氏。爾雅釋木云。榲槐。或讀懷爲榲。今讀如字。

古義然也。以物稱氏。假借之辭。老子云。吾不知其名字之曰道。強爲之名曰大。王褒賦云。幸得諡爲洞籥兮。其名字及諡者。皆假借也。曰。聖心循焉。當從荀子。其勢由上文生也。夫螾之夫。荀子文脫。非原文也。曰。無縣縣之事者。無赫赫之功。荀子文。縣縣作緡緡。蓋音義同。曰。心如結兮。當從荀子。如。或作若。蓋義同。而文之成聲不同。曰。玉居山而草木潤。當從荀子。或無草之爲文。非洽也。荀子勸學篇與此記多同。

孔子曰。野哉。君子不可以不學。見人不可以不飾。不飾無貌。無貌不敬。不敬無禮。無禮不立。夫遠而有光者。飾也。近而逾明者。學也。譬之如沔邪。水潦集焉。莞蒲生焉。從上觀之。誰知其非源。

泉也。

洿音烏邪音耶莞與管通湖官反

謹案野猶鄙也。人不學則野。野則無人文威儀之飾焉。易序卦曰。物不可以苟合而已。故受之以賁。賁者飾也。故賁之彖傳曰。文明以止。人文也。夫文明者非學何以能然。詩曰。學有緝熙于光明。洿邪下地也。蓋勸學以成賁飾。若學禮有威儀矣。其後言珠玉之賁者。喻飾之遠而有光也。言源泉之水者。喻學之近而逾明也。

釋曰。凡言野人者。謂其鄙人也。則野猶鄙也。引詩者。敬之文。史記云。汙邪滿車。言下地田也。汙與洿通。孔氏云。雖有學焉。不飾則野。非也。夫子路野哉。以其未文之以禮樂也。學不足也。論語所以必告之以好學也。如孔說。豈勸學之

義乎。野哉說苑作鯉。以爲孔子告伯魚也。或以改此記文。非也。夫安知孔子非述古歟。記文自君子不可以不學至。誰知其非源泉也。尙書大傳有其文。亦無專自鯉而言也。曰。水潦集焉。集不作瀾。當從大傳。喜其潔也。記下文。自珠者。陰之陽也。至於寡孤獨不得焉。管子侈靡篇有其文。得上多與字。與猶預也。記下文。言觀水者。荀子坐宥篇略同。倨讀若据。直也。句讀若鉤。曲也。曰。淖約微達。當從荀子。或從別本。失之。曰。受惡不讓。似包蒙。當從說苑。曰。以注量必平。當從四庫校本。曰。其萬折也必東。似志。當從荀子。篇終二節。注家以爲旁及而汎言之。非也。

子張問入官

教不能勿指。指音晉

謹案說文。指。插也。教不能者。獨指一端。則易明。勿他插也。

插楚洽反
易以智反

釋曰。盧注。疑指爲晉之誤。非也。易傳云。晉進也。夫教不能者。欲其漸進於能。豈勿進乎。禮內則云。指笏。釋文云。指插也。從說文也。今人恆言。凡別人他端者。皆曰插。蓋古語之遺也。以言此記文可矣。記下文云。失言勿踦。盧注云。踦。邪也。出言旣失。勿爲邪途以成之。是也。成二年公羊傳云。相與踦閭而語。釋者謂其人相語。一在門外。一在門內也。蓋踦在可出入閒也。則踦言可推矣。記下文云。忿數者獄之所由生也。校者疑數字誤。非也。蓋忿怒而數速。是不可忍。

也能無訟獄乎。詩行露云。何以速我獄。釋詁。速數義同。數色角反。記下文言歷者。詳尚書集注述疏梓材篇。記下文云。邇臣便辟者。羣臣僕之倫也。又云。邇臣便辟不正。廉而羣臣服汙矣。服當爲僕。上下文相應也。君子南面臨官。統諸侯大夫而言。故曰羣臣僕。禮運說可攷也。前文邇臣便辟者。乃涉後文邇臣便辟而誤衍便辟之文爾。此僞家語誤同。記當曰。邇臣者羣臣僕之倫也。若表記緇衣。惟言邇臣也。孔氏廣森云。便辟左右給使令者也。此未察其爲衍文而爲之說爾。孟子云。便嬖不足使令於前與。漢書佞幸傳贊云。咎在親便嬖。所任非仁賢。故仲尼著損者三友。此漢書據論語友便辟之損也。蓋以辟通嬖也。便讀平聲。如

以便辟使令者。次邇臣以爲羣臣僕之倫。豈曲禮所謂佺人必於其倫乎。詩采菽云。平平左右。韓詩作便便。詩說云。便便。辯治也。彼言便。豈言辟乎。如謂辟婢亦反。論語友便辟。其讀當然。則以此損友而次邇臣。亦豈其倫乎。然則其爲衍文之誤無疑也。論語言子張者曰。師也辟。今告之曰。邇臣便辟。不正廉。蓋示戒焉。記下文云。賢君良上。必自擇左右。是故佚於取人。勞於治事。勞於取人。佚於治事。故君子欲譽則謹其所便。此以君子一句結本節之文也。便當爲使。蓋所使者。左右在其中。又可自左右而推之也。其連文云。欲名則謹於左右。此誤以注文登爲記文爾。蓋盧注不察。便爲譌文。遂釋之曰。便所便習。又以左右申之。以欲

名釋欲譽。其後注本文殘。校者遂再誤焉。不然。旣曰邇臣便辟。豈可惟曰謹其所便乎。此記文言譽者數矣。何獨於此複言名乎。

六馬之離。必於四面之衢。民之離道。必於上之佚政也。故上者尊嚴而絕。百姓者卑賤如神。

謹案爾雅曰。四達謂之衢。民之離道。謂民離散之路也。佚與逸通。書多方言。桀紂圖厥政者曰。有夏誕厥逸。又曰。乃惟爾商後王。逸厥逸。皆佚政也。尊嚴而絕者。下情不上通也。卑賤如神者。下民不可欺也。盧氏說以孟子曰。民爲貴。社稷次之。君爲輕。蓋上則絕而下則神。此從來世變皆無如何也。

釋曰。引爾雅者。釋宮文。僞家語以離道爲叛道。非也。夫民去佚政。何謂叛道乎。記上文云。故上者辟如緣木。耆務高而畏下者滋甚。此惟一句讀焉。句中若上者若務高則微讀可矣。其爲文與尙書之曲達者略同。僞家語不得其讀而改之。非也。

故君子莅民。不可以不知民之性。達諸民之情。既知其以生有習。然後民特從命也。莅與

通

謹案詩說。莅臨也。盧氏曰。性爲仁義禮智。詩云。天生烝民。有物有則。是也。情者樂記所謂性之欲也。中庸云。喜怒哀樂之未發。謂之中。發而皆中節。謂之和。性發爲情也。於是知其性。則達諸情矣。盧氏曰。生謂性也。習調節也。其說通。

於書矣。書召誥曰。節性。蓋性之欲爲情。斯宜節性焉。以生有習者。以性生。故有教習而調節之也。民特從命者。民得性生之教習。特必從命也。

釋曰。盧注得之矣。宜有脩焉。盧注云。性爲仁義禮智之等。情爲喜怒愛惡之屬。性者生之質。情者人之欲。由今攷之。董子對策云。性者生之質也。情者人之欲也。此盧說所由也。孟子云。君子所性。仁義禮智根於心。蓋性者生之理也。非生之質也。根於心而生。四德皆信也。孔子易傳云。君子行此四德者。亦該信於其中矣。盧注於此言等者。非以文未及信乎。而其理固可該也。樂記云。人生而靜。天之性也。感於物而動。性之欲也。物至知知。然後好惡形焉。好惡無

節於內。知誘於外。不能反躬。天理滅矣。夫物之感人無窮。而人之好惡無節。則是物至而人化物也。人化物也者。滅天理而窮人欲者也。然則董子說雖亦以制節言之。而其說猶未悉歟。孔氏云。以己也。民生而有性。己生之後復有習俗。因其習而治之。則民易從。孔說釋記言以者強矣。彼曰。因其習而治之。其意則記本文所無也。論語云。性相近也。習相遠也。則習有可因者。有不可因者。能概言乎。僞家語於此竄之云。既知其性。又習其情。然後民乃從命也。其言習者。自君子而言。豈記文之本義乎。記文不可以不知民之性。達諸民之情。此惟一句讀焉。句中至民之性。則微讀可矣。記下文云。民有小罪。必以其善以赦其過。如死使

之生其善也。言雖大罪至死而赦之。亦以其善也。周官小司寇所謂議賢議能也。

故非忠信則無可以取親於百姓矣。外內不相應則無可以取信者矣。

謹案論語子張問政。子曰。居之無倦。行之以忠。此所謂外內相應者也。夫居之爲存諸心內也。行之爲發於事外也。中心無倦。是存此忠而不息也。忠以取信。是行其忠而皆盡也。安可外內不相應乎。論語稱子張問達者。孔子詰而言之。乃告之曰。是聞也。非達也。故此記言入官者。以安身取譽爲言。其卽所謂達也。夫達也者。外內無不相應也。

釋曰。孝經言揚名者譽也。外內相應以實取之。則譽至矣。

中庸稱詩曰。庶幾夙夜。以永終譽。君子未有不如此而蚤有譽於天下者也。非以實取之歟。論語。告子張問政者。約此記文之要也。史記仲尼弟子列傳。不詳顓孫師子張之官。衛將軍文子篇。言顓孫師之行也。蓋稱孔子言之曰。其不伐。則猶可能也。其不弊。百姓者。則仁也。詩曰。愷悌君子。民之父母。夫子以其仁爲大也。由是言之。子張問入官。豈空言哉。此記曰。仁在身。則民顯以佚之也。此記所謂身安譽至也。子張豈不能如孔子所告者哉。記下篇盛德。盧注。言九室。法龜文者。詳尙書集注。述疏鴻範篇。

千乘

以中情出。小曰問。大曰講。

問去聲。講讀爲構。居候反。又如字。

謹案以中情出者。以國中情實漏出於外也。閒謀也。講讀爲構。孔氏曰。戰國策交構之字皆爲講。是也。或曰。講如字。貪欲而講中情於外也。左傳曰。楚人討陳叛故。曰。由令尹子辛。實侵欲焉。君子引逸詩言之曰。講事不令。周官士師邦謀注曰。爲異國反閒。蓋閒其小者也。邦汭注曰。斟酌盜取國家密事。蓋講其大者也。故司寇所屬士師治之。而孔子於哀公告之。後世外交而貳者。閒焉。講焉。而國無執法也。斯國事危矣。謀達協反

釋曰。僖二年左傳云。齊寺人貂始漏師于多魚。漏軍情也。多魚地名。引講事者。襄五年左傳文。傳言其貪也。杜注釋講爲謀。或謂當以此記文之講釋之。其在後世。亦一義也。

詩周頌酌篇。左傳作汭。其義通也。外交而貳。禮郊特牲說可推也。記上文云。凡事尚賢進能。使知事爵不世。能官之不愆。使知謂使其知若斯也。若後文言咸知也。或讀知去聲。非也。上文云。凡民戴名以能食力。此一句讀也。凡民則微讀焉。戴名者。若魯語稱匠師廢也。月令云。物勒工名。以考其誠。蓋戴名也。故此記文遂曰。以時成。以事立。三字句也。上文云。以爲無命。則民不偷。或以無命作典令。非也。上文云。以敎民之不時。不若不令。從孔氏讀是也。若順也。上文言蜚征者。蜚古飛字。釋言云。征行也。易本命篇云。或飛或行。馬融廣成頌用蜚征之文。上文云。庶虞草木。或無木字。譌也。上文云。誘居室。家有君子曰義。此呂刑鴟義之類。

也。所謂非義之義也。詩國風說婦人謂其夫曰君子。此誘有夫之婦爲義妻也。詳尙書集注述疏。阮氏以詩吉士誘之言其義。則與上下文不一例矣。記文何以統之曰凡民之不刑。蓋言其不法也。

在今之世。男女屬散。名不升于公門。

謹案記上文曰。古者殷書爲成男成女名屬。升于公門。禮說曰。殷衆也。殷書掌書衆民之版者也。故爲衆名屬籍焉。周官司民掌萬民之數。自生齒以上皆書於版。異其男女。歲登下其死生。及三年大比。司寇獻其數于王。王拜受之。登于天府。蓋殷書亦其類也。魯哀公時。民屬散。則名不升矣。後世以稅地統役丁。而戶口之籍無稽。於是言民數者。

乃据一時存錄之文。輒稱之曰四萬萬。是烏知古者兆民

無虛籍視之如家屬然哉。比毗志反

釋曰。釋此記文者。其義皆公言也。今述之以通時務焉。

四代

聖。知之華也。知仁之實也。華音花。知與智通。

謹案華者實之發。實者華之本。聖之集大成者。異乎一偏之聖。此由其知之大而發也。知者知而弗去。是謂貞固。足以幹事。此仁之本所由立也。

釋曰。知古通智。今讀記文。乃知孟子言聖言智者實自此而開之矣。故本孟子說以釋此記文也。言貞固者。用易文言也。記上文。可哉。不作何哉。其曰。臣願君之立知而以觀

聞也。洪氏頤煊云。管子曰。立少而觀多。則天下懷之矣。蓋其義亦同。記上文云。昔夏商之未興也。伯夷謂此二帝之眇。孔氏云。伯夷。虞史也。眇。小也。言此六法六府爲堯舜之小政。是也。周書祭公篇云。追學于文武之蔑。蓋蔑。小也。其爲文略同。或以後篇虞戴德言三常者而改二帝。非也。方言四代。乃稱二帝。故必畫而明之曰。昔夏商之未興也。如稱三常。安用某代未興云乎。且本篇豈不言三德乎。何爲於此遽言三常乎。洪氏引管子之三常。汪氏照引陰符之三常。視彼据後篇言之者。尤非也。其曰。辨歷大道。以時地性。此大道當爲天道。傳者之譌也。其言地宜及高山大川者。喻其人也。所謂表儀也。所謂衆有美焉者也。洪氏云。言

名都大邑。必有賢聖處焉。是以爲喻其地也。豈叶乎。上文云。曰。由德徑徑。此五字當在何以哉之下。曰。上脫子字。因致誤爾。汪氏照本當從之。徑如算術之徑。謂直達也。

子曰。伯夷曰。建國建政。脩國脩政。

謹案學記曰。古之王者。建國君民。教學爲先。呂氏春秋云。武王克殷。進殷之遺老。問民之所欲。遺老對曰。欲復盤庚之政。武王於是復之。蓋建國建政者若斯也。孟子曰。今國家閒暇。及是時。明其政刑。雖大國必畏之矣。其言仁政者。曰。省刑罰。薄稅斂。深耕易耨。壯者以暇日脩其孝悌忠信。蓋脩國脩政者若斯也。

易以智反
耨奴豆反

釋曰。荀子榮辱篇云。請問爲國。曰。聞脩身。未聞脩國也。君

者儀也。儀正而景正。君者槃也。槃圓而水圓。君者盂也。孟方而水方。故曰。聞脩身未聞脩國也。此荀子有爲而矯異之言爾。豈未聞虞史伯夷所言之歟。荀子下文云。欲脩政美國。則莫若求其人。彼之所言。非脩國脩政而何邪。景古影字。記上文云。天道以視。地道以履。人道以稽。蓋稽考也。召誥曰。其稽我古人之德。矧曰。其有能稽謀自天。酒誥曰。爾克永觀省。作稽中德。呂刑曰。惟貌有稽。斯人道備焉。省悉并反。上文云。君藏玉惟慎。用之惟慎。敬而勿愛。民亦如之。今攷下。惟或作雖。譌也。慎者敬也。言雖慎可乎。言雖慎而敬可乎。愛謂私愛也。五等執玉。弗以私愛而加其等。用民而官人者。亦如之也。故云。執事無貳。五官有差。喜無竝。

愛卑無加尊。淺無測深。小無招大。蓋貳謂不專壹。五官五等之官。如孟子說也。差等也。招讀如賈誼論招八州之招。猶翹也。謂小而翹高於大也。無者戒其無然。非以稽不能也。記遂云。此謂楣機。楣機賓薦不蒙。昔舜徵薦此道於堯。堯親用之。不亂上下。今攷爾雅釋宮曰。楣謂之梁。蓋楣次棟者。賈氏曰。凡賓升皆當楣。呂氏春秋注曰。機門內之位也。機與畿通。詩曰。不遠伊迓。薄送我畿。今謂迎賓入門內之位也。釋詁曰。薦進也。徵者書所稱舜徵庸之徵也。言此官人有差之道。君必用之。此謂楣機。蓋自楣及機。賓入有所薦進。前後不蒙蔽焉。言從其薦進也。昔者舜初徵時。薦此官人有差之道於堯。堯親用此道。則官人不亂而上下。

有差。此孔子欲感哀公用。今所薦之言也。注家諸說皆未洽也。差楚宜反。上文言民徵者。如文王官人篇六徵之徵也。

虞戴德

黃帝慕脩之曰明。法于天明。開施教于民。行此以上明于天化也。物必起。是故民命而弗改也。

謹案此記文。黃帝當微讀焉。言黃帝者。舜慕其道而脩之也。易曰。黃帝堯舜氏作。通其變。使民不倦。神而化之。使民宜之。其脩之從可知也。堯老舜攝。故此記言舜而堯可諒焉。蓋黃帝之道在丹書之敬矣。敬則明矣。孝經統上古而稱先王者曰。則天之明。呂刑稱虞帝教民之功者曰。德明

惟明。今總言其明之法。天化民者而稱其慕脩之曰明。此首提其要也。施教于民而言開者。易所謂開物也。大學曰。古之欲明明德於天下者。以天下民明德之化上本乎天也。物之化於其天性者。無不遂化而興。則曰物必起。由是之故。有虞氏之民皆命而弗改以戴德也。

釋曰。引易者皆繫辭傳文。丹書詳武王踐阼篇。物必起。讀三字句焉。其上句也。字爲拖下之辭。斯其氣盛則長短皆宜。汪氏照本以其短而移前文開字益之。以爲開物未察於古文法也。易繫辭傳云。開而當名辯物。又何說乎。樂記云。述者之謂明。今言脩明非惟述明也。記下文云。此上知所以行斧鉞也。此字下或有以字衍文也。言到行者。到古

倒字。孔氏引說文釋之。當矣。今詳孝經集注述疏後答問。下文云。故有子不事父。不順。有臣不事君。必刃。此互文也。不忠。不順。不孝。必刃。下文言示威者。示等威也。言率名者。若禹貢某州某物。大率皆名之也。陳六律呂。周官所謂六律六同也。其心志端。汪氏照本當從之。

天事曰明。地事曰昌。人事曰比。兩以慶。

明古音亡。比如字。慶古音羌。

謹案釋詁曰。明。成也。事非明不成也。易言乾之統天者曰。大明終始。六位時成。故天事曰明。釋詁曰。昌。當也。謂承當也。易言坤之地道代有終者曰。承天而時行。故地事曰昌。比者象而則之也。兩者天地也。易言占事之筮者曰。分而爲二以象兩。孝經言民之行者曰。天地之經而民是則之。

詩傳曰。慶善也。易言事之由來者曰。積善之家。必有餘慶。故人事曰比。兩以慶。此申言上文三常之事也。記文用韻焉。

釋曰。引時成者。易象傳文。引承天者。易文言文。下引積善者。同。莊子云。今夫百昌皆生於土。而反於土。彼亦言乎地之昌也。引象兩者。易繫辭傳文。慶善。詩皇矣毛傳義也。孔氏洪氏讀比毗志反。豈叶乎。後篇詰志云。天曰作明。日與惟天是戴。地曰作昌。日與惟地是事。人曰作樂。日與惟民是嬉。汪氏照本於虞戴德此文。益之云。人事曰樂。比兩以慶。非也。樂古音五教反。非相韻也。記下文云。此惟官民之上德也。上與尚通。民人也。言天下國家之平治。此唯貢士

官人之尚德也。皋陶謨曰。在知人。在安民。遂曰。知人則哲。能官人。故曰。亦言其人有德。此文王官人篇所以稱變官民能也。

公曰。三代之相授。必更制典物。道乎。子曰。否。猷德保。保懃乎前。以小繼大。變民示也。更平聲。懃與昏通。

謹案三代。夏殷周也。更謂變革。小戴記大傳曰。聖人南面而治天下。必自人道始矣。立權度量。考文章。改正朔。易服色。殊徽號。此其所得與民變革者也。其不可得變革者。則有矣。親親也。尊尊也。長長也。男女有別。此其不可得與民變革者也。故哀公意變革所更者爲道。而孔子否之。猷謀也。詩小雅曰。天保定爾。遂曰。羣黎百姓。徧爲爾德。所謂德

保也。惛猶昏也。左傳曰。桀有昏德。牧誓則稱紂昏棄焉。召誥言夏傳子者曰。天迪從子保。言殷格正夏者曰。天迪格保。而皆曰。今時既墜厥命。所謂保惛乎前也。大誥曰。與我小邦周。召誥曰。天既遐終大邦殷之命。所謂以小繼大也。示古通視。孔子言聖人之道。不在更制典物。而在謀德保。其保既惛乎前代。明今當謀德保也。殷克夏。周克殷。以小邦繼大邦。其更制前代典物者。欲變民觀示從前者爾。蓋其德保之道不在斯也。長丁丈反

釋曰。孔氏疑桀紂字誤爲保保。洪氏以廣雅通之曰。葆葆茂也。皆非其本義也。猷謀。釋詁文。引左傳者。見宣三年。大戴禮少閒篇言桀紂者。皆曰德昏。蓋無以爲保也。引召誥

者詳尙書集注述疏。觀示用釋言義也。記下文言老彭者。詳論語集注述疏述而章。五帝德篇云。舉舜彭祖而任之。此在堯時矣。或謂彭祖卽大年之老彭也。此不足徵也。記下文言祔者。孔氏謂盛服也。祔讀若附。其曰綴以德。行不任以言。大夫士庶人皆然。獨舉庶人者。欲不迫切爾。庶人且戒之。況大夫士乎。言穡者。地事莫重於穡事也。舉穡則天事之福人事之長。皆可見矣。故終舉焉。洪氏本改之。非也。

誥志

虞史伯夷曰。明孟也。幽幼也。

幼與通

謹案說文。史。記事者也。虞書堯典。煥乎其有文章。孰爲之

史哉。今据此記而猶可知者。其虞史伯夷乎。五帝德篇言舜時者曰。伯夷主禮以節天下。卽虞書所稱咨伯作秩宗者也。其史職在主禮之先歟。此猶龍在舜時作納言。而在堯時則龍與夔同典樂矣。五帝德篇言堯時者曰。龍夔敎舞。

釋曰。洪氏於四代篇說云。伯夷虞史典禮者。此於文未析也。襄二十七年左傳有祝史之稱。易巽象亦稱史巫矣。豈不淆於典三禮言祭者邪。夫伯夷之稱伯也。以國語參詩傳。蓋在外諸侯爲四嶽之伯也。今人而在內。爲史焉。爲秩宗焉。何其才之兼人也。記文自釋明與幽而終其說曰。此謂虞計月。皆伯夷說也。其釋明與幽者。詳尙書集注述疏。

堯典篇。汁與協通。孔氏謂卽虞書之協月是也。記上文稱周太史者。孔氏說以史記云。老子周守藏室之史也。斯不如闕焉。以周官固別有大史之官也。太與大通。

主祭於天。曰天子。

謹案白虎通云。殷周以來。始謂王者爲天子也。非也。史記五帝本紀云。諸侯咸尊軒轅爲天子。代神農氏。是爲黃帝。蓋天子之稱。由是始矣。故孟子辯堯舜時閒。每以天子爲稱。此非以殷周之稱追而通稱之也。此記誥志篇稱天子者。非及堯舜乎。夫由禹以來。王之稱至春秋時而僭矣。於是乎春秋特書曰天王。迨戰國時而王之稱濫矣。於是乎秦以皇帝稱。其在後世而皇帝之稱濫矣。其不敢濫者。夫

子之稱也。記曰。主祭於天。曰天子。大矣哉。豈不以天其子之。而後能主之哉。

釋曰。易繫辭傳云。神農氏沒。黃帝堯舜氏作。遂云。黃帝堯舜垂衣裳而天下治。蓋天子治天下者也。互詳孝經集注述疏天子章。記下文云。雒出服。河出圖。孔氏說云。服馬也。詩曰。兩服上襄。今攷易繫辭傳云。河出圖。洛出書。聖人則之。雒與洛通。孔以爲不必河恆出馬。故以雒出馬言之。非也。易豈妄言乎。釋詁云。服事也。鴻範九疇。本雒書爲大法。皆人事法天事也。故曰雒出服。莊子云。九雒之事。其言有由也。莊子天運篇可攷焉。洪氏云。服讀爲負。失之矣。微論所讀非古音之近也。卽謂神龜負文以出。而其爲言惟曰。

出負可乎。記下文云。胤使來往。地賓畢極。賓與濱通。洛誥稱周公曰。子乃胤保大相東土。釋詁云。胤繼也。繼大保爽而往也。則胤使可推也。洪氏云。胤嗣也。古者虞書敎胄。亦有如漢蠻夷遣子入侍之禮。非也。釋詁。胤嗣義同。堯典云。胤子朱。然以言此記文。不亦誣乎。何以其事無徵文乎。相讀去聲。

文王官人

謹案詩序云。棧樸。文王能官人也。其詩曰。周王壽考。遐不作人。蓋作育人材而能官之也。周書立政篇。則周公以文王官人法而陳於成王矣。其法由皋陶謨九德官人之要道而推之也。故曰。克知三有宅心。灼見三有俊心。何其明

哉。若文王官人篇。則又以立政之義。案諸人事。麤而翹之。以分陳其略也。周書官人篇序曰。成王訪周公以民事。周公陳六徵以觀察之。作官人。謂周史作官人篇也。此與尙書序稱某事作某篇者例同。非謂周公作也。昔者文王以六徵告太師尙父。若此記文王官人篇是也。其後周公爲太師。以成王訪之。述文王言六徵者而陳之。若周書官人篇是也。故周書題曰官人。而不曰文王。記曰。倫有七屬。屬有九用。用有六徵。皆悉數焉。而周書乃舉要而惟言六徵。然則大戴禮此篇實采之禮古記出於魯淹中及孔氏者。而非采之周書也。昭然矣。後儒不見禮古記。而見周書。遂謂自周書采之。豈其實乎。故彼此篇同。而異文頗多。則以

傳之者異爾。學者慎擇焉可也。記曰。考其所爲。觀其所由。察其所安。論語爲政篇述之矣。記曰。以其見占其隱。曾子立事篇述之矣。且立事於人言觀者十有一。皆與官人篇略同。當互參之矣。周書曰。醉之酒以觀其恭。從之色以觀其常。此試之以術焉爾。乃與莊周寓孔子言爲九徵觀人者略同。豈文王而出此乎。記曰。醉之以觀其不失也。縱之以觀其常。則與周書文不悉同而義勝矣。記曰。臨之以貨色而不可營。周書曰。臨之貨色而不過。則周書勝於記焉。夫若此類者。君子皆因其人適然而觀之。非自以之試其人而觀之。可不辯歟。古書口傳者多。每損益其辭。能無失其義歟。曾子曰。近諸色而觀其不踰也。飲食之而觀其有

常也。以是例之。其庶幾乎。父音甫以其見讀見賢遍反從音縱

釋曰。三宅三俊。詳尚書集注述疏及論語集注述疏視其所以章言太師者。据保傅篇及尚書君奭序也。言凡徵者。据莊子列禦寇篇也。周書今不曰逸周書者。則尚書說逸文詳之矣。麤而翹之。小戴記儒行文。

乞言勞醉而面於敬愛。勞去聲

謹案內則言養老者曰。三王有乞言。蓋既養老而求其教言也。玉制言成歲事者曰。休老勞農。孔氏穎達曰。卽十月祭蜡時飲酒勞農也。周官酒正言饗耆老者曰。共其酒。無酌數。鄭氏曰。要以醉爲度。蓋於勞農時而養老是勞醉也。周官籥章注可攷焉。今言其隱於忠孝者。則當國中養老

人衆之日。而面爲孝子敬愛其親也。是僞飾以得其名也。
共與
供通

釋曰。小戴記月令有勞酒之文。今勞醉例同。盧注云。醉言
悴也。孔氏廣森說云。乞求也。求人言其勞悴。以爲孝名也。
皆非也。夫篇中於觀誠言醉之者。如字言之。今何爲同在
篇中。而以醉通悴乎。孔氏於下文說云。忠孝猶誠孝也。是
也。明其隱於忠孝者。僞也。如求人言其勞悴。則所求之人
知其僞矣。何以得其名乎。記上文言淹之以利者。孔氏說
以儒行曰。淹之以樂好。是也。上文云。其貌直而不侮。周書
作不止。當從之。蓋止容止也。孝經曰。容止可觀。今質直者
有不然也。蓋與詩相鼠。譏人而無止者不同。舊說釋止爲

留。非所以說貌也。記作不侮。則不必有質者而然也。殆傳
禮者不達止之爲文而改之爾。上文云。飾其見物。謂著見
之事也。見賢遍反。上文言勢氣者。周書作假氣。此可兼從
也。今人亦有謂其人一時氣勢者。其意亦與勢氣同。上文
云。愚怒者也。周書云。愚依人也。蓋依人之文殘合而譌爲
怒也。當曰愚依人者也。校者或改之。豈叶乎。四代篇云。依
勿與謀。今謂愚而依人者之偏執也。孔氏說。釋曰。慎爲自
順。是也。古字義通。上文云。妬誣者也。有始字者失之。上文
云。民有五性。喜怒哀懼憂也。此五者。性發爲情。故從其本
而亦稱之曰性。今之人稱喜怒哀爲稟性。蓋亦然也。上文云。
懼色薄然以下。蓋薄迫也。晉語注義也。上文云。雖欲故之。

中色不聽也。周書故作改。非也。失其爲文之善矣。欲故之而不聽其故。此其文固相應也。中色者中所發色也。上文云。推前惡忠。府知物焉。首成功。少其所不足。慮誠不及。佯爲不言。內誠不足。色示有餘。故知以動人。自順而不讓。錯辭而不遂。莫知其情。如此者。隱於知理者也。惡烏路反。錯七故反。知理。讀知若智。蓋物猶事也。府。聚也。呂刑曰。惟府辜功。其爲文同。言推求前事。惡人之忠盡其事。惟聚所知前事焉。以首居其成功。故周書約其文曰。前總唱功。言於前事。總聚其首唱之功也。其事有所不足者。則輕少之以自掩。其慮實不及。佯詐爲不言其事。彼內心之知實不足。外色則示人以有餘。明其所以惡人之忠盡其事也。故知

謂其宿所知也。錯與措通。措辭置辭也。動人動其人不
知此者。令驚聳也。人爲所動者。必美其多知。彼乃自順其美
而不讓。或措辭而不遂終其辭。令人莫知其情實。其隱託
於知理者有如此。由今攷之。舊注宜脩之而叶矣。記文。府
知物焉。首成功。此七字句也。易傳云。繫辭焉而明吉凶。孟
子云。必有事焉而勿正。其例也。昭十二年左傳有不爲怨
府之言。釋者謂怨之聚也。今反之。則爲功府矣。校者不知
而輒議改之。非也。上文云。有道而自順用之。此豈見其隱
於文藝乎。周書有作假用作因。其義當矣。其言敬再者。周
書作亟稱。當從之。夫敬則何隱乎。

忠愛以事其親。歡欣以敬之。盡力而不面敬。以安人以名。故不

生焉。曰：忠孝者也。

謹案：孝事其親而言忠愛者，明乎中心之孝而非面爲之也。曾子本孝篇曰：「忠者其孝之本與？」內則曰：「以其飲食忠養之。」所謂中心爲忠也。孝經曰：「君子之事親孝，故忠可移於君。」由是而推矣。祭義曰：「養可能也，敬爲難。」敬爲難，敬可能也。安爲難。今日敬以安，斯其本忠而爲孝也。於是乎實至名歸，則人以名其孝矣。論語稱人之言曰：「孝哉閔子騫。」蓋人以名也。非孝子要名也。故如孟子言兄弟無故之故，今日故不生焉。孝子居家理也。曾子立孝篇曰：「懼欣忠信，咎故不生，可謂孝矣。」懼，猶歡也。與平聲。養去聲。要平聲。

釋曰：此無盧注。孔氏疑安爲要。戴氏校本，名字倒在故下。

皆非也。以失其讀而失其義也。歡周書作驩。蓋義同。周書又於此異文者。譌也。荀子云。子路問於孔子曰。有人於此。夙興夜寐。耕耘樹藝。手足胼胝。以養其親。然而無孝之名。何也。孔子曰。意者身不敬與。辭不遜與。色不順與。古之人有言曰。衣與繆與。不汝聊。今夙興夜寐。耕耘樹藝。手足胼胝。以養其親。無此三者。則何以爲而無孝之名也。孔子曰。由志之。吾語汝。雖有國士之力。不能自舉其身。非無力也。勢不可也。故入而行不脩。身之罪也。出而名不章。友之過也。故君子入則篤行。出則友賢。何爲而無孝之名也。晡蒲眠反。胝。章尼反。皮堅厚也。與平聲。繆。謂不衣。詩說。聊。願也。蓋言其辭色之不敬如此。可參此記文矣。記上文言隱於

交友者。當以記與周書相正焉。其文曰。比周以相譽。彼此文同。其文曰。知賢可徵而左右不同而交。交必重己。從周書文。其文曰。心說之而身不近之。身近之而實不至。從記文。其文曰。懼不盡見於衆而貌克。從周書文。其文曰。如此者。隱於交友者也。從記文。比毗志反。徵如書徵庸之徵。知賢者可徵庸而爲左右臣。故己雖與賢者不同而亦交矣。以交則己因取重焉。見謂著見爲衆知名也。克能也。貌能之爾。斯所謂面交也。記文。懼忠實。懼不二字。篆文之殘以誤也。旣誤。乃益其上句。而本義迷矣。上文云。莊而安人。此仁之由敬而成也。曲禮言毋不敬者曰。安民哉。論語曰。脩己以敬。遂曰。脩己以安人。此論語稱仁能守之者。所以必

莊以泣之也。周書言有仁心者。其文其義皆不如此。記所傳遠矣。其必後人竄之歟。周書云。曰有守者也。曰有經者也。記文當從之。下文云。迷隱遠而不相舍。蓋至友在憂難中有然矣。迷者失道也。易坤彖傳曰。先迷失道。論語曰。子畏於匡。顏淵後。子曰。吾以女爲死矣。曰。子在回何敢死。此迷而失道在後也。隱謂憂痛也。詩國風曰。如有隱憂。說苑曰。孔子困於陳蔡之間。子路曰。奚居隱也。此隱而憂痛絕糧也。雖迷雖隱以從之在遠而亦不相舍也。非至友何能乎。記此文與周書同。校者不得其說而議改之。非也。下文言位志者。謂以勢位爲志焉。得位則就而來。失位則叛而去。舊說失之。下文言望譽者。望如字。盧注以爲字誤。非也。

易无妄。史記作无望。蓋期望則妄矣。盧注云。征行也。盧從釋言義也。下文言質不斷者。謂質正之而不決也。大論周書作大倫。蓋古通也。華。謂華而不實。誕。謂誕而不經。蓋浮華而放誕也。故言視中者曰。心氣華誕者。其聲流放。蓋其中可知也。華。讀若花。

先則任賢。

謹案小戴記曰。凡始立學者。必釋奠于先聖先師。又曰。凡學。春官釋奠于其先師。秋冬亦如之。又曰。天子視學。乃命有司行事。興秩節。祭先師先聖焉。此所謂先則任賢也。古者聖賢皆通稱。孟子稱宰我曰。以子觀於夫子。賢於堯舜遠矣。

釋曰。引小戴記者。文王世子文。春官者。周官大宗伯掌禮之官也。鄭注云。先師若漢禮有高堂生。樂有制氏。詩有毛公。書有伏生。先聖周公若孔子。秩常也。節猶禮也。

用兵

人生有喜怒。故兵之作。與民皆生。

謹案上文言兵所由起者曰。傷害之生久矣。與民皆生。此則原其生於性。生中之非喜而怒者焉。樂記云。軍旅鈇鉞者。先王之所以飾怒也。

釋曰。呂氏春秋云。兵之所自來者上矣。與始有民俱。蓋由此記焉。樂記言先王統上古而言也。今据此用兵。薦言後世稱其人者。則云。故今之道。堯舜禹湯文武者。猶威致王。

今若存。非統言歟。或疑其文譌者。未審之爾。易繫辭傳云。古者包犧氏之王天下也。禮運言上古曰先王。魯語言堯制曰先王制。禮祭義云。虞夏殷周。天下之盛王也。皆其例也。威致者。威至也。禮器鄭注云。致之言至也。王天下。讀王去聲。

少閒

子曰。昔堯取人以狀。舜取人以色。禹取人以言。湯取人以聲。文王取人以度。此四代五王之取人。以治天下如此。度徒洛反

謹案狀。謂行事之狀也。史記言舜在堯時。殛鯀者曰。行視鯀之治水無狀。蓋無功狀焉。然則堯取人以狀矣。若取舜者。則以衆稱其孝狀也。色。謂德容之色也。虞書曰。賓于四

門四門穆穆言舜所賓者容色之敬也。左傳說舜舉十六相。禹列其中。卽爲容色穆穆之賓焉。然則舜取人以色矣。言謂獻納之言也。皋陶謨陳言而禹美之者。則曰。禹拜昌言。史記言其後禹立而舉皋陶薦之。且授政焉。然則禹取人以言矣。聲謂令聞之聲也。史記曰。伊尹處士。湯使人聘迎之。此孟子所稱三聘於有莘之野也。明其爲處士有聲而湯求得焉。然則湯取人以聲矣。夫以狀以色以言以聲。皆取人者所備至也。特四代各於其著者以爲名爾。故文王則兼之。周書立政篇。大戴禮官人篇。皆見其兼度焉。然則文王取人以度此四代矣。從古以來。取人之效。莫大乎五王也。故曰。五王之取人以治天下如此。蓋孔子告哀公。

以四者取人之不可缺也。盧氏雜舊說曰。文王取人以度四代。謂兼之也。相去聲。聞去聲。

釋曰。盧注云。觀其容狀施發。盧意亦以行事之狀而言矣。惟其無釋聲者。又不能專從以度四代之說。而先曰四代。據文距殷。故其釋以度曰。觀其志度。於是孔氏說云。四代篇子曰。貌色聲臭有美焉。必有美質在其中者矣。是異於五王貌色聲偏取其一也。洪氏說云。此四代五王之取人以治天下如此。謂堯典錄於虞書。唐統於虞。故稱四代。皆似而非者。戴氏校本。於以度此四代刪此字。亦非也。記下文云。子曰。五王取人。比而視。相而望。五王取人。各以己焉。是以同狀。孔氏說以中庸曰。取人以身。是也。豈不明此狀。

非狀貌乎。則聲非聲音可知也。其所謂視望者豈聽聲乎。亦豈徒察貌色乎。諸經中有言湯取人以聲音者乎。堯舜有以貌取人者乎。皋陶謨九德官人之法安在乎。記下文云。公曰。以子相人何如此。此相人者觀人之謂也。通鑑言趙平原君自以失毛遂也。曰。勝不敢復相天下士矣。此豈如荀子非相篇云乎。比相皆去聲。史記錄湯誥云。昔蚩尤與其大夫作亂百姓。帝乃弗予。有狀。此罪狀也。在黃帝時矣。予古通與。弗與猶弗取也。反而觀之。則堯取人以狀者有由也。記下文云。以容事天子。盧注云。謂忍而臣之也。此以忍釋容焉。今本容誤作客。洪氏云。客當爲憲。說文憲敬也。古恪字。今以盧注攷之。容固原文矣。此舊本也。惟以容忍

而言。豈文王服事之敬乎。呂氏春秋過理篇云。文王貌受。以告諸侯。奚可言容事邪。呂氏春秋行論篇云。文王曰。父雖無道。子敢不事父乎。君雖不惠。臣敢不事君乎。孰王而可畔也。斯非以禮事邪。蓋容者禮也。言以禮事天子也。史記儒林傳曰。魯徐生善爲容。孝文帝時。徐生以容爲禮官。明乎容者禮也。

公冠

祝雍曰。使王近於民。遠於年。高於時。惠於財。親賢使能。年讀爲

台音

謹案於民言近者。以天子之貴。惠不知親民而遠之也。年說苑作佞。當從之。蓋聲近而譌爾。春秋佞夫。公羊作年夫。

其例也。論語曰：遠佞人。佞人殆。古者農謂之嗇。以稼穡繫民食。當嗇愛而重之也。嗇於時者愛農時也。書無逸言周公告成王者曰：先知稼穡之艱難。此冠辭之意也。稼穡爲本富。其嗇於時者乃惠於財矣。孟子曰：分人以財謂之惠。民年賢韻也。時財能韻也。末句則句中亦韻也。冠去聲

釋曰：引說苑者脩文篇文。蓋劉向据禮古本焉。晉語言惠公背賂而與人誦之曰：佞之見佞。果喪其田。此佞古音讀若年也。今攷諸國語。趙文子冠而見諸大夫。其賢者皆爲告戒之辭。非當祝長年時也。方冠而以長年祝之。豈吉語乎。且曰使王遠於年。孰能使之乎。孟子稱伊尹使是君爲堯舜之君。豈不能使王遠於佞乎。惟遠於佞。故近於民。無

小人蔽之也。詩小雅云。曾孫來止。以其婦子。饁彼南畝。田
畯至喜。攘其左右。嘗其旨否。蓋曾孫者成王也。其近於民
何如也。冠辭兆之矣。攘如陽反。朱子云。攘取也。郊特牲云。
主先嗇而祭司嗇也。謂先農司農也。故曰。祭百種以報嗇
也。禮運樂記。能作耐。古文然也。史記天官書。以三台爲三
能。古音也。續漢志注引冠辭云。近於民。遠於年。遠於佞。近
於義。嗇於財。任賢使能。此好異者益其辭爾。豈其爲達而
勿多也乎。其益多者。豈古文法乎。亦豈古音乎。夫遠於佞
者。以其不祥也。今合遠於年。以爲文。豈以爲不祥乎。其嗇
於財之文。何其若上若下而皆不安乎。大戴禮公冠篇至
成王冠辭而止。蓋采之禮古記焉。其後附孝昭冠辭。又附

祭天地與迎日祝辭。原不與禮古記連文。而別附於後。此禮家以通時務也。猶鄭氏釋禮而及漢制云爾。自傳者不察。誤以所附者與禮古記連文。而疵之者。則以爲雜也。今當復別附於後。

本命

分於道謂之命。形於一。謂之性。化於陰陽象形而發。謂之生。化窮數盡。謂之死。故命者。性之終也。則必有終矣。

謹案易曰。一陰一陽之謂道。繼之者善也。成之者性也。蓋其繼之者。斯分於道焉。故易曰。立天之道。曰陰與陽。遂曰。分陰分陽。迭用柔剛。蓋分於道。謂之命也。性由命而成。天惟命善而已矣。其道一也。其成之者。斯形於一焉。故易曰。

形而上者謂之道。此性麗形以存者。道所由分。蓋形於一。謂之性也。中庸曰。天命之謂性。率性之謂道。明乎命則分於道而性成也。明乎性則形於一而道存也。易曰。原始反終。故知死生之說。蓋陰陽之道。其化則生也。其盡則死也。鴻範曰。考終命。蓋考成而終其命。則性生所分之道成。始遂以成終。故命者。性之終也。欲成終者可無終乎。則必有終矣。

釋曰。盧注宜有脩焉。孟子言君子所性者。則曰。分定故也。以天命之性。分於道而爲性分也。引成性者。易繫辭傳文。下引形上及死生者。同。其傳云。成性存存。言道存也。引分義者。易說卦文。易賁彖傳云。分剛上而文柔。是迭用者亦

分也。僞家語於此云。命者性之始也。死者生之終也。有始則必有終矣。彼竊以言之。竊者非失其義之精乎。記下文云。禮經三百。威儀三千。機其文之變也。其文變也。禮之象五行也。其義四時也。今攷大學鄭注云。機發動所由也。此言禮文之變。皆三百三千所發動也。遂言其文變也。皆禮文之有象義也。盧注云。機危也。豈叶乎。其文變也。此句也。字爲拖下之辭。與上句別。孔氏疑爲衍文。汪氏照本且刪之。則未察於文法爾。記下文云。喪婦長子不取。或作喪父者。譌也。喪婦自女之父而言也。其無所受命者。謂無母之教命也。

易本命

子曰。夫易之生人。禽獸萬物。昆蟲各有以生。

謹案易曰。生生之謂易。謂陰陽變化也。今故以易之生者而言。

釋曰。引易者。繫辭傳文。其傳云。天地之大德曰生。蓋乾大生而坤廣生。此易道所由成也。記下文言禽鹿者。猶周官以雉爲禽也。史記李斯傳有禽鹿之稱。記下文云。食桑者有絲而蛾。謂蠶也。天下之大利也。詳尙書答問禹貢篇。以上禮記儀禮周官大戴禮共補正二百零六條。

禮記子思子言鄭注補正卷四終

門弟子校栞於讀書堂